






ADVIS  
ET DEVIS  
DES  
LENGUES


400  
B715














400

77.5


2

100











ADVIS ET DEVIS  
DES LENGVES

SVIVIS DE LAMARTIGENEE


CEST A DIRE DE LA SOVRCE

de peché

par

FRANÇOIS BONIVARD

Ancien prieur de St-Victor.




GENEVE

Imprimerie de Jules-Guillaume Fick

1865



400  
H 715




46603





AVX MEMBRES DE LA SOCIÉTÉ  
d'Histoire & d'Archéologie de  
Genève, & au Lecteur  
fidèle.

\*  
\* \*

ESSIEURS, « *Encore une pierre qui tombe de l'édifice que nous cherchons à élever & à soutenir, »* nous disoit le docteur Chaponnière, rendant un juste hommage à la mémoire d'un de nos plus savants collègues; ces paroles, présentes sans doute encore à vos esprits, avec quelle douloureuse tristesse ne dois-je pas les répéter, moi, à qui est échu le devoir de rendre à Chaponnière ce même hommage qu'il rendoit naguère à son ami. Chaponnière, Mallet! en répétant ces deux noms que la mort devoit unir, vous me pardonnerez, Messieurs, une émotion trop légi-



time. Mallet fut le premier qui, accueillant des essais bien faibles encore, voulut user de l'autorité de son nom pour me faire ouvrir vos rangs, où je trouvai le docteur Chaponnière, ce vétéran de la science, qui non-seulement m'accueillit avec l'indulgence & la bonté qui lui étoient familières, mais ne dédaigna pas de m'associer à ses savants travaux. Vous le voyez, Messieurs, dans les deux collègues que nous pleurons, je ne sais si je n'ai pas le droit de dire que j'ai perdu plus qu'aucun de vous; car avec le docteur Chaponnière, dont je vais avoir l'honneur de vous entretenir, j'ai vu disparaître un collaborateur & un ami.

Jean-Jacques Chaponnière naquit à Genève le 1<sup>er</sup> juillet 1805. Elevé dans notre ville, il poursuivit ses études au collège & dans nos auditoires sous ces hommes distingués dont le moindre mérite auprès de la postérité ne sera pas d'avoir formé tant d'élèves dignes d'eux. Arrivé à l'âge où l'homme entre dans la vie active, le jeune Chaponnière se décida pour la



v  
médecine & se rendit à Montpellier où  
il demeura un an, puis passa de là à  
Paris en 1826. Le temps du noviciat pour  
le médecin est généralement long, aussi  
notre collègue étoit-il encore étudiant à  
Paris en 1830. Il y fut témoin des trois  
fameuses journées & donna ses soins aux  
blessés de Juillet.

Revenu à Genève, Chaponnière soutint  
sa thèse & fut reçu docteur avec de grands  
éloges, succès d'autant plus flatteur qu'on  
connoît la prudence que mettoit la Faculté  
dans ses admissions, de quelles précautions  
elle s'entouroit. Dès lors le nouveau mé-  
decin parcourut activement la carrière  
qu'il avoit embrassée & qu'il n'abandonna  
que peu d'années avant sa mort. Une au-  
tre plume rendra sans doute à Chapon-  
nière la justice qui lui est due comme mé-  
decin, & si nous parlons ici de sa science  
médicale ainsi que de sa connoissance de  
la musique, art qu'il cultiva toujours avec  
passion, ce n'est que pour montrer de  
quelle variété d'aptitudes la nature s'étoit  
plu à le douer.



Ce ne furent cependant ni la médecine ni la musique qui occupèrent la première place dans l'esprit, je puis presque dire dans le cœur de Chaponnière. Fils d'un poète, de l'auteur de ce joyeux Barbier qui a conquis droit de cité parmi nous, on auroit cru que le jeune docteur, s'inspirant de l'exemple paternel, auroit voué ses loisirs aux arts & aux lettres ; ce fut à l'histoire & à toutes les recherches les plus ardues qu'il les consacra. C'est à l'année 1836 que remonte la création de notre Société ; elle se forma sous l'impulsion de l'ancien recteur Boissier, de Favre-Bertrand, d'Edouard Mallet, appuyés du grand nom de Sismondi, & si nous ne trouvons pas Chaponnière au nombre de ses fondateurs, nous verrons dès l'année suivante la Société d'Histoire & d'Archéologie l'appeler dans ses rangs. Il ne tarda pas à prendre une part active à vos travaux, & le premier volume des Mémoires de la Société contient deux notices de lui : l'une sur les léproseries



au moyen âge, l'autre faite en commun avec le docteur Coindet, sur l'entrée à Genève de Béatrix de Savoie, femme de Charles III, avec la description des fêtes que lui donnèrent nos ancêtres. Un peu plus tard, le docteur Chaponnière, toujours inspiré, je le pense, par sa double position de médecin & de savant archéologue, rédigea, de concert avec M. l'archiviste Sordet, un travail sur les hôpitaux genevois au moyen âge, document d'un haut intérêt sur un sujet jusque-là peu étudié & mal connu.

Dès lors, en parcourant le recueil des Mémoires de la Société, c'est à peine si l'on trouve un seul volume qui ne garde le témoignage des recherches à la fois variées & profondes de notre collègue. Ici, c'est une notice sur l'institution des ouvriers monnoyeurs du saint-empire romain & de leurs parlements ; plus loin, Chaponnière traite de l'état matériel de Genève pendant la seconde moitié du quinzième siècle ; ou bien il publie ce journal du syndic Balard sur les événements



qui se passèrent à Genève de 1525 à 1531, preuve historique à laquelle Chaponnière accordoit, non sans raison, un intérêt particulier pour l'histoire de notre pays. Personne n'a mieux qualité que vous, Messieurs, pour apprécier ce qu'il a fallu d'efforts soutenus, de patience, en même temps que de sagacité, pour arriver à dérober au passé un document pareil, & à mettre un manuscrit en quelque sorte indéchiffrable, incorrect & souvent incomplet, en état de subir la publicité. Nous avons entendu Chaponnière lui-même se plaindre d'un si rude labeur.

Les différents travaux que nous venons d'énumérer ont été tour à tour livrés à l'impression, chacun de vous peut en estimer la portée & la valeur; mais il en est d'autres dans l'œuvre de l'historien, que la Providence n'avoit pas destinés à voir le jour du vivant de leur laborieux auteur, & qui n'en resteront pas moins comme un glorieux monument à sa mémoire. Parmi un nombre très-considérable de matériaux, nous citerons en premier lieu un dépouil-



lement complet des registres latins du chapitre de Genève, puis un mémoire sur la taxe de guerre imposée à notre ville à la suite des défaites de Granson & de Morat, laquelle taxe a permis de déduire un relevé approximatif de la fortune publique d'alors.

Ici, nous touchons à ces événements immenses qui signalèrent le seizième siècle, période d'abord pleine d'angoisse qui précéda l'époque d'affranchissement, où l'indépendance de Genève, une fois assurée, fixa sa position dans le monde & créa devant la postérité son existence & son renom. Une période semblable dut attirer l'attention de Chaponnière. Parmi les figures qui marquèrent leur place dans ces temps de luttes, il n'en est aucune plus originale que celle du prieur de Saint-Victor ; aussi le célèbre prisonnier de Chillon devint-il pour notre collègue, on peut le dire, l'objet des travaux de toute sa vie. Chaponnière a donné dans les Mémoires de la Société une notice sur François Bonivard, où il s'efforce de



*juger l'homme du seizième siècle plutôt au point de vue privé & politique, notice à laquelle se rattache logiquement la publication de l'Ancienne & nouvelle police de Genève. Mais il restoit un côté sous lequel Bonivard, moins connu, méritoit de vivre : comme écrivain de premier ordre, historien chroniqueur, moraliste satirique & philosophe. Rompre le silence injuste gardé à cet égard vis-à-vis de Bonivard depuis trois siècles, fut la tâche longue, minutieuse & difficile qu'entreprit Chaponnière ; elle étoit digne de lui & assurera à son nom, nous ne craignons pas de le dire, une durée égale à celle des écrits qu'il aura transmis à la postérité.*

*Déjà, Messieurs, vous daignâtes, il y a quelques années, agréer la dédicace des Advis & Devis d'idolâtrie & des Difformes Réformateurs mis en lumière ; ce n'est là qu'une faible partie de l'œuvre totale. Les autres opuscules de Bonivard, son Traité de la noblesse, celui des Langues, ses Advis & Devis, comme il*



les a intitulés lui-même, sont désormais donnés à la publicité, & les Chroniques, ce document sur lequel devront s'appuyer tous les écrivains qui traitent de l'histoire de Genève, remises en ordre & rendues à la forme qui leur convient, n'attendent qu'une main dévouée pour être livrées à l'impression.

Tels ont été les travaux les plus importants de notre collègue : fruits d'une érudition vaste, d'une persévérance à toute épreuve, ils firent du docteur Chaponnière ce savant réservé, modeste, consciencieux à l'excès, qui auroit désiré pouvoir reconstruire l'édifice du passé sans qu'il y manquât une seule pierre, laissant en cela un rare exemple à suivre & un modèle à proposer surtout aux jeunes gens. Au temps de l'épreuve, comme durant la maladie, jamais notre Société ne lui demeura étrangère, & il y a peu d'années il présidoit encore nos séances. Hélas ! nous ne le reverrons plus s'asseoir à nos côtés, celui dont l'apparence étoit si douce, l'abord toujours gracieux & facile. Ser-



rons nos rangs, Messieurs, serrons de plus en plus ces rangs où la mort fait de si larges trouées, bien que je craigne que, malgré nos efforts, les places occupées par ces deux collaborateurs, Mallet & Chaponnière, ne demeurent à jamais vacantes.

GVSTAVE REVILLIOD.







## ADVIS ET DEVIS DES LENGVES.

\* \*

**D**VISQVE nous hauons traicte du mençonge, seroit expedient de faire le semblable de l'instrument dicelle, que la pluspart des vsantz dicelle, que sont les homes, appellent langue. Combien que non seulement elle est instrument de mençonge, mais aussy de son opposite, quest verite ; lesquelles toutes sont conceues en la pensee, qui pour se communiquer entre les homes les enuoie a la langue, que en cela sert de messagere ou ambassaderesse ; pourquoy tel prouerbe couroit iadis entre les Grecs : Γλωσσα ποι πορεον ; την πολιν ορθιωτουσα, και πολιν καταΦεροῦσα ; id est :

*Langue ou vais-tu ? marches-tu pour construire  
Vne cite, ou icelle destruire ?*

Et pourtant lha formee nature ployable pour seruir a touz endroictz, ascauoir au vray & au faux, au bien & au mal. Ce que bien cogneut Esope, auquel haiant commande Xanthus, son maistre, quil luy allast acheter la meilleure viande du monde, il luy achatta vne langue ; apres, quil luy achattast la pire, il fit le semblable, demonstrent

A.



quil ni hauoit meilleure chose fus terre que la langue humaine bien semploiante; pire, que celle que en mal sexerceroit.

Car Dieu haïant donne a lhome rayson & intelligence & voulente, par lesquelles il est different es autres animaux, & par telle difference les excelle, & les excellent, leur domine, ne se contenta pas que lespece humaine precedast en rayson touz autres animaux, mais voulut encor que ce fust en demonstrence dicelle pour la se communiquer lun a lautre par le moien de la parolle de la langue procreee. Car touz autres animaux hont bien voix chascune selon son espece; le beuf mugit, le cheual hinne, le chien abbaie, & ainsy de toutes bestes, que nest que simple voix, mais lhomme ha parolle, que se peut diffinir ou limiter, vne voix membree ou articulee, que se deschiquette en plusieurs pieces, & par ce moien despeffe, se rendante desliee par ces instrumentz ou elle passe & sextamine: le poulmon, les costes, les muscles, lartere, le palaix, le gousier, la langue, les dentz, les leures & lhaleine, desquelz les bestes nhont que deux, asçauoir le poulmon & la langue, & encores la pluspart ne se sert que du poulmon sans emploier sa langue a former sa voix. Et ce ha faict le bon Dieu aux homes, quil a creez animaux de compaignie, affin que, multipliez, ils se communiquissent par vn tel instrument leurz pensees lun a lautre & se incitissent mutuellement a leur deuoir, que consiste en deux choses que luy mesme ha enseignees, voire grauees aux cueurz de touz



homes, deuant que les donner par escrit en deux tables a Moyse, quest que daymer Dieu fus toutes choses, voire plus que soy mesme, & son prouchain come soy mesme, ce que se faict par le moien de la langue; & pour tant, dict Viues en son Traicte de la corruption & correction des Disciplines, que la langue & les loix sont lentretenement dhumaine compaignie quant lon en vse deuement, mais quant lon en abuse, il ni ha au monde pire chose, ainsy que nous auons dict que bien monstra Esope, ce que hont veu & demonstre touz anciens philosophes, tant fideles come payens, car Dauid nha il pas dict en son xl<sup>e</sup> pseaume: « Metz garde, Seigneur, en ma bouche, & en mes leures mesure de circumstance. » Salomon aussy, son fils, ne dict il pas au xvij<sup>e</sup> de ses prouerbes: « La vie & la mort sont en la main de la langue. » Du commun prouerbe, courant iadis a ce propos entre les gentilz, nous hauons parle cy deuant. Erasme ha faict vn singulier traicte de la langue. Si nous ha Dieu donne ce instrument quant & rayson, come messager dicelle, & come il ha donne le franc arbitre de vser & abuser de rayson, aussi ha il, de la langue.

Mais maintenant est question si la langue est seulle interprete de la pensee; fus quoy ie respondts, quelle en est interprete souueraine, mais non pas seulle, car il y ha dautres membres a ce seruantz. Les mains parlent, les doitz, les yeux, la teste, les piedz, & touz autres membres interpretent & signiffient la conception de la pensee,



& se peuuent toutes significacions dicelle; mais les vnes seruent a l'instrument des yeux; le parler, des oreilles; car (selon Diomedes grammairien): *Loqui, est articulata voce signum dare.* « Parler, est donner signe par voix membre, » combien que encore lon parle avec la main, quest en escriuant. Toutes autres marques de la pensee sappellent simples signes ou significacions, come celluy que fit le roy Tarquin de Rome a vn messager de son fils, qui par abstuce hauoit faict que les anciens ennemis de son pere se soient a luy soubz-mis, si nousa pas escrire a son dict pere, par crainte que les lettres ne fussent surprises, mais luy manda par la bouche du messager qui luy estoit fidele, quil luy signifiait come il vouloit quil se y gouuernast. Le messager exposa au roy sa charge en vn iardin ou il le treua pourmenant avec vne gaule en sa main; mais le roy, non soustant en luy fier, ne luy fit aucune responce de bouche, ains seulement abattoit avec sa gaule la teste de certains pauors qui estoient aupres de luy. Le messager, haient attendu vne piece de temps sans autre responce, sen retourna & fit du tout rapport a son maistre, qui conceut par le signe des testes de pauors abattues, que son pere vouloit quil fist mourir les testes & chefs de la ville, affin de rendre le peuple a luy plus obeissant & subiect, ce quil fit & vint au but de son dessein. Tarquin en ce endroit ne sonna moict avec la langue, mais sa main seruit bien a lenonciation de son vouloir sans cela. Rabellais introduit Panurge disputant avec les



maines. Sourdtz & muetz ne peuuent entendre les conceptions des esperitz dautrui, ni faire entendre les leurz, sinon avec les mains.

Or (come nous hauons dict) Dieu a doue l'homme sus les autres animaux, non seulement pour les rendre raysonnables, mais en pouoir de se communiquer rayson lun a lautre, mais ce bien a nous faict nha encor souffi a nostre dict bon Pere, voiant que la parolle ne se pouoit bonnement a touz, voire a plusieurs homes pour les entretenir en compaignie & amitie compaignable; & la rayson: La parolle est enoncee par le seul instrument de la langue, dechiquettante la voix en plusieurs membres, come nous hauons dict; laquelle voix ne se peut entendre gueres loin entendiblement, ni encores sans estre entendue pour aussy a grandt paine, peut entretenir vne compaignie œcunomique, *id est* mesnagere; ie me tays par toute vne cite, si elle n'est pour ce assemblee, quest vne chose malaysee, au moins a touz propoz; come se fera ce par tout vn pays, come par luniuers? Et ce pour ampreux. Segondement, quand elle seroit bien, moiennement des oreilles, par tout le monde recueillie, les homes meurent lun apres lautre, & est bien rare que vn home viue vn siecle, quest de 100. ans, sinon que ce fussent Adam & sa posterite & Noe & la sienne, mais encores sont ilz mortz, qui entretindrent en compaignie leurz enfantz moiennant loix quilz leurz donnerent par linstrument de la langue, pour, dict Viues a bon droict, que la langue & iustice sont l'entretene-



ment de compagnie humaine; mais de quoy eut serui cela, sans autre instrument que celluy de la langue? Vray est que plusieurs choses sont venues en lumiere a ceux qui hont vse des leures, par memoire donnee de pere a fils, de main en main, daage en aage; susquoy les Hebrieux hont fourge leur caballe. Et veullent aucuns dire que Moyse ha de ce espuysee son histoire, mais ilz faillent, ou il faut que Iosephe mente, qui dict, que lhistoire de la creation du monde fut grauee en ij colonnes, lune de pierre, lautre de brique. Si quil faut penser que quant que Dieu donna a lhome lusage de la langue, il luy donna aussy lusage de se servir de la main come de la langue, moien escripture, come bien ha monstre Postel. Si quil faut dire que quant & le premier language (qui par la confession de touz fut lHebrieu) fut donne lusage de lescriiture, & dura tousiours cependant que le language Hebrieu seul estoit a touz homes commun, & que en icelluy hont este escriptes loix & histoires, desquelles Moyse par le commendement de Dieu ha espuyse les siennes, come vn autre singulier benefice par Dieu donne aux homes, par lequel ilz se pouuoient communiquer leurz pensees mutuellement, non seulement viuantz loin lun de lautre, de lieu, mais de temps, parlantz les mortz a leurz posterieurz, car Platon, Aristote, Ciceron & tant dautres excellentz personages qui sont trespassez, tant de siecles y ha, parlent a nous bec a bec, maintenant nous communiquantz leurz sciences; le semblable nous font les historiogra-



phes & generalmente la plus grande partie des fauantz, tant en lettres sacrees que prophanes.

Or est cecy vn singulier benefice par Dieu confere a lhumain lignage, non gueres moindre que la rayson, a cause que, sans la monstre que se font dicelles les indiuz lun a lautre par ces instrumentz, elle ne seruiroit que a vn seul indiuis, rien a lespece. Et ne sest encor Dieu contente de ces bienfaictz, car par cy deuant nous ne pouuions iouir de benefice de lescritture sans lachatter bien chèrement, car y falloit aux homes employer beaucoup de temps ou dargent, ou touz deux ensemble pour escrire vn chascun a par soy ou faire escrire a autrui les instrumentz de sagesse, questoient les liures. Si que ie me merueille come deuant 120. ans passez se pouuoit treuver telle multitude de sçauantz; voire, come il y hauoit home qui sceust lire & escrire; les paouures par faute de biens forains, les riches par superabondance diceux. Car cest le commun vsage, que richesse ne requiert pas volentier sagesse. Toutes foys sen est treuee, mais non pas au temps a nous fort prochain, mais deuant la venue de Iesus Christ & vn peu apres, entre les Grecz principalement & les Romains, qui estendirent touz deux fort leur empire & leur language quant & cela. De lHebrieu ne faut parler, car il nestoit commun fors entre les luifz, sinon que apres la venue du Christ il ha eu cours entre les Chrestiens. Les anciens ne preferoient pas richesse a sagesse, ains nespargnoient pas richesse pour lacquerir, en laquelle richesse ilz abon-



doient plus que lon ne faiçt maintenant, aussy bien come en sagesse, come pourrez veoir au liure que Budee ha escrit : *De asse* ; tesmoin Craffus, qui nestoit roy, duc ni conte, ains seullement que vn simple bourgeois Romain, combien que non des moindres, lequel nextimoit celluy digne destre nome citoien Romain, qui ne pouuoit soudoier ordinairement vne legion de soldatz ; & nespargnoient pas richesse pour acquerir sagesse, tesmoin Ptolomee Philadelphie, roy d'Egypte, qui dreça vne bibliotheque de 70,000 pieces de liures. Aduisez combien cela deuoit couster, car quand seroit bien au temps present que limprimerie a renduz les liures a si bon marche, pour le moins vn chascun desdictz liures, lun comportant lautre, vaudroit vn escu, combien doncques deuoient ilz alors valoir ?

Ce singulier bien nous ha Dieu enuoie, ni ha pas gueres plus de 120. ans, selon aucuns par lindustrie quil donna a vn Alleman nome Han, que en alleman est autant a dire come en latin Gallus *id est* coq ; dou est prouenu lerreur que plusieurs cuident que ce soit este vn François, autres extiment que ce soit este aussy vn Alleman de Straasburg nome Hans Güttenberg, lan 1440., du temps de lempereur Friderich iij<sup>e</sup> ; mais quelz quilz soient, ilz hont faiçt autant de bien aux homes que vn autre Alleman moyne, nome Petter Schwartz, *id est* le Noir, ha de mal, qui treuua de fourger lartillerie. Car Dieu iuste iuge, mais benin pere, nous ha tousiours enuoie des afflictions pour, come iuge,  
nous

nous chastoier de nouz meffaitz; mais apres, come benin pere, il nous soulage. Car pour ce que les homes apres le deluge, au moins la plus part, s'esleuerent en tel orgueil quilz pensoient se pouuoir exempter de la puyssance & verge de Dieu, se gardantz dun autre deluge sil venoit, & pour ce firent bastir la tour de Babilonne, il ne se voulut pas venger de eux monstrant sa puissance que les exterminast, mais par sa sapience que se mocquaist de eux tant seulement par mespris, leur donnant a cognoistre quil en sçauoit bien, a eux confondant vne seule langue aux homes commune des le commencement du monde, en plusieurs & diuerses, si quilz ne sentendoient lun lautre, pour se monstrier lun a lautre ce quil leur failloit pour acomplir leur ouurage, excepte que Dieu laissa lancienne a vn Heber & a sa famille, que ha tousiours este despuys appelee Hebraïque de son nom. Si ne faut pas penser que quant & ce quilz perdirent le moien de parler, quilz ne le fissent aussy descrire, que fut vne grande playe a lhumain lignage. Car le plus souuent la difference des langues cause la difference des volonteiz, & (quest le pire) que les langues ne sont seulement este changees selon la diuersite des lieux, mais selon celles des temps, car vous vous trompez si pensez que les languages, qui furent esparz ça & la apres la confusion Babilonique, soient demeurez chascun en son pays iusques maintenant. Extimez vous que les Egyptiens, les Indiens, les Affricains, les Perses & autres, tant Leuantins que Meridionaux, parlent



du langage quilz faisoient tant seulement deuant la venue du Christ? Et nous autres Europiens le faisons nous aussy?

Le langage Gauloys nestoit gueres different du Thodesque; lesquelz Thodesques pour ce furent appelez Germainz, *id est*, freres, pour ce que, en langage, meurz & façons de faire, ilz ressembloient es Gauloys, come filz fussent este freres, tesmoins Cæsar en ses Commentaires, iacoit quilz fussent encor entre eux differentz en langage, mode de viure, regime & semblable. Ilz furent subiuguez premierement par les Romains, qui les contraignirent a apprendre leur langue questoit la Latine, combien quilz la parlissent mal proprement, come nous dirons en son lieu. Apres cela les François orientaux, les Bourguignonz & autres nations aquilonaires, sortantz de leurz pays, sespandirent par les prouinces Romaines & les occuperent, &, entre les autres, les François orientaux & les Bourguignonz. Sus la gauche, les François passerent la riuere de Loyre, ou ilz se annicherent, & du nom de leur ancien pays appellerent cette region, France. Les Bourguignons fanicherent autour de la Saone, par Latins appelee Sequana, pour quoy estoient nommez anciennement Sequani, & despuys furent nomez Bourguignonz, qui par succession de temps sestendirent au long du Rhosne, despuys le lac de Geneue, occupantz les Allobroges dictz maintenant Sauoyfiens & vne part du Dauphine iusques en Arles, pourquoy iadis se nommoit le royaume de Bourguoigne

le royaume d'Arles. Despuis ilz se sont retirez. Ceux cy estoient trestouz de nation & langue Germanique, pourquoy estantz en Gaule corrompirent & furent corrompuz. Car eux corrompirent la langue Gauloyse, qui approuchoit moins de la Latine, & les Gauloys la leur naifue; en sorte que nul des Françoysz orientaux sçauroit a grandt paine entendre certains verz d'une chanson que disoient les anciens soldatz Françoysz habitantz en Gaule, se ventantz des victoires quilz hauoient continuellement contre les Romains, alleguee par Bibliander & Stumpf ainly :

*Sy findt wir sonnenkûn  
Als die Römer selber;  
Nun darf man auch reden  
Thas Kriech nit widersprächent;  
Züm waffen snelle  
Sindt die Helden alle.*

Lequel language ne sçauroient entendre les Françoysz modernes, ni orientaux ni occidentaux, ni encore autres Allemans. Stumpf aussy en ses Chroniques des Heluetiens allegue vn paternostre escrit en Alleman du temps de Charlemaine que peu d'Allemans de notre temps sçauroient entendre, fors en deuinant.

De ce declairer en Gauloys nest pas necessaire, car il ni ha pas sentence que puisse seruir fors a la diuersite du language ancien & du moderne; car la langue Gauloyse ha este diuerse non seulement selon les tempz, mais selon les lieux, come aussy tesmoigne Cæsar disant: Les Gauloysz sont differentz entre eux de language, meurs & con-



ditions. Les Massiliens, qui estoient descenduz des Phocéens & Grecz, parloient de langue Grecque; ce que a faict a beaucoup extimer que touz Gauloyz parloient de langue Grecque ou prochaine a la Grecque, quoy conferme le dict de Cæsar en ses Commentaires, quest que apres la deffaicte quil fit des Heluetiens ou Heluetteriens, il treuua en leurz coffres les nomz & sournomz de dessus nommez qui estoient escritz en lettres Grecques; mais ceste rayson nest pas souffisante preuue pour monstrier que les anciens Gauloyz parloient de langue Grecque, car si cela estoit sensuyuroit que touz ceux qui escriuent en lettres Latines fussent Latins, & toutesfoys nen y a pas vn, car non seulement les Italiens & Espaignolz, qui hont langue prochaine a la Latine, escriuent en lettres Latines, mais les Françoyz qui en sont fort loingtains & les Allemans qui le sont extremement. Iohan le Maire a dict que cestoit le Breton armorique, que lon appelle maintenant le Breton bretonnant, a quoy me faict adiouter foy vn Pausanias, ancien authœur Grec, qui dict en son Euboïque que les Gallo-Grecz qui, apres la deffaicte de Brennus par Furius Camillus, sestoient retirez, ce peu qui peut eschapper, en vn coin de Grece que de nom mesle ilz appellerent Gallo-Grec, hauoient aussy vocables meslez de Gauloyz & Grec. Si estoit nome vn cheual en Gauloyz, que nestoit pas fort estrange a lAlleman, *ein marck*; & encor de present les Allemans appellent, non pas vn cheual, mais vne iument, sa femelle, *eine marche*, & les cheuallierz

du nombre des cheuaux quilz entretenoient, celluy qui nauoit que vn cheual sappelloit *marshos* simplement, celluy qui deux, *dumarkos*, celluy qui troiz, *Δρυμαρκος και τα λοιπα*, de quoy ne ferai plus ample mention, car ien ai asses parle en mes degrez de noblesse.

Stumpf en son Heluetie & en sa Gaule dict que les , au nombre desquelz estoient pour lors les Heluetiens ou Heluetteriens, que maintenant lon appelle les Souyffes, parloient non pas de langue Germanique, mais dune non beaucoup a icelle differente & proprement celle que font de present les Flamentz ou baz Allemans, & preuue cela par vocable dun office souuerain entre les Heduoiz, dictz maintenant ceux dAustun, quest *vergobretus*, que Cæsar allegue en ses Commentaires, quest vn nom composé de *vercker*, que signifie depescheur, & *obert*, que signifie aussy souuerain en bas Alleman, car les hautz lappeloient *obrest*, & est autant a dire comme lexarche, souuerain, depescheur souuerain; & sus beaucoup dautres vocables, lesquelz Cæsar ha corrompuz, par faute de tendre leur language. Mais Cæsar mesme accorde en ses dictz Commentaires la difference des auteurs modernes, touchant lancien language Gaulois, disant que lesdictz Gaulois estoient entre eux moult differentz en language, meurs & police. Pourquoy faur penser que les Gaulois qui abbutissoient a la Germanie se conformoient a la langue Germanique; ceux qui aux Massiliens, qui estantz fortiz des Grecz Phocenses, vsoient encore de la



Grecque; ceux qui a la Bretagne, de la Britannique; combien que touz en general vlassent de lettres Grecques, tesmoin ledict Cæsar, qui dict en ses Commentaires que les Heluetiens ou les Helueterz hauoient escritz nom par nom ceux qui estoient sortiz de leur pays, en lettres Grecques.

Des Italiens ne faut douter quilz nussent de la langue citoïenne de Rome, leur cite principale, combien que non encor du commencement capitale, combien quil y eust encore quelque difference selon la diuersite des regions come ha partout, mais non pas telle quilz ne sentendissent lun lautre. Et se monstre par la mocquerie que Tibere Cæsar (selon Suetone) faisoit du langage de Tite Liue, quil disoit sentir son Padouan. De la langue Espaignolle ie ne sçay que dire, car elle est plus conforme a la Latine que la Françoisse, mais non pas encore tant quest Italienne. Si ne croy pas toutesfoys quelle soit ainsy este des tout temps. La Germanique ha bien receu quelque mutation, mais non pas la nouuelle si diuerse de lancienne, que les nouueaux de quelque bon iugement, silz luy adiouxtent diligence, ne puissent entendre les anciens, come nous hauons cy deuant declaire des anciens Franconiens.

Bref, ie ne croy que langue soit demeuree en son entier, ie ne dy pas despuis le commencement de la mutation faicte en Babilone, mais despuis la venue du Christ. Si ne se treuve que la trace d'aucune soit demeuree en aucun pays. Vray est quil en y ha eu iij principales, que sont demeurees

iufques a present, que font l'Hebraïque, la Grecque & la Latine, mais non pas chascune en son pays, car l'Hebraïque auoit son siege en Iudee, la Grecque en Grece & la Latine a Rome & par toute l'Italie, que ne font encores demeurees chascune en sa purite & entierete. L'Hebraïque fut la premiere du monde a touz homes commune, que fut confuse & dissipée par lorgueil du Nimbroth entre touz autres homes, excepte Heber & sa famille, mais non pas encor en sorte que par succession de temps elle ne se corrompist, si que saint Hieronime sus Esdras entendoit a grandt paine les liures de Moyse, pour le changement de la langue despuis le temps dudit Moyse au leur, quesmeut ledict Esdras a reformer la langue Hebraïque, accordant l'ancienne a la nouuelle, tellement que toutes deux fussent entendues par gentz de son temps & leur posterite. La langue Grecque aussy,questoit partie en V parties, nha este sans changement & mutation, car *παράδυσος* voulant autant a dire entre les fort anciens Grecz que iardin, despuis iufques a present il se nome *κῆπος*, & plusieurs autres, come bien exemplifie Bibliander en son Liure des Langues.

La Latine ha aussy souuent receu des mutations, ie ne di pas seulement despuis la defloration de l'empire Romain, mais longtemps deuant, despuis la fondation de Rome, durant que ladicte cite estoit en accroissance; car du temps de Scipion, par la poesie d'Ennius, son contemporain, s'appert quelle estoit fort rude & inciuile, come extimerent



ceux qui apres la rabotterent, come Ciceron & autres. Touttesfois par les choses en elle contenues, questoient les gestes des anciens Romains excellents despuis Rome fondee iusques a son temps, luy donnerent nonobstant credict & autorite. Et pourtant se raconte en la vie de Virgile, que luy lisant la poesie dudit Ennius, interrogue quil faisoit, respondit : « le cuillie fleurs dedans fien. » En ce temps lon appelloit la lie du vin *floccos*, que maintenant sappelle *fex vini*, come tesmoigne Aule Gellie en ses Nuietz Athenoises, ou dauantage il raconte vne reprehension de Cathon a vn glorieux iouuenceau qui, pour se monstrier bien en langage, pindarisoit en ancien langage, sonnant *floccos* & semblables ; quoy ouiant Cathon, il luy dit : « Mon ami, vis come les anciens & parle come les modernes. »

Desdictz trois languages, le premier questoit Ihebraïque, ne se communiquoit pas a autres gentz, que de sa nation & relligion, questoient les Iuifz, ains demeura tousiours entre les Iuifs en Iudee, ou en autres nations ou ilz estoient disperz, par lenuie desquelz ilz estoient contaminez. Car combien quilz fussent presques partout, excepte en Iudee, come aduenaires, non citiens ou paysans, ilz vouloient tousiours estre separez des autres, come filz fussent indignes de receuoir de eux aucune doctrine, nonobstant que les autres fussent leurz superieurz & seigneurz ; qui ne se soucioient encores de cela, car ilz ne se faisoient que mocquer de leur relligion & doctrine. Les autres deux s'elargirent

largirent par tout le monde, par la science en partie, en partie par la puissance des suppostz de toutes deux; car les Grecz des leur commencement, deuant que les Romains sauuañassent en seigneurie, fleurissoient en deux choses entre les hommes plus estimees, questoit lexercice des lettres & celluy des armes.

Exercice des lettres estoit plus continue en Athenes quen autre lieu; celluy des armes, en Lacedemone; car Athenes estoit vne vniuersite par tout le monde celebre, come est maintenant celle de Paris, & y accouroit on de toutes partz pour y apprendre lettres & bones meurz, que la fleurissoient, come pourrez veoir par lepistre auant-marchante au traicte, que Cicero hauoit escrite, de Office ou deuoir, a son fils qui la estudioit. En Lacedemone regnoit lexercice des armes; toutesfois le language grec ne sestendit pas par lexercice des armes lacedemoniques hors de leur pays, car nul Grec conquist ailleurs, sinon Alexandre le Grandt, duquel le regne & la vie furent courtz, pourquoy neurent les regions par luy subiuguees loysir dapprendre son language, car chascune dicelles retourna en son premier estat de meurz, language, loix & coustumes; pourquoy namplia pas lusage de la langue grecque la puissance des habitantz dicelle region, mais leur science, pour laquelle comprendre chascun sestudioit a entendre & parler de leur langue; & nestoit pas trop commune a touz ceux dune autre region, mais propre a aucuns particulierz de gentil esprit, come ha maintenant

B.



cours le latin par toute l'Europe. De ce nous ha-  
uons la preue par ceux qui hont escritte la vie  
de Ptolomee Philadelphe, roy d'Egypte, qui hauoit  
drece telle librerie, come nous hauons dict cy de-  
uant, lequel (iaçoit quil fust Egyptien) hauoit la  
lengue grecque, & pourtant fit traduire dhebrieu  
en grec les liures de la Sainte Escriture par lxxij  
interpretes hebrieux, scauantz es deux langues.  
Des apostres & singulierement des euangelistes,  
iaçoit quilz fussent de nation & langue hebraïque,  
ilz ne voulurent pas escrire l'Euangile ni leurz en-  
seignementz en hebrieu, pour ce que ce langage  
nestoit commun, mais en grec, qui leur hauoit este  
enseigne par le S. Esprit, pour ce que ledict grec  
hauoit cours par l'univers; excepte S. Matthieu,  
qui escriuit en son langage.

La cause de lampliation de la langue latine, ha  
este lampliation de la puissance & empire de ses  
suppostz, questoient les Romains, car ce pendant  
que leur empire ne franchissoit pas les limites &  
bornes de l'Italie, aussy ne faisoit leur langage;  
ce que ne fut pas en Orient, a cause que le grec  
estoit commun, presques a toutes gentz destouffe  
de ceste region, & aussy lestoit aux Romains. Mais  
quant ilz passerent d'Orient en Occident, deça les  
montz, ilz ne treuerent langage quilz sceussent  
entendre, car deuant ilz hauoient peu de traffique  
ensemble, & estoient aussy incogneues deça les  
montz les langues grecque ni latine; questoit a  
touz deux vne fascheuse chose, a scauoir & aux  
vainqueurz & aux vaincuz, de non se entre enten-

dre en leurz affaires politiques; ce quesmeut a en-  
uoier par leurz prouinces guaignees des precep-  
teurs sçauantz en langue latine, non seulement  
par pratique, mais par theorique, pour enseigner  
leurz subiectz, non seulement a parler latin con-  
gruement, mais eloquemment, par la lecture quilz  
leur faisoient en grammaire & en rhetorique. Ce  
que ne sçay si ce fut vne grace faicte par Dieu es  
dictes nations, ou vne punition, car en la Sainte  
Escriture se treuve en aucuns passages, quil le fai-  
soit es vns par benediction, es autres par male-  
diction. Il en vfa en benediction enuers ses apo-  
stres, leur enuoiant le S. Esperit qui leur donna le  
benefice des langues, & en autre passage il me-  
naça les iuifs de les soubzmettre a gentz desquelz  
ilz nentendroient point le language; ce quil fit es  
citramontains, leur faisant toutesfoys le bien de  
les leur faire enseigner par les instrumentz a ce  
duisantz, que sont grammaire, rhetorique & dia-  
lectique, si quil se treuve come Lactance Firmien  
fut enuoie a Lion pour illec enseigner rhetorique.

Mais cest vne chose si malaysee que gentz de  
diuerse nation apprennent naifusement la langue  
lun de lautre, que ie tiens quasi pour impossible,  
quant il ni hauroit grande difference. Regardez  
come le gaulois, qui nestoit gueres dissemblable a  
lalleman, se pouuoit conformer au latin. Auffy  
lon disoit que Solon, qui estoit Athenien, barba-  
risoit entre les Scythes, maintenant nomez les Tar-  
tares, & Anacharsis Scythe entre les Grecz, qui  
sçauoient touz deux le language lun de lautre.



Car il y ha deux vices qui se treuvent en touz languages, que sont solœcisme & barbarisme. Solœcisme se comect en ladiancement ou lyaison dun propos entier que Latins appellent *orationem*, quilz appellent aussy construction, come quant lon mect le masculin pour le feminin & par contraire, & ce non seulement es langues anciennes, come le grec, latin, &c. Barbarisme nest que vn language entier ou mot dicelluy estrange a la langue en laquelle lon parle, ce que Perot en son *Cornucopie* diffinit ou limite ainsy : « Cest vne partie de parler corrompue, parlant avec la langue ou la plume. » Ciceron en son Traicte des nobles orateurs, parlierz ou harengueurz, declare la source de ce vice en langue latine, disant que, du temps de Scipion & Lælius, que peu de Romains voiageoient loin de Rome & pourtant nestoient obfusquez par langue estrangere, que les gardoit de parler autre langue que la leur, questoit latine.

Mais apres quilz eurent conquis diuers pays, ilz trafiquerent par iceux, non seulement par la Grece, questoit de langue quilz entendoient presque come la leur & la tenoient pure & nette come la leur, mais entre les autres quilz tenoient pour barbares, tant en leuant come en ponant, mydi & minuiet, & pourtant nadmirent pour citiens en leur langue seulement des vocables grecz, mais barbares; come de l'Espaigne, ce mot *mastruca*, quest vne sorte dacoustrement; de la Bretagne & de la Gaule *essedum* & *rhædam*, que sont deux sortes de cherriot. Ilz appelloient du language gauloys,

*geffates*, certaine sorte de soldatz quilz extimoient les plus vaillantz de celle region & estoient armez de certaine maniere de bastonz, en guerre, semblables a celles que lon appelle encor maintenant pertuisances ou langues de beuf, desquelles lon vŕe encores maintenant en Allemaigne; mais lon ne sen sert plus maintenant en temps de guerre, ouy bien en icelluy de paix; car la coustume est telle en vne chascune bone ville dillec, que quant quelquun se rendt debiteur a vn creditur & luy promet le paier dedans certain terme entre eux arreste, ledict debiteur se soubzmet au creditur a payne dhostage, lequel sappelle *gyffel* en alleman, quest quil pourra mander, passe le terme, sil nest paie, vn officier publique a pied ou a cheual, apres quil en haura aduerti son debiteur, sus telle hostellerie que luy plaira a vn florin dor *id est* escu, ou ainsy quil sera entre eux arreste, tant pour ses despens que pour ses gages, iusques ledict debiteur haie enuoie paiement audict officier, tant du principal que des despens & gages; & sont lesdicts officierz nomez *gyffelasser*, de *gyffel* que signifie ce baston, & *asser*, mangeur, ou come se dict communement: rongeur, come lon nome encor de present les sergentz en France, car ceux cy ne sont pas tenuz pour plus gentz de bien par lAllemaigne en cas de preudhomie. Lon les nome par deça *hostages* & portent vn tel baston. Stumpf, en son Heluetie & en sa Gaule, dict que de ce nom estoient iadis appelez les montaignartz de Gaule, aquilonnaires, questoient les Heluetiens ou Helue-



teriens, dictz maintenant les Suyffes, & les Allobroges nomez de present Sauoyens. Si hont aussy faict plusieurs autres auteurs allemands, alleguantz plusieurs auteurs latins aussy, tant en rime come en prose, & singulierement Polibius. Mais ilz dient que ces auteurs hont desguise ce vocable de la langue gauloyse germanisante en la leur mal proprement, come ilz hont faict plusieurs autres, desquelz nous parlerons cy apres; a l'opinion desquelz auteurs ie ne vouldroie pas du tout soubzcrire, ni aussy du tout les oppugner. Car (come eux mesmes afferment) ladicte langue gauloyse, que estoit germanisante, ha este beaucoup changee, ie ne dy pas come elle est de present que elle sest du tout reuoltee de la germanique & sest rendue a la latine, mais des lors, si que eux ni les Allemands leurz conlenguagierz nappelloient pas ces hostagierz *gyffel*, mais *geffel*.

Mais (pour retourner a nostre propos) les Romains barbarisoient aussy bien entre les estranges que les estranges entre eux; mais lesdictz Romains haiantz receu plusieurs vocables des langues estranges a eux subiectes, voulurent que leurz subiectz apprissent aussy la leur. Mais, ainsy come nous hauons cy deuant dict que cest malayse & presque impossible es homes de parler naïfvement chascun de diuerse langue en la sienne, ainsy aduenoit es Romains & a leurz subiectz, qui ne pouuoient si bien parler la langue lun de lautre quilz ne barbarisassent. Je nen veux amener preuue fors domestique, de ce que nous hauons treuue a Geneue.

Et premierement Messieurs mhont iadis communique vne Bible escriitte a la main, ce que ha este faict de nostre temps, car ientendtz que ce soit este faict par quelque prebstre, duquel ie nhai sceu le nom, combien que par auanture ie lhay cogneu, mais ilz sont touz este exilles deuant que ieusse ceste escritture. Cestuy hauoit escrit ce catalogue des euesques dicelle cite, ce quil hauoit transcrit dautres qui lhauoient faict chascun de son temps; mais le premier escriuain lha faict avec vn proesme ou auant propos, par lequel il afferme que Geneue hauoit commence hauoir euesques desia du temps des apostres, lequel estoit escrit en latin faict a la cotte si mal taillee que nul nen sçauoit venir a bout, de tant de gentz sçauantz qui estoient en nostre ville, sinon en deuinant: car il nestoit tel comme du temps de Cicéron & des autres, que la langue latine fleurissoit, ni de celluy que parlent de nostre temps les prebstres de messe de *requiem* & les commissaires faisantz leurs recognoissances, & se monstre que ce ha este escrit par doubleure de nostre temps, pour ce que il parle la deuesques que hauons veuz, nous desia barbez. Apres cela, fondant les fondementz de la mayson du secretain de mon eglise de S. Victor, affin de treuuer des pierres pour la fortiffication de la ville, fut treuue au fonds la sepulture dun euesque & le corps dedans enueloppe dhabit deuesque, qui estoit nome au catalogue des euesques enroullez, au catalogue duquel hauons parle cy deuant; & se comprenoit par icelluy, quil estoit mort plus de mille



ans y hauoit. Son epitaphe ha este escrit en carmes latins virgiliens, come verrez cy apres:

*Anseguisus eram præsul Geneuæ ciuitati.  
Sis memor ipse mei, Dominus sit que tui.*

Par quoy se peut comprendre que ce euesque se nomoit Hansgin par le langage de lors, qui estoit tel que le Flamenc maintenant qui nome vn lohan Hanss, lanot ou petit lohan, Haneguin. Si peuvent comprendre toutes gentz entendantz langue & poesie latine quel latin sçauoit le compositeur de ces verz; & ne se faut merueiller si les Latins admirent des vocables estranges en leur langue, car ce hauons nous bien faict, nous Gauloys en la nostre & speciallement les François.

Des ma ieunesse ce mot *Brafue* demouroit en Italie & estoit entre nous incogneu, despuis que lon ha frequente l'Italie lon en ha apporte la nouuellette des vocables & des accoustrementz. Touz vocables anciens d'art militaire courantz par la Gaule sont este cassez, & miz les italiens en leur place. Il y ha deux sortes de gentz de guerre, les gentz de cheual & ceux de pied, ou les homes d'armes & les pietons; maintenant la *cheuallerie*, la *fanterie*. Le chef d'une armee ou d'une bende se nomoit capitaine general ou chef d'armee ou d'une bende dicelle; maintenant le chef de l'armee se nome *coronel*, celluy d'une bende, *capo di squadra*, car bende s'appelle *squadra*, & ainzy de semblables. En quoy les François se monstrent fort dissemblables es autres nations & principalement a l'Angloise, qui nextiment autre nation que la leur, ni chose

chose bone si elle nest proueneue de leur pays, & les François extiment tellement les autres nations que la leur & ninuentent iamais rien, mais faident des choses par les autres inuentees.

Cecy estoit deuant la naissance de Christ, que les nations empruntoient quelques vocables les vnes des autres, mais ilz ne changeoient pas de language entierement; mais apres, quant la puissance & empire romain commencerent a decliner, aussy faisoit quant & eux le language, & non seulement le leur, que estoit le latin, mais celluy des prouinces a eux subiectes & peu a peu. Mais la totale ruine prouint despuis lan 400. que nations aquilonnaires enuahirent & occuperent les prouinces romaines & Rome mesme. Mutation de seigneurie engendra mutation de langues. Les François orientaux se fourrerent en la Gaule quilz appellerent de leur nom France orientale; les Bourguignons, au pays Sequanois & Aoustonnoiz, quen fut nome la Bourguoigne. Les Gotz & les Wandalles sespancherent aussy par tout, voire iusques a Rome. Et possedantz longtemps les vainqueurz les pays des vaincuz, ilz commencerent par communication apprendre les languages les vns des autres & oublier chascun le sien sans apprendre celluy de lautre naifusement. Dou souruint la corruption des langues par tout le monde & principalement en Europe, combien que en ces troiz nations, Italie, Espagne & Gaule demeurent encores quelque trace de langue latine, mais les deux premieres plus que la gauloyse, que a cause



de la conformite de meurz quelle ha auec les To-  
desques retint plusieurs de leurz vocables, come de  
*harnesch*, harnoiz, de *feuer*, feu, & plusieurs au-  
tres vocables que M. Egide Tschudi declaire en sa  
*Rhetie*.

Et des lors l'hebrieu deslogea ; le grec, de Grece ;  
& le latin, de l'Italie, leurz sieges anciens. Et n'est  
a aucune dicelle demeure propre habitation de  
cite, ville ni pays, si quelles se puissent appeller  
bourgeoises, combien que encores par les vtilitez  
en elles contenues, pour ce que en elles sont com-  
prises toutes artz & aussi d'histoires beaucoup,  
leur soit permis de errer ça & la, come les Ara-  
bes & ceux qui se nomment du petit Egypte, &  
quelles logent par les escholes des bonnes villes  
& apres par les maysons des escholierz, qui sont  
a cause dicelles en aucune reputation & en ac-  
quierent offices & benefices, iagoit que iusques a  
nostre temps lon nhait gueres vse par l'Europe que  
de la latine, & encores bien deschiree par l'outrage  
des nations barbares cy deuant nomees, en sorte  
que si les anciens suppostz dicelle viuoient, ilz la  
pourroient a grandt paine entendre.

A la fin l'Italie ha este la premiere que ha re-  
ceues les langues grecque & latine, car de l'he-  
braïque elle ne sest gueres soucie, car premiere-  
ment vn Bessarion cardinal grec, vn Philelphe, vn  
Poge, vn Marsile Ficin & plusieurs autres perso-  
nages qui hont a Florence fleuri, cent ans passez  
y ha, qui les noms hont faict cognoistre par le  
benefice de limprimerie, qui fut trouue de leur

temps. Apres eux sont venuz vn Iohan Picus, conte de la Mirandole, vn sien nepueu François & autres despuis 70. ans ença. Et apres, de nostre temps, vn Budee, vn Erasme, vn Longueul, Tonstallus & autres.

Et sus ce poinct, a lenuiron de xl ans y ha, est fouruenue la difference sus le exposition de leuangle qui ha esmeu des grandes seditions, & quant & ce vne chascune partie, pour soustenir contre lautre son opinion, a fouiller les Saintes Escritures es langues esquelles elles sont este escrites, & pour ce a apprendre lesdictes langues; a quoy fest mout aide la liberallite des princes, qui hont salariez gens sçauantz aux langues pour les enseigner. Et pour ce que la langue hebraïque est lumiere de S. Escriture, elle ha este auancee avec les autres & plus. Desquelz Mecœnas lon doit louer pour le principal le roy François. Nous hauons eu en Allemagne: Luther, Melancthon, OEcolompade, Zwingli, Suitzerus, Capito, Miconius, Buecerus, Grynæus, Sarœsius, Bibliander, Eberus, Musculus, & autres infiniz. En langue gauloyse, tant en nostre cite de Geneue, come au pays conquis par MM. de Berne: Cauuin, Wiret, Beze, S. Pol, Rubitus, Coelius Secundus, Castaleo, Enoch, les vns payfans de naissance, les autres aduenaires, & infiniz autres. Si nhont encores treuue siege lesdictes cite ni ville dou elles se puissent appeller payfans. Souffit que come hostesses elles soient entretenues des gentz particulierz, combien quelles haient encor faict ce bien aux peuples



communs, quelles hont les leurz emendeës, bien que non pas encor totalement, car ie treuve beaucoup de choses, que, pour havoïr mal entendu le latin, nouz ancestres hont nome improprement, & aussy des choses beaucoup que les Latins, pour ignorer nostre lengue ancienne, hont faict le semblable, qui sont erreurz non peu domageables tant en relligion que ciuile.

Premierement, par ce nom *miles* les Latins signifient tout genre de soldat, soit a pied, soit a cheual; & quant lon nomoit chacun a part, on appelloit les cheuallierz, *equestres*, les pietons, *pedestres*; *copia equestres*, *copia pedestres*, bendes de cheuallierz ou de gentz de cheual, bendes de gens de pied ou de pietons. Mais despuis, ce vocable *miles*, qui estoit general, ha este faict special aux seules gentz de cheual, & encor non pas a touz, mais a vne espeece diceux que les princes veullent honorer dun tel tiltre non pas de seruice precaire, mais de perpetuelle dignite, avec certaines ceremonies, come les frappantz sus lespaule du plat de leur espee, avec ces parolles: « Cheuallier de par S. George, » puis luy rebailant lespee, luy font chauffer des esperonz dorez quilz portent toute leur vie; mais ces cheuallierz sont appelez par gentz entendant bien la propriete de langue latine, *equites aurati*, cheuallierz a esperon dore, mais les ignorantz cella, les hont appelez de nom commun a touz soldatz, *milites*, & quant lon ha quelcun diceux enseveli, lon escrit dessus son tumbeau: *Hic iacet generosus Dominus miles*.

le voudroie que touz les prebstres & moynes, qui preschantz la Passion, quant vient sus ce passage : *Sed vnus militum lancea latus eius aperuit, &c.*, interpretent ce mot *miles*, en Gauloys, *cheuallier*, meussent done chascun vn escu; ien hauroie asses pour menchainer en cheuallier. Ihai veu iouer lhistoire de la Passion sur vn schaffaut plusieurs foiz; mais y failloit que la fust vn cheuallierys ernte sus vn cheual pour ce que vn naif ni eust peu monter, & estoit le cheuallier arme de toutes pieces, haïant la chaine au col, qui alloit percer avec sa lance le coste du crucifix, par lordonnance du pere reuerend qui preschoit. En mon enfance ie fus enroule avec vn autre enfant pour iouer en vne tragedie de la passion & martire de S. Blaise, ou failloit hauoir ij enfantz avec leur mere, par sa parole conuertiz a Iesus Christ, & aussy des soldatz qui le menoient au martyre; mais pour ce que lhistoire latine disoit *militēs*, lesdictz soldatz qui ne seruoient illec que de borreaux y estoient accoustrez en cheuallierz, que me faisoit alors penser que les empereurs ne se seruoient dautres borreaux que de cheuallierz.

Vne autre erreur est sus ce vocable *Dominus*, qui est plus amplie en langues communement modernes, que le latin dou il est sorti, car naifz latins ne signifioient par ce mot *Dominus*, fors le iouissant en propriete de toutes autres choses que dhomes, ou dhomes de condition seruile; nous lappellons seigneur, quest vn vocable de souuerain honneur maintenant; mais anciennement, quant



*Dominus* se nommoit pour home haïant puissance sus autres homes, cestoit autant que lappeller tyran, & pour tant lon appelloit les tyrannies de Sylla, de Cinna, de Cæsar & autres *Dominatus Syllæ, Cinnæ, &c.* Mais sus homes francz ni hauoit si grandt personage, en quelque estat, dignite ou magistrat quil fust, que lon nomast *Dominus*, *id est* seigneur<sup>bie</sup> à monsieur. Le senat Romain qui gouuernoit presque toute la terre, nestoit pas honore de tel tiltre de seigneurie, avec dautres epithetes adiectifz, desquelz nous vsons de present, appellant Excellentz, Magnifiques, Puissantz, Tres redoubtez Seigneurz, &c. iusques presque a vn senat de village; non pas estoient simplement appelez messieurz, mais tant seulement *Peres conscriptz*.

Et quant on parloit a quelque particulier, de quelque estat quil fust, voire en souuerain magistrat, on le nomoit de son nom simplement, come Cathon, Ciceron, Crassus, Cæsar, Pompee, & non pas monsieur Cathon, monsieur Ciceron, monsieur Crassus, &c.; voire es royz mesmes & encores a ceux que lon ornoit dhonneurz diuins, come Alexandre le Grandt, Herode & dautres. Et entre les Romains & toutes autres nations ces ij motz de roy & de seigneur estoient non seulement odieux, mais execrables, come sentantz leur tyrannie de cent pas a la ronde, & marcquoient l'effaict dun qui exerçoit tyrannie de ces iij nomz: Tyran, Roy & Seigneur; si que lon nomoit les cruelz excez que Sylla hauoit perpetrez en la guerre contre

Marius, *dominatum Syllæ*, la seigneurie de Sylla, qui vaut autant a dire come la tyrannie de Sylla; pourquoy Lucan raconte que Cæsar se excusa envers ses gentz darmes, du crime que on luy im-  
posoit de se vouloir faire seigneur de Rome, di-  
sant :

*Detrahimus Dominos Vrbi seruire parati.*

Nostre dessain, disoit-il, nest pas de nous emparer de la seigneurie de Rome, mais garder ceux qui hont entrepris de le faire.

Mais cest lordinaire que quant les choses se corrompent, aussy font les marques dicelles, que sont les nomz, de quoy cecy est vn exemple, car ce pendant que Rome fut en liberte, ce nom de monsieur & estat de monsieur y estoit incognu, sinon a respect des patronz a leurz esclaves, mais depuis quelle fut par Cæsar asservie, si ne print elle pas encor sa possession du premier coup; car luy mesme, combien quil eust conquiz les corpz des Romains par force, nen voulut vser, ains par clemence & douceur attirer leurz cueurz a soy. Et pour tant combien quil vlast deffaiect de roy & seigneur, se desporta du tiltre & se contenta de celluy de dictateur perpetuel, lequel office estoit bien vne royaute & seigneurie, car il hauoit bien autant de puissance; mais il se monstrois le plus doux & clement quil luy estoit possible sans debiliter son authorite & laissoit encor au senat dauthorite beaucoup, en quoy le suiuit Auguste, son nepueu. Mais apres ces deux, tyrannie print le frain aux dentz, ne voulut plus estre enmasquee de til-



tre de douce principaute, mais a face descouuerte estre nommee telle quelle estoit; si que Domitien Cæsar faisoit escrire au pied des lettres parentes quil concedoit : *Dominus & Deus noster sic fieri iussit*, nostre Seigneur & nostre Dieu veut que ainſy ſoit faiet. Despuis ce nom fut attribue aux empereurz & par ſucceſſion de temps paruint peu a peu a toutes gentz deſtousse, iusques a estre faiet a chascun; ainſy come nous lhauons declare en nostre *Aduis & deuis de noblesse*.

L'on donne auſſy couſtumierement des ſouffletz au langage Latin l'interpretant en Gauloys, ſus ce pournom de ſeconde perſone, *tu, tui vel tibi*, &c.; car lon ne luy laiſſe point de ſingulier, ains le prononce on touſiours en plurier, quant lon parle a quelque perſonage de quelque eſtousse; car ni en Latin ni en vulgar de quelque langue europieenne que ce ſoit, lon le vouſſe, ce que iadis ne ſe faiſoit es langues anciennes, a quelque grandt perſonage que ce fuſt, non pas a Dieu meſme, ce que encores on ne luy faiet, mais parlant a Dieu ou a Roy ou autre prince qui apres Dieu ſont le plus grandtz deſſus la terre, lon ne diſoit pas, come maintenant: « Syre ou Mons.<sup>r</sup>, vous plaira il, » &c., mais le tuttoit on & le nomoit on par ſon propre nom, luy diſant: « te plait il, » &c., ou quelque fois lappelloit on par le nom de ſon office: Roy, Capitaine, Conſul & autres, luy diſant, « Roy, feras tu cela, » &c.; ce que auſſy lon dict que ce faiet a l'Empereur de Thurchie, iaçoit quil ſoit le plus redoubte tyran du monde. Seulement

ment en la premiere persone, abusoient touz magistratz, qui iaoit que lun de eux soit singulier, escriuantz lettres patentes, ne sappellent pas en nom singulier, «Moi tel, gouuerneur,» &c., mais : «Nous tel, gouuerneur, » &c. Et nest pas prouenu ce erreur des maintenant, car desia du temps de lempereur Traian, quant Pline segondt, qui estoit pour luy gouuerneur en Asie, quant ledict Pline luy escriuoit, il le nomoit tousiours, *domine, id est seigneur, & le vousoit.*

Le nhai pas cecy auance pour distraier le peuple de la coustume nouuellement introduicte de honorer les gentz dimportance de telz vocables, car le peuple est maistre du langage, & fil luy est donne de Dieu par nature de le former a son appetit, aussy est il de les ordonner come bon luy semble, & faut preferer lhonestete ciuile a la seuerite grammaticale; car iaymeroie mieux bailler vn soufflet a Priscien, conuertissant le singulier au plurier pour honorer vn gros maistre, que si pour suyure le vouloir de Priscien, ie trespasse la coustume moderne, le tuttiant & le nommant sans tiltre de seigneurie, pourquoy sextimant mesprise, il me faisoit donner vn coup de baston.

Après ceste faute en ha vne autre en ce nom : *Ciuitas, id est Cite*, que nous entendons plus estroitement que la langue latine napporte, car nous nomons vne habitation dhomes fermee de murailles, de laquelle vn euesque est president en la spirituellite, a la difference des autres clostures de murailles, que sont sans euesque & pourtant se



nomment *villes*, lequel vocable se prenoit anciennement en Latin pour ce que nous appelons metairies, & se pourroient nomer les grandes : Villes, les petites : Villages. Mais les anciens ne comprenoient par le nom de Cite seulement les murailles dune habitation de multitude dhomes, mais la multitude des homes viuantz en lobeissance des loix par ladicte cite establies, que lon appelle maintenant subiectz ou vassaux, come touz les subiectz de Berne feroient nomez citoiens de Berne; touz ceux de Geneue, citoiens de Geneue & ainsy des semblables, soit cela en estat monarchique, aristocratique ou democratique; car ce moct de subiection des homes es homes estoit incognu, si que quant vn roy, prince, ou cite capitale assembloient touz les subiectz de leur ressort, ce que lon appelle maintenant tenir les Estatz, lon ne disoit pas, *rex aut ciuitas conuocauit subditos suos*, mais *ciues suos*; come bien demonstre Platon au vij<sup>e</sup> de sa *Chose publique*, que les homes deuant que se fermer de murailles sassembloient par troppeaux & estoit chascun troppeau nome Cite. Aussy Rodolphe Agricola en sa *Dialectique* limite ou diffinit ainsy cite: cest vne multitude dhomes assemblee, souffisente de soy mesme a entretenir ce que luy appartient, vni & conioinct par consentement en loix & façon de viure. Si ne treuuez point quil face illec mention des murailles, non voulant en auancer plus que Platon; aussy S. Augustin ha compose xxij liures de deux citez, lune de Dieu, quil appelle Hierusalem, lautre du Diable, quil nome Babilone.

En outre il y ha grande imperfection en la traduction de Latin en Gauloys, telle que lon faict maintenant, non seulement en tournant les nomz ou vocables simples des choses, mais les nomz des nomz ou vocables des vocables. Car, selon S. Augustin, en toutes choses sont requises iiij raysonz; la chose, le nom dicelle, la rayson de la chose, la rayson de son nom. Les choses sont deuant que les nomz, car les nomz ne sont faictz que pour signifier les choses; mais en nostre cognoissance les nomz sont deuant la cognoissance des choses, come bien demonstre Erasme: *De rerum & verborum copia*; come, par exemple, *dominus* que signifie *seigneur* est premier chose que nom; car cest vne chose marquee par vn nom demonstrent vn home haient superintendance; mais nous ne pouuons bien cognoistre les proprietiez des nomz, par lesquelz nous les nous enseignons & apprenons les vns des autres, ce que ne se peut faire sinon par le vocable de faire ou dendurer que soy faict, que se noment proprement action & passion. Car dictes simplement « le seigneur, » lauditeur ne sera pas satisfait, il attendt action ou passion, come « le seigneur faict, le seigneur dict, le seigneur se pourmeine, » &c.; par ce, se cognoistra le mot de seigneur & pour tant lappellent les Latins *verbum*, que se peut tourner *mot*. Mais noz Gauloysz deffaillent grandement en cela, car ilz ne tournent ce nom des nomz ou vocable des vocables en leur language, selon la propriete de leur dict language, mais leur souffit par quelque termination seulement le desguiser, ap-



pellantz *verbum* le verbe & non le mot, & ainſy dautres; & ne ſe peuuent entendre les nomz ſans les motz ou verbes ni les verbes ſans les nomz, car naturellement toute eſſence ſans action ou paſſion eſt hors de cognoiſſance, meſmement le moct eſſential ou ſubſtantial, queſt *ſum*, ie ſuys, qui ne reçoit point daction ni de paſſion, mais il les faiçt. Car diſant: « le ſuis liberal, » neſt autre que ie fay liberallite.

Mais ceſt aſſes dict de grammaire, car noſtre deſſain neſt pas de former vne grammaire ni autre art nouuelle ni la reformer, mais aduertir tant ſeulement le liſeur Gauloys des erreurs que ſe commettent les tradduiſant de Latin en leur langage, queſt de non transporter le Latin en Gauloys, mais tant ſeulement la forme Latine dune en autre, come ſe treuve en la tradduction de la grammaire de Donat tout par tout. Mais ie nen mettrai que le commencement queſt: *Partes orationis quot ſunt?* — *Octo.* — *Quæ?* — *Nomen, pronom, verbum, aduerbium, participium, coniunctio, præpoſitio & interiection.* Vn trucheman lepoſe ainſi: « Les parties « dorayſon combien ſont? — Huit. — Quelles? « — Nom, pronom, verbe, aduerbe, participe, con- « iunction, prepoſition & interiection. » Aduiſez quelle diffinition ou limitation entendable eſt cela. Celluy qui veut bien tourner vne matiere dun langage en autre doit bien noter les proprietes dun chaſcun deſdictz langages, autrement ce ne ſera pas interpreter, mais corrompre lun, ſans de rien aider a lautre; car vn Gauloys ignorant de langue

Latine, come pourra il mieux entendre « Les parties dorayson combien sont, » que : « *Partes orationis quot sunt?* » Premièrement il erre en la phrase (ainfy nommée par les Grecz, que ne se peut interpreter en Gauloys en vn mot, mais en faut mettre deux, que sont : *manière de parler*) en adiançant ou construisant, come dient les Latins, les moctz selon la phrase Latine, non selon la vulgaire ; car le commun language ne porte pas : « les parties dorayson combien sont, » mais : « combien sont de parties dorayson, &c. » Outre cela, le mot *oratio* en Latin n'est pas proprement rendu en Gauloys, car *oratio* en Latin signifie ij choses : priere adreçee a Dieu, & propos tenu entre les homes de quoy entendt Donat Latin & le despart en viij. Pourquoy ne deuroit pas cestuy dire : « Combien y ha il de parties dorayson ? » mais : « Combien sont de parties de propos ? » Dauantage deuoit ce trucheman nomer les parties dudiçt propos selon le commun language : nom,ournom (non pronom), mot (non verbe), commot (non aduerbe), &c. Ce cy que ha faict M. Henry de Glaris, traduisant le Donat de Latin en Alleman, mais il ne lha pas faict selon la phrase du language auquel, mais duquel, *id est* du Latin ; car il lha tourne de mot pour le donner a entendre es enfantz, esquelz seulz il escrit, mais il ne desguise pas les motz Latins sans les changer, come hont iusques a present faict les Gauloiz, pour ce quil nha peu a cause de la grande difference quest entre le Latin & lAlleman ; car la cause que ha faict ainfy im-



proprement traduire les Gauloiz le Latin en leur language, ha este la consanguinite de leur language au dessus dict, faizantz come les enfantz que on veut deslacter aupres du tetin de leur mere ou de leur nourrice, ce que se faict malaysement, car la prochainete quilz hont au tectin leur haient donne des tout temps nourriture, les destourne de appeter la viande solide & retourne tousiours a la leur accoustumee. Ainsy font les Gauloyz, car pource que leur langue ha quelque prochainete a la Latine, combien que non encores telle que l'Espaignole & l'Italienne, ilz ne se trauaillent guerres a cercher les vocables de leur langue correspondantz aux Latins, ains en fourgent des nouveaux du Latin empruntez, ce que ne peut faire Glarien ni autres Allemans par les raysons ci dessus amenees.

Pourquoy faut dire que la langue Allemanne est vne riche langue, & ouse dire que non seulement elle s'esgalle au Latin, ains encor au Grec, & principalement en la grace de vocables ioinctz ou composez, ce que nhont non seulement les Gauloiz, mais les Latins, car y faict que les Latins empruntent des Grecz presques touz les noms de leurs figures, ce que ne font Allemans, ains exposent tout en leur propre language, qui est a ce souffisant, si que Fuchssperger ha compose vne dialectique en Alleman sans rien emprunter du Latin, ce que nha faict Pierre de la Ramee, qui en ha aussy faict vne en François.

Ces motz des motz sappellent par les dialecti-

ciens en diuerse sorte. Les vns les noment de seconde intention, pour ce quilz noment signifffiez, ce que vient en la premiere intention de nostre entendement, come quant nous voions vn cheual, nous iugeons en la premiere intention que cest vn cheual; mais ceste premiere intention en engendre vne seconde, quest des propoz que se peuuent tenir dudiect suppost; car les voiantz differentz nous taschons a cognoistre la difference, come, par exemple, ious dire « le cheual court, » ie ne m'en merueille pas. Mais ious dire apres: « la selle du cheual, » &c., selon les articles, desguisant ce nom come Latins font par terminations. Ceste premiere intention nous en engendre vne seconde, quest de entendre la rayson que ha esmeu les homes a varier ainſy ce nom, & lon treuuer que cest vne couſtume par nature donnee; & pour ſçauoir come ce ſe faiet en ce nom & le declairer a autrui, faudra treuuer dautres nomz, que ſont: le nominatif, le genitif, &c., dou prouiendra vne grammaire que lon diuifera en pluſieurz parties: le nom, le pournom, &c., & ſappellent cela prendre materiallement ou ſigniffiamment par aucuns motz de premiere ou seconde intention, par aucuns termes, par aucuns lieux communs dou ſe forment touz argumentz, que ſont la matiere de dialectique, *id eſt* de diſputation, par le moien de deux instrumentz que ſont le nom & le verbe dict *mot*. Leſquelz deux ſeux Ariſtote, en ſon *Περὶ Ἑρμηνείας*, *id eſt* d'Interpretation, veut ſouffire a



toutte interpretation ; mais les gramerians en hont adiouxte vj autres, combien quilz ne soient que coadiuteurz de ces deux, come leurz seruiteurz, & de ce se peuuent aussi bien former regles non seulement en Gauloys, mais en touz autres languages modernes ; car, come bien dict Bibliander (*De Linguis*): « Touz languages, tant barbares soient ilz, sont capables de regles & arts. » Mais iusques a nostre temps ne sest treuue qui y voulust trauailler, excepte ceux que ihay cy deuant nomez.

Aussy, peu de gentz se treuuent ni se sont treuuez par le passe, parler proprement autre langue que la leur naïfue, car les Latins, seffaient a former la langue de nous autres citramontains en la leur, hont donne autant de souffletz a nostre Priscien que nous hauons au leur ; come hont bien anote plusieurs autheurz Allemans de nostre temps, come vn Beatus Rhenanus, Henricus Glareanus & autres, singulierement M. Iohan Stumpf, disant que Cæsar & touz autres historiographes Latins, descriuantz de ceux que nous appellons maintenant les Souyffes ou les alliez, les hont appelez les *Heluetiens*, en quoy ilz hont erre. Aussi bien les Françoisz font, les nomantz *Souyffes*, ou ilz le deuroient faire selon leur langue paysane *Schwitzer* ; aussi les Latins les hont appelez *Heluetios*, ou ilz le deuoient *Helueteros*, come ilz se nomoient en leur langue paysane de alors, haïant cecy espuyse des autres scauantz de Germanie, qui se sont pris garde sur les fautes que Latins hont faictes sus les nomz de leur language. Car iäçoit quilz confessent  
que

que ledict language a este change, si ne veulent ilz admettre quil ne retienne beaucoup de traces de lancien, & combien que lesdictz Helueteriens fussent lors annobrez en la nation Gauloyse, si nestoit pas, ce nonobstant, fort differant au Germanique leur voyfin, come nous hauons declaire cy deuant. Or, dient ilz, que come en chrestiente peu de regions se treuent que nhaient chascune vn saint pour son patron, come la France S. Denis, la Bourgoigne S. Andre, Venise S. Marc, &c., & semblables, aussy hauoit au temps de lidolatrie chascune son idole, quilz faisoient le plus souuent de ceux qui hauoient peuple leurz payz; aussy les Gauloyz se gloriffoient destre sortiz de Dis, dict autrement Pluto, roy des enferz, *id est* des basses marches, tesmoin Cæsar qui dict: *Galli se omnes a Dite progenitos asserunt.*

Mais les anciens idolatres ne prenoient pas les enferz pour ce que nous chrestiens faisons, a scauoir le lieu par Dieu depute pour le perpetuel torment des meschantz trespassez sans emendement, mais pour vn lieu commun aux bons & aux meschantz & ce soubz terre, car ilz sappellent en Latin *infern*, quest a dire: *deffoubz habitantz*, de *infra* que veut a dire deffoubz; que lon contourne maintenant, le prenant pour la fosse quest le lieu des ames de touz ceux desquelz les corps estoient apres leur mort miz en fosse. Ledit lieu estoit parti en deux, lun de paine & torment, tousiours ardent & rempli de extreme & infime malheurte; celluy des gentz de bien, par le contraire, vn lieu plain de



playfance & volupte, toute ioye & felicite; & de touz deux ilz constituoient vn roy quilz nomoient *Dis* & *Pluto*, *id est* roy des tresors, de *πλούτος*, que veut a dire en Grec tresor & richesse, pour ce que lon dict que les tresors & richesses se treuvent soubz; & enfer en Alleman sappelle *Hel*, prouenant de ce mot *Hell* qui signifie creux, come creux de la terre. Ce Pluto, dict aussy *Dis*, *Agessilaus*, *Sunimarus*, *Sumarus*, *Orcus*, & *Vragus*, fut nome Dieu des enferz, *id est* des basses marches, par les raysonz que sensuyuent. Cham, qui fut par les Grecz nome *χρόνος*, *id est* le temps, par Latins Saturne, fut roy de toute la terre & la mer; qui despartit son royaume a iij enfantz quil hauoit eu de *Ops* sa femme, a scauoir Iuppiter, Neptune & ce Pluto. A Iuppiter il donna la haute partie deuers le soleil leuant, pourquoy apres que lidolatrie fouruint au monde, fut extime Dieu & roy des cieux; a Neptune, les isles de mer, pourquoy fut adore come Dieu de la mer; a Pluto il laissa le ponant, quest en pays bas, tel que sont les Gaules & la Germanie, & pour ce que le bas se nome *infernus* en Latin, fut adore come Dieu des enferz.

Or estoient les enferz extimez par les poetes didolatrie plus gracieux que nouz ne les faisons, come nous hauons cy deuant dict; & come nous hauons aussy dict, chascune region hauoit son Dieu particulier, quelle dreçoit de quelcun de ses royz anciens, ce que hauoient les Gauloyz faict de ce Pluto quilz nomoient du nom de son royaume, *Hell*, que veut a dire lenfer. Et entre les autres,

les montaignartz, maintenant appelez *Schweitzers*, se glorifioient tellement de luy, quilz ne le tenoient seulement pour leur Dieu, mais pour leur oncle ou cousin, car *Vetter* est en Allemand (duquel langage ilz parlent maintenant & aussy faisoient alors, iacoit quilz fussent Gauloyz, pour ce que lesdictz Gauloyz parloient de langage non different grandement au Germanique) autant come oncle ou cousin ou nepueu, car ce signifie touz iij & *hell* enfer; mettant le genitif deuant le nominatif, se voulant appeller les Gauloyz a Pluton plus prouchains, come ses nepueux; pourquoy les deuoit Cæsar nomer *Helueteros*, non *Heluetios*. Semblablement, parlant Cæsar du premier home entre lesdictz Helueters, qui les auoit esmeuz a brusler leurz villes, villages & maysonz & abandonner leur pays, pour se retirer en pays plus large & plus fructueux, pays de Gaule, il lappelle *Orgen-torix*; mais en son langage il ne s'appelloit pas ain-sy, ains *Ehrenrich*, quest autant a dire come Honorable; & aussy deuise de plusieurs autres nomz propres tant dhomes come dhabitations diceux, montaignes, riuieres, ruisseaux & semblables, que les Latins hont corrompuz, parlant diceux en leurz histoires. Car Allemans, ni autres nations nhont aussy nomz propres qui ne tirent leur signification dun appellatif, lesquels nous mettrons cy en auant, auisantz deuant le liseur quil ne se merueille si ne mettrons les significations de touz, car cest a cause que les appellatifz dont ilz sont prouenuz ne sont plus en vsage mainte-



nant, ni consequemment en memoire, mais nous mettrons en auant en Gauloys ce que Stumpff en ha dict en Alleman ainsy, en son iij<sup>e</sup> liure, chap. 59:

Plusieurz, dict il, cy deuant hont failli en la description des anciens royz de France & de Gothie. Ihay auancez plusieurs nomz sauuages & estranges & pour ce mal entendibles, & le me faudra encores faire cy apres deuant que mauancer en la description de Clodouoeus & des autres royz. Pour mieux donner a entendre & declairer & mettre en auant aux liseurz que cestoit que de ces nomz anciens, si en ferai declaration, & apres suyurai mon propos en mon histoire. Les anciens chroniqueurz Latins & Romains hont du commencement tres mal tradduitz les nomz propres de langue ancienne Allemanne & Françoysse, & tellement quilz les hont corrompuz, & ce par faute de hauoir bien entendue leur langue; pourquoy ilz hont appelle le premier roy de France qui fut chrestien, Clodouœus (Françoys modernes lappellent Clouis), lequel en ancien langage Françoysz, qui estoit vne espece dAlleman, se nomoit *Luitwig*, qui veut autant a dire come « extime des gentz, » de *leüt* qui veut a dire gent, & *wig*, poids. Semblablement la femme dicelluy qui lincita a se faire chrestien, Chlotildis, que sappelloit *Lüthild*, *id est*, « amour ou grace de gentz, » de *leüt*, gent, & *hüld*, grace ou amour. En outre ilz appellerent le roy Chilpericum, qui se nomoit *Hillfrich* ou *Hildprecht*, *id est*, « vaillant en secours; » Clotharium, qui sap-

pelloit *Lüthart*, « rude ou aspre aux gentz ; » *Clo-*  
*domirus*, celluy qui s'appelloit *Leütmeyer*, *id est*,  
« maire ou metaier des gentz. » *Beatus Rhenanus*,  
dict il, en ha faict exposition en son iij<sup>e</sup> liure de  
la *Germanie*. Car aussy *Theodorus* se nome de *Die-*  
*trich*, est vn nom de langue gotthique de lespece  
de l'Allemanne, signifiant *diuin*, car *Thiet* en Got-  
landois est Dieu, *Thirich*, diuin ; nous l'appellons  
*Theodore*. Semblablement ce nom *Theobaldus*,  
que nous appellons *Thibaut* maintenant, lestoit  
par anciens *Germain*s & *Françoys* : *Thietwallt*, de  
*Thiet*, Dieu, & *wallt*, puissance, come estant soubz  
la puissance, protection & sauuegarde de Dieu.  
Aussy *Latins* hont appelle *Theodobertus*, ce que  
les dessus nomez appelloient *Thietprecht*, de *Thiet*,  
Dieu, & *precht*, car ceste particule *precht* adioux-  
tee a vn nom le faisoit signifier vallue & extime,  
come faisoit *wig*, duquel ha este cy deuant parle.  
Et afferment ceux qui hont acquise quelque co-  
gnoissance des ancienz nomz propres de langue  
*Germanique*, que les propres nomz des anciens  
*Germain*s, fussent homes ou femmes, hont este  
imposez es persones a chascun selon sa complexion,  
ou la complexion de laquelle lon le desiroit estre,  
aussy bien come feroit des nomz *Grecs* & *Latins*.  
Et ont vse de ces nomz ces nations si desprisees &  
tenues pour estranges & barbares contrees, come  
les *Wandales*, les *Schwaubes*, les *Bourguignonz*,  
les *Herules*, les *Ruges*, les *Gothz*, les *Françoys*,  
les *Allemands* & les *Lombardtz*, ce quest prouenu  
la plus grande partie de la faute des escriuains



non entendantz l'Alleman. Car Paulus AEmilius mesme qui ha escrit en langue Latine fort elegamment, en iij liures, les gestes des Françoysz, ha mis en son liure plusieurs noms Germaniques fort improprement par ignorance de la langue de leur nation. Paulo louio aussy ha nome en son histoire plusieurs Allemans fort barbariquement selon leur langue. Les anciens chroniqueurz semblablement qui ont escrit du temps des Françoysz, Gothz ou Lombardtz, qui nestoient pas aussy grandement instruits en langue Latine, nhont pas mieux en ce besoigne. Item, les languages ne sont pas este dune mesme sorte par toute la Germanie, aussy peu come maintenant. Les Françoysz appelloient le maistre dhostel de leur roy *ein Hauffmeier*, les Schwaubes semblablement; car *meyer* en tudesque est autant a dire come le president ou le souuerain dun peuple ou dun mesnage; & encor au temps present *ein meyer*, dou est prouenu metaier, est vn metaier; dou sont venuz les nomz des royz telz que hauons dict cy dessus. Plusieurs autres nomz corrompuz raconte Stumpf illec, tant dhomes que de femmes, touz etymologiques, & a la fin en faict vn catalogue par ordre alphabetique, lesquelz aussy nous raconterons, declairantz en Gauloys letymologie daucuns.

## A

<i>Adelgerus</i> . . . . .	<i>Adelger</i> . . . . .	<i>Tout</i> .
Agaricus,	Eigenrych,	Proprietaire.
Agilomundus,	Eckmund,	Bouche de brochet.
Aneræstes, Ariouistus,	Ernst ou Ehrenuest,	Serieux, honore, puissant, preux.

Alaricus, Amalricus,	Allrych,	Tres riche.
Amalfridus,	Amalfrid,	Tres payfible.
Ariminius ou Herman- nus,	Eermann,	Home honorable.
Ardaricus,	Herdrych,	Fouaffier.
Arabarius vel Erbo,	Erbar,	Preudhome.
Athalarychus,	Adelrych,	Aquilaire, ou tres noble.
Attila,	Atzel oder Hetzel,	Pie.
Adelarius,	Ardrych,	Tres naturel.
Ansbertus,	Aufbrecht,	Hors de renomée.
Aribertus,	Arbrecht,	Naturellement vaillant.
Autaricus,	Huldrych,	De bone grace.

## B

<i>Baltherus</i> . . . . .	<i>Balthar oder Walther</i> . .	<i>Toft Seigneur.</i>
Bellouesus,	Baldwyss,	Toft fage,
Belgius,	Niderland,	Belgique.
Boius,	Baier,	Bauarien.
Brennus vel Berno,	Brenner .	Brusleur ou boutte-feu, duquel nom s'appelloit le capiteine ou coronel des Gauloys qui arran- çonerent les Romains.
Britomarus,	Fridmeyer,	Maire de paix.
Butuit,	Peutig,	Excellent buttineur.

## C

<i>Cauarus, Caramandus, Karlmann</i> . . . . .	<i>Robuste homme, Charles.</i>	
<i>Carolomannus, Celtus,</i>		
Clodoueus, Clitoueus,	Lützig,	Prise des homes.
Castigus,	Gaffwig oder Gaftrych,	Hofstellier.
Cotifo,	Götz,	Babouin.
Clodomirus,	Lütmeyer,	Maire des gentz.
Clodius,	Lutty,	Sonant.
Childericus,	Huldrych,	Gracieux.
Clothildis, queſtoit la	Lüthild,	Grace des gentz.
royne de France fem-		
me de Clouys,		
Chonodomarius,	Künmeyer,	Maire commun.
Cheribertus,	Herbrecht oder Her-	Excellent en armes.
	bert,	
Clodobertus,	Lütprecht,	Extime des gentz.



## D

<i>Dagobertus</i> . . . . .	<i>Dagenwert</i> oder <i>Dagenbrecht</i> ,	<i>Champion preux.</i>
<i>Deobaldus</i> ,	<i>Deckbold</i> ,	<i>Couvert mat. . . s</i>
<i>Diuitiacus</i> ,	<i>Diulich</i> oder <i>Düffwig</i> ,	<i>Ne sçay que ce signifie maintenant. Mais cest le nom du fondateur de Diion.</i>
<i>Dumerius</i> ,	<i>Dumrych</i> .	<i>Gros ponce ou pougeart.</i>

## E

<i>Erocus</i> . . . . .	<i>Ercko</i> . . . . .	
<i>Enricus</i> ,	<i>Ehrenrych</i> oder <i>Heinrich</i> ,	<i>Honorable, Henry.</i>

## F

<i>Francus</i> . . . . .	<i>Franck</i> . . . . .	<i>Franc.</i>
<i>Friburgum</i> ,	<i>Freyburg</i> ,	<i>Ville franche.</i>
<i>Fredegundis</i> , <i>feminini generis</i> ,	<i>Frydegund</i> ,	<i>Pacifique.</i>
<i>Frediledus</i> ,	<i>Frædleid</i> ,	<i>Ioye triste.</i>
<i>Fredegundus</i> ,	<i>Fridiger</i> ,	<i>Pacifique.</i>

## G

<i>Gamberuius</i> . . . . .	<i>Gamper, Kæmpfer</i> . . . . .	<i>Combattant, champion.</i>
<i>Gensericus</i> ,	<i>Genserich</i> oder <i>Gantzrych</i> ,	<i>Oysonnier</i> ou tout riche.
<i>Geuericus</i> ,	<i>Gebrych</i> ,	<i>Donneur.</i>
<i>Guehuldius</i> ,	<i>Gebhuld</i> ,	<i>Donnant faueur.</i>
<i>Gilomarus</i> ,	<i>Gilmer</i> ,	<i>Ne sçay que cest.</i>
<i>Gontharius-therus</i> ,	<i>Gunther</i> ,	<i>Fauorifant.</i>
<i>Gothemarius</i> ,	<i>Gott</i> oder <i>Güttmeyer</i> ,	<i>Maire de Dieu</i> ou bon maire.
<i>Gotegefilus</i> ,	<i>Gottfelig</i> oder <i>Guttgell</i> ,	<i>Heureux par Dieu</i> ou bon compaignon.
<i>Gundebaldus</i> ,	<i>Gonwald</i> ,	<i>Puissant en fouet</i> ou forest de fouetz.
<i>Grimoaldus</i> ,	<i>Grimmwald</i> ,	<i>Cruelle puissance.</i>
<i>Gundagrius</i> ,	<i>Guttacker</i> ,	<i>Bon champ.</i>
<i>Gunderichus</i> ,	<i>Guttrych</i> ,	<i>Bon riche</i> ou <i>Debonnaire.</i>
		<b>Hermion</b>

## H

<i>Hermion</i> . . . . .	<i>Herman</i> . . . . .	<i>Home d'armes ou d'armee.</i>
Hector,	Hechtar,	<i>Je ne sçay que cest.</i>
Helitonius,	Held,	Preux.
Heribertus,	Herwart,	Vaillant en armes.
Hermanricus,	Hermanrych,	Home d'armee.
Huldericus,	Huldrych,	De bone grace.
Hildebertus,	Hillffwert,	Secourable.
Hortarius,	Hertardt,	Dur & aspre.
Hugobertus,	Hugprecht,	<i>Je ne sçay que cest.</i>
Hunimondus,	Hœnmund oder Hey- mund,	Bouche de poulle ou en œuf.

## I

<i>Ingravius</i> . . . . .	<i>Ingraue</i> . . . . .	<i>Conte interieur.</i>
Inducionarius,	Inwoner,	Habitant.
Italus,	Ytel,	Vain.

## L

<i>Laertes</i> . . . . .	<i>Larein</i> . . . . .	<i>Je ne sçay que cest.</i>
Landinus,	Landin,	Payfan.
Leonorius oder Leon- hart,	Lienhart,	Leopart.
Lomnorijs,	Lœwenhart,	Asper lion.
Lotharius, Lutharius.	Luethart,	Rude au peuple.
Lutifuinda,	Luetfind,	Mefnage de gentz.
Leudemundus,	Luetmund,	Bouche de peuple.

## M

<i>Mannus</i> . . . . .	<i>Mann</i> . . . . .	<i>Home.</i>
Marfus,	Mars,	Mars.
Maroboduus,	Märbot,	Meflager de nouuelles.
Meroueus,	Merwig ou Merwhich,	Maronnier excellent.
Mederichus oder Me- derych,	Mütrych,	Courageux.
Medegefilus,	Mütgefell,	Courageux compaignon.
Mundzuchius,	Mundzucht,	Bouche moderee.

## N

<i>Noricus</i> . . . . .	<i>Norein</i> . . . . .	<i>Je ne sçay que cest.</i>
--------------------------	-------------------------	-----------------------------

D.



## O

<i>Odocer, Odagrius . . . .</i>	<i>Ædacker . . . . .</i>	<i>Champ vuide.</i>
<i>Orgentorix,</i>	<i>Ehrenrych,</i>	<i>Honorable.</i>
<i>Othomarius,</i>	<i>Ottmeier,</i>	<i>Maire de Otho.</i>

## P

<i>Pharamundus . . . . .</i>	<i>Waarmund, estoit le</i>	<i>Bouche veritable.</i>
	<i>nom du premier roy</i>	
	<i>de France,</i>	
<i>Philibertus,</i>	<i>Wilprecht, Vilwert,</i>	<i>Venaïson, mout vaillant.</i>
<i>Pipinus,</i>	<i>Pepin oder Pipin,</i>	<i>Petit.</i>

## R

<i>Richila . . . . .</i>	<i>Richel . . . . .</i>	<i>Richereffe.</i>
<i>Richemundus,</i>	<i>Rychmund,</i>	<i>Riche bouche.</i>
<i>Richomarus,</i>	<i>Rychmeyer,</i>	<i>Riche maire.</i>
<i>Rosemundus,</i>	<i>Rottmund,</i>	<i>Bouche vermeille.</i>
<i>Rugila,</i>	<i>Rogel,</i>	<i>Je ne sçay que cest.</i>
<i>Rummarus,</i>	<i>Rumher,</i>	<i>Renome seigneur.</i>
<i>Rumholdus,</i>	<i>Rumhold,</i>	<i>Amateur de renomée.</i>

## S

<i>Senanus . . . . .</i>	<i>Sunmann . . . . .</i>	<i>Home reconcilie.</i>
<i>Sigismundus,</i>	<i>Sigmund,</i>	<i>Bouche victorieuse.</i>
<i>Sigouesus,</i>	<i>Sigweiss,</i>	<i>Sage victorieux.</i>
<i>Sigobertus, Sigisbertus,</i>	<i>Sigwert ou brecht,</i>	<i>Digne de victoire.</i>
<i>Sonomarus,</i>	<i>Sun oder Schonmeyer,</i>	<i>Ioly maire.</i>
<i>Sueuus,</i>	<i>Schwab,</i>	<i>Voletant.</i>

## T

<i>Taffilo . . . . .</i>	<i>Tessel . . . . .</i>	<i>Mot incognu.</i>
<i>Teletoboguius, Theu-</i>	<i>Teutschbott,</i>	<i>Messager alleman.</i>
<i>telobodus,</i>		
<i>Teutobochus,</i>	<i>Gutbot,</i>	<i>Bon messager.</i>
<i>Theodoricus,</i>	<i>Dietrich,</i>	<i>Diuin, car come nous</i>
		<i>auons cy deuant dict,</i>
		<i>Thiet en langage Got-</i>
		<i>thique signifioit Dieu,</i>
		<i>nom extrait du Grec</i>
		<i>Θεός.</i>
<i>Theobaldus,</i>	<i>Dietbhold,</i>	<i>Thibaut, aimant Dieu.</i>

Theodebaldus,	Detwald,	Puissance de Dieu.
Theodemarus,	Dietmar oder Gutmähr,	De bones nouuelles.
Theodebrochus,	Dietprecht,	Tres diuin.
Theodelinus,	Diethlin,	Diuinet, petit diuin.
Theodorus,	Theoder oder Toder,	Aussy diuin.
Theodewinus,	Dietwin,	Vin de Dieu.
Theodealmus,	Diethelm,	Hermet diuin.
Thuisco,	Theutsch,	Alleman.

## W

<i>Vannius.</i> . . . . .	<i>Wanner</i> . . . . .	<i>Vanneur</i> . . . . .
Vadomarius,	Bottmahr,	Messager de nouuelles.
Wandalus,	Wandler,	Chemineur ou vagabond.
		Cest aussy vn peuple an-
		cien nome les Wandaes
Viridomarus,	Fridmeyer,	Maire de paix.
Viridogerion,	Fridiger,	Payfible ou appaisant.
Vestroualda,	Westerwalder,	Preux forestier.
Vidomarius,	Widmer,	Auancher ou saugier.
Viduarius,	Wittwer,	Vefue.
Vilibertus,	Wilprecht,	Fort extime.
Visomarius,	Witzmeyer,	Sage mayre.
Vlyfles,	Ylfing,	<i>Je ne sçay que cest.</i>
Voleradus,	Wollrad,	Bon conseil.
Vto,	Ytel,	Vain.

Par ces vocables se monstre non vain le pro-  
uerbe grec par nous cy deuant allegue, que aussy  
bien barbarisoit Solon entre les Scythes que Ana-  
charsis entre les Grecz, car les Romains failloient  
aussy bien en la prononciation par langue ou es-  
critture des langues estrangeres come faisoient les  
estrangerz en la leur ; & ne faut mespriser les len-  
gues de quelque pays que ce soit, car toutte len-  
gue est bone & desirable que part de sage pensee.  
Et pour tant est expedient que les homes de di-  
uerfes langues traffiquent les vns parmi les autres,  
& que, pour ce faire plus ayseement, que les gentz  
desperit de chacune langue sestudient de reduire



le cours naturel de la sienne payfane, en regles & methode, car il nen y ha point de fi eſtrange que ne ſoit de ce capable ; & que lon fiſt de ce leçons publiques, non ſeulement pour les eſtrangerz, mais ceux meſmes dun chaſcun pays, auſſy bien come lon faiſt des anciennes. Quoy faiſant, lon ſe pourroit bien paſſer deſdictes anciennes, combien que ne vëuille que on les geſte la du tout, pour ce que toutes artz & methodes ſont en icelles contenuz ; mais mon aduis eſt tel que ce que nous recueillirons de leurz methodes ou termes, nous ne laiſſions pas en leur ancien acouſtrement, mais les habillions de ceux de nouz payz, afin que par nouz compaiſans ilz ſe cognoiſſent & ſoient recognuz pour patriotes, afin que & actifz & contemplatifz ſen puiſſent ſervir. Les actifz pour faire remonſtrances aux princes & aux peuples pour les affaires de la choſe publique, ce que ne ſe faiſoit pas anciennement, voire encor de noſtre temps, ains qui vouloit harenguer, failloit quil le fiſt en langue Latine, que la pluſpart des princes, non ſeulement ſeculiers, mais eccleſiaſtiques, nentendoit pas, ains leur failloit hauoir vn trucheman, au François auſſy bien que ſi on luy euſt parle en Alleman, a lAlleman come ſi on luy euſt parle François ; mais deſpuis le regne du feu roy François, par ſon benefice non ſeulement lHebrieu, le Grec & le Latin hont eu entree & cours en France, mais aourne la langue François de leurz acouſtremetz, en forte que non ſeulement les gentz de plume, mais ceux deſpee & les princes

mesmes parlent aussy persuasifvement en leur langue que Demosthenes & Ciceron faisoient chascun en la sienne; tescmoin en sont les apologies du feu empereur Charles contre le roy François & de François contre luy, les harengues faictes en Al-leman es iournees imperialles, celles que hont faictes, en François, Guise contre Conde & Conde contre Guise, & tant dautres.

Pour les contemplattifz cela seruira den faire leçons publiques aux actifz qui les mettent en pratique, & de leurz payz & des estranges; ce que ha desia bien serui, voire es princes de nostre temps, car le feu empereur Maximilien nhauoit iamais mis le pied en Gaule, sinon en passant, & si parloit toutesfois Gauloyz entendiblement; le semblable hont faict les royz dAngleterre Henri viij<sup>e</sup> & Edouard vij<sup>e</sup>, son fils, & tant dautres. Le roy Mithridates est loue non pas mieux pour sa prouesse es faictz darmes, come par sa memoire, qui hauoit soubz son domaine xxij peuples, touz de langue diuerse & parloit & entendoit la langue dun chascun dicelles sans interprete; si me merueille que les royz & autres princes Gauloyz ne les suiuent en cela, qui ne sçauent autre langue que la leur, excepte vn peu ditalien ou Espagnol, pour ce quilz ne sont loingtains du Gauloyz. Et seroit expedient de sadonner a cela & enrichir noz langues modernes des tresors des anciennes, non pas sarrester en icelles, non voulantz parler sinon Latin ou latinement, iusques aux femmes & aux guaignedenierz, come plusieurs alleguez par Ra-



bellays qui « ambulent par les compites & transfrettent les vndes aquatiques, » parlant de langue Latiale, en suyuantz aucuns folz marchans de Flandres ou d'Angleterre & autres lieux ou ne croit vin, qui vont en exploicte de vin pour en fournir leur pays, puis quant ilz sont enyurez de la souefuette du vin, senyurent aussy de lamour du pays ou il croit & oublient leur pays, demeurantz en lautre iusques a la fin de leurz iourz, sans profiter a leur dict pays par la marchandise quilz luy estoient alle querir.

Combien que ne veuille dire quil ny haie aucuns nomz composez de deux dictions qui ne se peuuent exprimer es autre langue sans les disjoindre, les exposants toutesfoys par paraphrase, *id est* par motz laironnantz; come aussy conseille Ciceron en son traicte de philosophie, qui ne veut pas que Latins tournantz le Grec en leur langage ne facent ce que par desguisement de termination de Grec en autre Grec es motz simples, mais selon les vocables a touz Latins communs; mais en vocables composez il le permet, come en cestuy mesme de *philosophie*, que nest que vn seul vocable conioinct & compose de deux, que ne se peut tourner en Latin sans separation, a cause que *Φίλος* en Grec signifie amour ou affection & *σοφία* sapience ou sagesse, pourquoy ne se peut autrement tradduire que par ces ij vocables desjoinctz : *amor sapientiæ*, amour de sagesse; & ainzy de plusieurs autres, singulierement les figures grammaticalles & rhetoricalles.

Et pour tant ne faut penser que lon ne puisse deuenir sage de present, ni haie on par le passe, sans lintelligence du Grec & Latin, imaginant que les artz & sciences ne soient prouenues dautres payz. Les gymnosophistes nestoient Grecz ni Latins, ains Indiens, differentz en parler, de langue aussy bien come en couleur de persone, es deux dessus nomez; & ce neantmoins estoient de telle sagesse que Platon mesme, le prince des philosophes Grecz, se humilia de aller a grandtz fraiz & paine vers eux pour apprendre leurz enseignementz. Les Druides & Samothraces, philosophes & sacrificateurz de Gaule, nestoient ilz pas scauantz sans les langues Grecque ni Latine? Voiez ce que touz historiographes en dient. Cecy dy ie pour vn tas de mignartz se gloriffiantz si fort, pour v ou vj motz de Latin quilz scauent, quilz tiennent pour veaux ou asnes touz ceux, quelz scauantz quilz soient, qui parlantz en Latin choppent quelquefoys en quelque mot sentant sa patria, quelque bone & veritable sentence que sorte de leur bouche; non considerantz que Dieu par nature ha constituez les vocables pour les choses, non les choses pour les vocables; iaçoit ce quilz soient este contrainctz espuyser de eux la pluspart de ce quilz scauent & font es autres ascauoir. Dou hont extraict Guerin Veronensis & Donat la grammaire quilz nous hont laissée, sinon de ce bon home Alexandre de la Ville de Dieu assise sus ce mont prochain au lac de Bienne? & toutesfois, apres quilz hont de luy receu ce quilz scauent de



bien, ilz se moquent de luy & luy tirent la langue apres, l'appelantz barbare, come Plutarque dict que le iourdhuy fit au iour dhier, luy disant: « Je suis & tu nes plus. » Lautre luy dict: « Si ie ne fusse este, tu ne seroies pas. » Auffy si nouz bonz homes anciens neussent treuees les artz & les sciences perdues & enseuelies par la fureur des Gothz & autres barbares, & les nous liurees, come les sçaurions nous? Et puis quilz les nous baillent encor vn peu souillees de la boue barbarique, si ne les nous faut pas pour ce contemner, ains les en mercier, ne reiectant la robe puy quil ha au bord dicelle aucun relief de la bourbe ou elle haura este gectee par les Barbares.

Si aduient encor cecy en la science de theologie; quest le pire. Car nouz theologiens modernes nextiment autres theologiens de lancienete, asçauoir des apostres ou de ceux qui fleurirent non longtemps apres eux, come Cirille, Basile, Origenes, Gregoire, Ambroise, Augustin, Hierosme & semblables, reiectantz l'Escot, le maistre des sentences, S. Thomas d'Aquin & telz autres plus prouches de nostre temps. Si ne leur contredis ie pas en ce quilz preferent les autres a eux, mais ie ne leur consens pas, filz les veullent totalement reiecter & bannir des escholes theologiennes, en forte que au temps present les liures de telles gentz qui hont tant trauaille pour faire cognoistre es homes ce quilz doiuent eslire ou euter ne seruent plus, fors a enuelopper des anchoues ou en faire des cartons; combien que encores de nostre temps les  
gens

gens de sain & profondt iugement ne les hont reiectez ni reiectent, speciallement Martin Luther, come raconte en sa vie Melancthon, quil ne mesprisoit pas les docteurz scholastiques, & entre les autres, auoit Ockam en singuliere reuerence. Mais la pluspart de ce mespris est prouenue de la gloire italique, en laquelle les homes de ce pays sont plongez, ie ne dis pas iusques au col, mais iusques a la gorge.

Politien, entre les autres, neust sceu gouster vn vocable, sil neust este en succe confict; & pour ce, insere en ses epistres plusieurs autres que luy ne hauoit escrites, ni autre luy rescrittes, mais de tierz personages les vns es autres, & entre les autres vne que Hermolaus Barbarus Venitien escrit au conte de la Mirandole, Iohan Picus, la ou ledict Barbarus loue le conte Mirandolan de ce que, estant desia souuerain peripathetique & academien, il ne fesoit pas contente, mais en brief temps hauoit apprises les lettres Grecques; mais il le reprend de ce que, apres hauoir gousté tant de delices contenues es langues Grecque & Latine, il sest alle fouiller en la lecture des docteurz barbares, lesquelz iacoit quilz soient este en grande reputation de plusieurs estantz en authorite, & par consequence en haians receue non petite utilite, come iadis hauoit faict le poete Cherilus dAlexandre le Grandt, qui nonobstant lautorite dudit Alexandre nestoit pas, entre les gentz de bon esperit & scauantz en son art, tenu fors pour vn sot & badin; ainsy aduient, disoit il, a ces docteurz

D. i.



barbares esquelz la Germanie abonde, qui, combien quilz soient extimez par grandtz & petitiz ignorantz les bones lettres, ne le sont pas par les sçauantz, les iugeant indignes de viure ni marcher sus terre; met du ranc de ceux la: Auerrois, Aubert le Grandt, S. Thomas & dautres infiniz. A laquelle epistre ne respondt pas la Mirandole en son nom, mais a celluy des dessus nomez, ainsy:

« Nous hauons vescu honorablement & en gentz de bien, o Hermolae, & viurons encores sil plait a Dieu, non es escholes des grammairiens parmi lordure des enfantz, mais aux escholes & congregations des philosophes & en la compaignie des gentz sages & rassiz, ou ne se tenoient pas propoz des enfantz de Niobe, du cheual Pegasus, des adultaires commiz par Iuppiter & les autres Dieux & telles fabuleuses bagatelles, mais des affaires diuins & humains, desquelz nous hauons traicte & dispute & les sondez, espeluchez & declairez si soubtilement que nous hauons este pour ce reputez par auenture difficiles & scabreux, ce que confessons hauoir este, si ainsy est que vn home puisse estre trop curieux en la queste de verite. De quoy si quelcun demande lexperience, quil descende au combat de dispute contre nous, & il cognoistra que, si hauons la langue barbare, nostre esperit ne lest pas, & que Mercure nha pas du tout abandonne les docteurz que hauons suyui, si que, silz hont este destituez deloquence, ilz ne lhont pas este de sapience. De laquelle sapience, tant sen faut que eloquence se puisse passer, que sans elle

elle faict plus de mal que de bien, car verite est plus desirable nue que avec pompeux acoustrement; car qui tiendra la fille pour bien morigence que haura ses cheueux entortillez & frisez en passefillon? Qui extimera la nonnain garder sa virginite qui fera le semblable? Aussi lon ne scauroit treuver ij offices plus contraires que celluy de lorateur ou parler & celluy de philosophe. Car quel autre est loffice dudiect orateur, parler ou rhetoricien que de mentir, tromper, decevoir & circonuenir son prochain? Car vous mesmes confessez que pouuez, toutes & quantes foyz quil vous plait, faire du blanc le noir & du noir le blanc; vous vous attribuez la gloire de pouvoir a vostre appetit amplifier, augmenter, appetisser & amoindrir toutes choses; finalement vous vous ventez par la vehemence de vostre beau parler desguiser & transformer les choses come bon vous semblera, en sorte quelles ne se monstrent pas en la sorte quelles sont par nature, mais telles que les persuadez estre aux paouures auditeurs. Conclusion: tout vostre dessain ne tendt fors a decevoir, tromper, mentir, & esblouir les esperitz des escouttantz veu que ce sesloigne grandement du subiect qui estoit en propos, pour tousiours le croistre ou le decroistre & ne laisser iamais tel quil est, ains par certains enchantementz de souefues parolles abusez le monde. Mais ie voudroie bien scauoir si les philosophes sont ainsi? lesquelz ne sestudient ni affectionnent a autre, fors a apprendre & enseigner verite; de tant sen faut que toutes gentz



ladonnantz a mignottises & mignardises de parler nhont enuers nous autorite ni credict, come gentz non se souciantz de liurer le bon, mais de monstrier le beau tant seullement. Et aussy vous voiez que les Sainctes Escrittures ne sont pas escrites en langage orne ni mignon, ains come sot & lourdt, a cause quil nest rien plus impertinent que dufer de langage mignart en lexposition de verite. Cecy est le mestier des procureurz & aduocatz, non pas de ceux qui ont a traicter des choses celestes & naturelles, & ne faut pas que le cours dun tel langage trocte par les escholes & academies, ains par les choses publiques ou tout ce que se faict & dict sexamine & poise a la balance du commun, esquelles les fleurz poisent plus que les fruietz. Ne sçais tu pas que tout sollier nest a tout pied conuenable? le confesse que le beau parler est vne chose fort douce & amiable & allichant ailleurz; mais en philosophie il nest bel ni agreable. A vn basteleur est bien seant tourner les yeux ça & la, bien dancer, sauter, gambader, bien iouer de souplesse; mais si vn home de conseil ou vn philosophe sessaie de ce faire, y ni haura persone que ne se donne honte de son honte. Si nous hauons vne petite fille, iollie, mignone & de bone grace, que die des motz infantiles, il ni haura persone que ni prenne playsir & ne la loue; mais si vne femme de reputation sessaioit de ce faire, qui ne sen mocqueroit? Ce nest pas donc nous qui sommes inepres, impropres & malseantz, mais ceux qui du temps de caresme exercent les insolences de ca-

resme prenant, la sepmaine peneuse, voire dedans le temple; ceux qui souillent la grauite philosophique par leurz barbouires & farces. Deux nous pouuons dire, come disoit Sinesius dun iouuenceau qui se testonnoit, que ce nestoit que vn bardaze. Le semblable nous pouuons dire dun propos lullinné; & pour tant nous aimons mieux que nostre propos soit velu, herisse, rude & malorne que sil estoit non seulement marque dimpurite, mais souspeçone destre bien perruqué; autrement il ne meriteroit seulement estre depose de lossice de ouurir le voile de Pallas, mais destre chasse totalement de son sacrifice; car entre toutes les choses du monde, elle nen treuue point de plus malseante en son train, que le propos qui sent sa brasuette ou mignardise.

« Socrate treuuoit beaux les follierz Sycioniens qui estoient poliz & mignonz, mais non pas à ses piedz conuenables. Aussy ne doiuent sacoustrer dhabit semblable lhome de cour & le philosophe, ni tenir semblable table ni propos; car le philosophe ne se veste sinon par necessite; lhome de cour ou le citoien pour magnificence. Si le philosophe faict autrement, il ne sera pas tenu pour philosophe, ni lhome de cour pour home ciuile. Si Pythagoras eust peu viure sans viande, il se fust bien passe de chouz, desquelz seulz il viuoit; & sil eust peu annoncer les conceptions de sa pensee par signes de yeux, de visage ou autre moindre que parolle, il se fust du tout abstenu de parler, de tant sen faut quil eust ornee & polie sa parolle. Aussy



nous nous deuons garder de telz mignartz parlerz, affin que le liseur ne sarreste au fard de la peau, sans vouloir penetrer plus auant pour taster de la mouelle & du sang; car nous hauons veu plusieurs qui, iagoit quilz ne dissent chose que valust, ce nonobstant detenoient le liseur a lentrete de science par vne certaine friuolle melodie, sans le laisser pouser plus outre; en sorte que Musonius disoit de telles gentz, que ce nestoient pas des philosophes, mais des ioueurs de fleustes; & pour tant ne nous doit estre impute a vice, ce que, si nous eussions faiet, nous deussions estre reputez pour vicieux, car nous ne cerchons pas come nous deuons escrire, mais de quoy nous deuons escrire. Si nous querons come cest, cest de non ce faire pompeusement ni mignottement; non voulantz quelle soit belle, plaisante, delectable, recreative, mais profitable, plaine de maieste & reuerence, en sorte quelle acquiere plustost maieste que grace par sa douceur & mollice; car nous ne cerchons pas lapplaudissement populaire en vn theatre pour hauoir prononce quelque clause es aureilles bien sonante ou bien adiancee, pour hauoir espompi quelque bon rencontre, mais desirons tant seulement lassistence de peu de gentz qui ne sonnent mot, mais nous escouttantz en admiration de ouir en nouz parolles quelque bone chose & dicelle accrocher quelque chose des secretz de nature, & lapporte es homes de la cour, & que ce soit chose si cogneue que lon ni puisse contredire & tellement deffendue que lon ne puisse plus contre ar-

gumenter; quilz nous haient auffy en admiration come subtilz inquireurz, prudentz en discretion des choses, aguz en contemplation, graues en iugement, dextres a lier nouz propos, faciles a fonder argumentz; quilz s'esmerueillent auffy de la brefuete de notre stile, de la production de beaucoup de choses grandes, sentences lointaines soubz parolles exposees, que seront pleines de questions & auffy de solutions; s'esmerueillent de la dextérité quest en nous de oster toutes ambiguites, expliquer les doubtes, deuelopper les choses enueloppees avec irrefragables syllogismes, confuter le faux & confermer le vray. Par ces tiltres, Hermolae, nous sommes maintenant en extime, credit & reputation, & esperons encores rendre la memoire de nous perdurable.

« Touchant a ce que tu dis, que nous sommes reputez par le commun, ordtz, villains, sales & marautz, nous ne nous en soucions, extimantz ce redonder plustost a nostre honneur & gloire que a blasme; car nous n'escriuons auffy pas pour le peuple, mais pour toy & des semblables a toy, suyuantz les anciens qui par couuertes de fables debouttoient les idiots de leurz mysteres, & tout espreux les hauons couuertes descorces ameres, affin quilz ne missent la main au plat & souillaissent la viande, a la façon de ceux qui veulent cacher leurz tresorz, qui ne font pas ce en lieu eminent, mais parmi les balloieures de la mayson, affin que les passantz ne sen prennent garde, sinon quelcun quilz extiment digne de le sçauoir. Ainsy



font les philosophes qui veullent que leur estude soit au peuple cachee, a cause que audict peuple n'appartient pas de appuier leurz œuures seulement, mais de les entendre; pourquoy es dictz philosophes seroit malseant escrire chose que fust au peuple plaussible, theatral, populaire, finalement que soit accommode au iugement de la multitude. Mais veux tu que ie te face vn pourtraict de nostre propos? La doctrine des philosophes est semblable aux sylenes esquelz Alcibiades accompagnoit Socrates, questoient images & statues laides, malsades de face, mesprisables par dehors, mais si vous les ouriez, vous treuuez dedans or, argent, pierres precieuses & choses dexquise beaute & richesse, en sorte que par dehors estoient bestes & dieux par dedans. Ainsy sont les philosophes. Or tu me diras: mais quelles aureilles hauroient la patience douir continuellement dun parler si rude, si malsonnant, si mal basti de vocables, que le seul parler diceux est espouuantable? Mais y faut que ie te responde, o oreille mignarde, quant tu seras parmi des tabourins, fleustes, lutz, guinternes & semblables instrumentz de musique. Mais y te faut faire autrement, si veux retourner a toy mesme, a sçauoir cest de te soustraire & retirer de tout sentement exterieur & forain, & te plonger iusques au plus profond de ta pensee. Prens a toy les aureilles de Apollonius Tyanien, avec lesquelles, non estant encores du corps entierement separe, il ouioit non pas la harpe du terrestre Marsias, mais celle du celeste Apollo, recitant melodieusement & en  
accord

accordt musicien la chançon de luniuers. Si tu goustes donc, avec telles oreilles, les parolles des philosophes, en despit des enuieux tu les treuueras plus douces que miel.

« Mais laissons ces parolles come trop haut fesseuantes. Y faut conclure que se fascher d'ouir disputer vn philosophe subtillement, pour ce que ce n'est pas elegamment, ne prouient desperit delicat; tant seulement desperit trop mignart, mais trop arrogant; & non plus ni moins que reprendre Socrates disputant du mode de bien viure, de ce quil nhauoit pas bien lie son follier, mal tirees ses chausses ou mal roignees ses ongles. Ciceron ne requiert pas en vn philosophe la monstre de son eloquence, mais des choses quil ha a traicter; car ce personage signifiait ce home autant prudent come litere quil est plus expedient a lhome de monstrier plus tost son esperit que son langage & se prendre plus de garde que sa rayson ne face faute que sa langue, & que plus tost haions scauoir au cuer que a ladicte langue, nous prenantz garde que ni par courroux ne prononcions chose trop aspre & aigre, ni par volupte trop molle; finalement quelle ne se desborde point dattemperance naturelle. Ce que craignant, Platon bannit de sa Chose publique touz les poetes, pour ce que, par leurz fabuleux contes des crimes des Dieux, ilz desbauchent le populaire; & donnoit le gouuernement de sa dicte Chose publique aux philosophes, toutesfoiſ avec commination de la paine des poetes, filz commettoient semblable faute.

E.



« Mais Lucrece nous dira que iacoit que les philosophes nhaient besoin de orner leurz traictz de parler doux & plaissant, si est il expedient adoucir la durete du langage & dissimuler lausterite dicelluy, come quant lon veut guerir vn enfant des verz, luy donnant pour ce vne medecine daluine & lattrempe on avec du succe pour les garder de sentir lamertume de lalaine. Mais ie te respondrai sus cela, o Lucrece: Si tu ne liures medecine fors aux enfantz ou au peuple, qui ne se foucient quant tu leur donneroies a boire non seulement daluine, mais de droicte poyson, pourueu que ce fust succe, ie te le comporterai; mais a nous ne faut pas faire ain sy, car nous ne pretendons pas a allechir le peuple, mais le menacer, luy donner a boire alaine, non hypocras. Mais Lactance Firmien confermera encore son propos, disant que la verite descendra plustost es esperitz & entendementz des auditeurz, & sera plus ferme & estable, si elle est allumee & acoustree de beau parler, voire sera aggreable es vieilles gentz mesmes; mais tu erres grandement, o Lactance! car si tu fusses aussy bien exercite a la lecture des Sainctes Escrittures come au demene des procez, tu neusses pas dict cela, ains eusses aussy bien construittes nouz opinions, come tu hauoies destruietes celles des autres. Mais dy moy, quest ce que meut & incite plus fort les pensees que la lecture des Sainctes Escrittures? Les parolles de la loy sont rudes, rurales, mais viues, animees, flamboiantes, entrepellantes iusques au fond du cueur & transf-

formantes lhome dune puissance merueilleuse, mesmement que ne persuadent pas, mais contraignent & efforcent. Pericles, loncle de Alcibiades, estoit vn beau parlier & orateur; mais son dict nepueu disoit quil ne tenoit pas grandt conte de ses parolles, mais cestoit autre quant il ouioit parler Socrates nuement & simplement, voire sil luy sembloit improprement, il estoit tout rai & hors de foy, si quil estoit contrainct a faire ce quil luy commandoit. Mais quest il de besoin demployer tant de parolles pour preuuer vne chose si euidente? Si le liseur nest vne beste, il pourra bien cognoistre que dun parler farde ne faut attendre que barat & deception.

« Il y a iij choses que donnent credit au parlant: la vie, la verite de la chose, & la sobriete de la parolle. Et pour tant il te faut sçauoir, o Lactance, que ces iij choses feront adiouxter foy es dictz dun philosophe, sil est home de bien, si veritable, & sil sadonne a stile prouenant non du playfant iardin des muses, mais dune rude & horrible caverne, car Eraclitus dict que la demeure cachee Verite. Donc, mon ami, parlons amiablement & sans nous affectioner, & examinons ceste matiere. Je confesse, diras tu, que sapience est de foy mesme & sans autre vne chose venerable, voire diuine, & que nha besoin de parement estrange; mais quel mal y aura il, si lon y met cela dauentage? Qui voudra dire que les choses de foy bien seantes, par bel parement ne le deuiennent dauentage? Je te respondrai sus cela que aucunes choses



y ha que sont de telle nature, que si tessais ad-iouxter a leur beaute outre son naturel, tu guasteras tout & les enlaydiras, veu quelles sont de leur naturel de si bone essence, que on ne les pourroit changer, sinon en empirant. Mayson faicte de marbre nadmeçt poinct de paincture; si tu la veux blanchir, tu ne feras queeffacer sa beaute. N'est pas notoire que les beaux visages, par fardt senlaidissent? Cest vne regle generale que si veux mettre le beau sus le beau, le dessus pose cachera le des-soubz & ne monstreras fors cela quil haura apporte; dou sensuit que ce questoit parauant donne place au nouuellement venu, come dict le commun prouerbe que la derniere soupe geçte souuent la premiere hors de lescuelle; pourquoy iamaïs choses nouuelles ne souruiennent aux vieilles sans leur dommage. Pourquoy faut dire que philosophie se baille nue, se montrant telle quelle aux yeux de touz, s'esioit de comparoistre en iugement, se cognoissant estre telle que nul la reiectera, & tant plus tu la couureras, tu couureras de tant plus sa verite. Elle veut estre pure & noble, sans meslange dautre chose. Tu ne luy scauroies adiouxter sans la corrompre, sans la fausser, voire sans la faire autre quelle n'est. Elle ne se peut diuiser, ni partir; pourquoy ne se faut iouer avec elle par figures ou motz extrauaguantz, fritiller ou extrauaguer en chose si graue & de telle importance; en laquelle adiouxter ou amoindrir quelque chose est meschansfette.

« Mais tu me diras : « Nous vous concedons

cela & vous dispensons de parler ornement, mais nous vous demandons que parlies au moins Latin, & si ne declaires la chose par fleurementz, que le faictes au moins par vocables a elle propres & competentz, ce que vous ne faictes pas. Nous n'exigeons pas de vous parole attractive, mais nous n'en voulons pas aussi vne orde & sale. Nous ne voulons pas que vostre parler sente son musc, mais aussi quil ne sente pas son espaule de mouton; quil ne soit pas extime, mais que aussi ne le rendiez mesprisable. Nous ne cerchons pas quil playse, mais nous ne voulons pas aussi quil desplaise. » Puisque doncques ainsi est, nous thauons guaigue; tu es reuolte de nostre coste. Mais ie voudroie bien sçauoir quelle est celle Latinite de laquelle tu fais tant de feste, disant que les philosophes la doiuent & ne la paient pas. Come ie metz, par exemple, sil aduient a propos de dire : *A sole homo producitur*, « l'home est produit par le soleil, » & que les gentz communs dient : *Sol causat productionem hominis*; incontinent nouz Latinistes crieront, Alarme ! a laide ! la langue Latine est violee; ce mot *causare* nest pas Latin de langue romaine. Ie te le confesse; mais si tu me dis : *Ergo* puisque ce nest pas Latin, ce nest pas vray, ie te le nie. Sensuyuroit il que si vn Egyptien disoit vne telle proposition en son langage, que pour ce quelle ne seroit pas Latine, elle laissast destre veritable? car il faut confesser de deux choses lune: cest ou non que les vocables sont disposez a la volente des homes, ou sont prouenuz par nature. Silz sont im-



posez a lauenture, quest que touz les homes assemblez soient este en vne region dun tel accordt, que le vocable quilz hauront a vne chascune chose donne soit appelle selon leur statut; de ce hont aussy bien eu puissance ceux que vous appelez barbares de constituer entre eux vne regle de parler aussy bone & legitime entre eux, come vous la vostre, que vous appelez Latine ou Romaine; ou si ne la voules appeller Romaine, appellez la Françoise, Espaignolle, ou Angloise, ou ainsy come vous voudrez. Quant ilz parleront a vous, vous vous mocquerez de eux & eux le feront de vous, ainsy come iadis faisoient les Atheniens entre les Scythes & les Scythes entre les Atheniens.

« Et voyla pour ampreux de la rayson de limposition des nomz ou vocables, filz prouiennent par imposition; mais filz prouiennent de nature, auxquelz nous deurons nous adrecer pour nous informer de leur origine? Es orateurz ou parlierz, ou aux philosophes, lesquelz seulz sont informez de la nature de toutes choses? Par auanture rayson receura & acceptera les vocables, que les aureilles reiectent & abhorrissent come durz & lourdtz, come signes & choses plus conuenables. Mais tu me diras: Quel besoin estoit renouueller la langue? Escoute, o Hermolae! Cependant que les bons personages fouilloient au ciel les loix & regles de diuine pouruoiance, les reuolutions de naissance & de definement, les regles & ordre de luniuers, les vertuz des simples, la temperature des compositions; certes, o Hermolae, ilz ne pouuoient en

vn meſme temps ce faire & obſeruer les proprietéz de la langue Latine, telle que hauoit en vſage Ciceron, Pline, Apuleie & telz autres. Ains ſenqueroient de ce que nature aimoit ou reiectoit; de ce que aux Romains eſtoit aggreable ou non aggreable, ilz ne ſe ſoucioient. Mais ie te dis dauantage que les philoſophes ont deſioincte ſapience deloquence; les hitoriens, rhetoriciens & poetes, non; ce de quoy ſe plainct Philoſtratus. Si tu veux donc que les eloquentz par renommee viuent perpetuellement en honeur & les autres en reprouche, aie garde que tu feras. Ciceron aime mieux vne prudence indiſerte que vne folle eloquence. Nous ne nous informons pas de quelle marque vne monnoie eſt battue, mais de quelle matiere & aloy. Qui eſt celuy qui n aime mieux le florin dor bon & de poix de la marque d'Allemagne, que le ducat faux marque au coing du Pape? Ceux pechent griefuement, qui meſtent diſſention entre le cueur & la langue, mais pys eſt de ceux qui ont langue ſans cueur; & auſſy Cathon les appelle *mortua glossaria*, id eſt langues mortes. Nous pourrions aſſes viure ſans langue, mettez que non a noſtre ayſe; mais ſans cueur ſeroit impoſſible.

« Tu me diras: Celluy neſt pas humain, qui n'a vſage de polie litterature; ie te reſpondray: Celluy neſt pas home qui eſt ſans philoſophie. La prudence tayſante peut profiter; leloquence folle, come le glaue entre les mains dun enrage, ne peut eſtre ſans dommage. Que dirai ie? les ſtatues ne ſont pas louees par leur façon, mais par leur ma-



tiere ; & si Cherilus entre les Grecz eust aussy bien dict que Homere, & Meuius & Bauius entre les Latins que Virgile, ilz seroient aussy bien receuz entre les poetes que ceux la. Voy tu pas la disparilite de la semblance ? Nous disons aussy cela que la chose se peut extimer par son espece, non pas par son subiect ; mais quelque chose sera autrement extimee par son espece entre les poetes, autrement entre les philosophes. Mettez que Lucrece escriue de Dieu & de sa pouruoiance, & que de ceste mesme matiere ce face lun des nostres, a sçauoir LEscoët, voire quil escriue en carmes come lautre, mais il sera en ce mal expert. Lucrece dira les principes des choses hauoir este le vni & les indiuiz, mais Dieu estre corporel, ignorant de nouz affaires, & que toutes choses se font temerairement par la concurrence des petitz corpz appelez atomes ; mais il dira cela & fort elegamment. LEscoët dira que les choses qui se constent par nature se constent de leur nature & de leur espece, & que Dieu est vn esperit cognoissant tout & pouruoiant a tout ; dauantage ce que, iacoit quil puisse toutes choses, despuis la plus grande iusque a la plus petite & icelles modere, si ne se bouge pas de son repos, mais, come dict le prouerbe Grec, il descendt sans descendre. Et dira ce LEscoët sottement, mais veritablement. Lautre mentira elegamment. LEscoët philosophera aussy duriotement que lautre parlera ornement ; LEscoët ne sçaura pas les regles, ie ne dy pas des poetes, mais de grammaire ; lautre ignorera celles de Dieu & de nature. LEscoët nest  
en son

en son parler que vn enfant, parlant toutesfois de choses que lon ne sçauroit asses louer; Lucrece est vn eloquent, parlant de choses que lon ne sçauroit asses blasmer. »

Le conte de la Mirandole faict vne telle responce a Barbarus introduisant les philosophes barbares plaidoiantz contre les suppostz des bones lettres, sexcusant toutesfois quil ne le faict pas a bon effient, mais pour exercer son esperit, come Marot fit ses coups deffay, & Clineus, au v<sup>e</sup> de la Chose publique de Platon, qui loua iniustice, afin que Socrates le reprenant luy enseignast que cestoit que de iustice. Auffy il dict que les vrayz orateurz ou parlierz ne sont pas ceux qui blasment philosophie, mais ce sont vn tas de petitz muguets, perruquetz, affaictz & glorieux grammairiens, qui, incontinent quilz ont veu ij ou iij regles de la grammaire de Despautere, iij ou iv vocables de la *Cornucopie* de Perot, ambulent par les compites & transfretent les vndes aquatiques, come dict Rabelays, & sont come iadis vn iouuencel de nostre pays de Sauoye, qui hautoit demeure iij ou iv moyz en France & en oublia son language; si que, quant il fut reuenue, ne sçauoit plus ou estoit la mayson de son pere, si que il fut contrainct a donner vn fort a vn garson qui le y conduisist: Et estant arriue pour reapprendre son language, ne cessoit de rompre la teste a son dict pere pour linterroguer que cecy ou cela vouloit a dire en Sauoyen. Finalement vn iour foynantz vn leur-pre, le filz voiant vn rasteau a terre couche, dict a son pere:

E. i.



« Et cecy come s'appelle il, mon pere? » Et ce disant, mit le pied sus la teste du rasteau qui leua la perche que le vint frapper du long du visage, si que le nes luy esclatta & en sortit sang a randon; & lors il luy souuint de son language, & dict: *En si Dei despei du raste!* Car douleur & hipocrisie ne peuuent repaier ensemble. Auffy ces glorieux, incontinent quilz sçauent vn peu de Latin, oublient leur language, & ne leur est sauoureuse parolle si elle nest en Latin confitte, disputent entre eux des vocables sans hauoir des choses soucy, iusques a se cracher les vns aux visages des autres, a se donner des coupz de poingz. Du nombre desquelz estoit bien notre Politien, qui ha cecy mis en auant; car quel tumulte dreça il contre Merula? Certes tel quil faillut que le conte Loys Sforza sen meslast pour les descombattre; ce que neusse faict moy si fusse este en sa place, ains les eusse faictz despouiller nudz, & combattre leur querelle a belles estriuieres. Le semblable fit auffy bien Perot, euesque Sispontin, contre Domitien Calderin & plusieurs autres.





## AMARTIGENEE

CEST A DIRE DE LA SOVRCE DE PECHE.

\* \* \*

**S**ALOMON dict au premier de son Ecclesiaste : Qui est ce que ha este faict? Ce que se fera. Quest ce que ha este faict? Ce que se fera. Ce que ihai bien experiente, amiz liseurz, car haiant leu au Genese, commencement de la Saincte Escriture, come Dieu crea lhome a sa forme & semblance, pour estre seigneur sus toutes creatures soutz celestes, en felicite la plus grande que nulle autre de ses creatures apres les anges, en laquelle nous sa posterite eussions participe sil eust este obeissant a son commandement, vn grandt desir menuahit de feuiller plus auant des lieux subaltes que se pouuoient tirer de cestuy cy, quest que ce pouuoit estre que de ce peche, qui dun tel bien lha faict priuer & des dependences dicelluy sans que eusse iamais leu autre qui eust speciallement de ce parle : mais ni ha pas vj ans que leus *Prudentius.* Aule Prudence, le prince des poetes chrestiens, qui entre dautres traictez poetiques quil ha composez y ha adioux cestuy cy, quil appelle en voca-



ble grec *Αμαρτιγενεια*, cest a dire lorigine ou source de peche, mais il nen ha escrit plus auant que la S. Escriture & diffini cela par souffisant denombrement des parties. Si en hauoye descrit mon aduis deuant que leusse iamais leu, en latin & en gaulloys poetiquement, come luy en latin; ien hauoie escrit & desdie a vn mien ami nomme M. Bernard Garnier ainfy :

Garnier.

*Quid didici studiis audi Bernarde sciendi  
Hoc tantum didici quod nihil ipse scio.  
Ecce Platonis ego stagyritæ & scita reuolui  
Quæ fugienda homines, quæque sequenda docent.  
Quæque docent homines sociali viuere lege  
Vt non præcipites seditione ruant  
At quæ friuola sint, male quæ rationeque fulta  
Cernitur ex iisdem qui docuere libris;  
Nam constare hominum ciuilia lege fatetur  
Et non natura, doctus Aristoteles.  
Viuerè diuerso quos more videmus aperto,  
Quod ratio cunctos nec regere vna potest.  
Ergo quis poterit solida hæc ratione tueri?  
Quid certi ex illis quæso venire potest?  
Sunt qui pontificem Romanum vt numen adorant  
Eius & e cælo dogmata lapsa putant.  
Sunt hunc qui Stygiam velut excreant erymnin  
Demonii pingant cornibus atque mali.  
Hoc duce se credunt multi oppugnare polorum  
Mænia cum faciant quod mereatur opus.  
Nil operi ast alii fidunt, papæque iubenti,  
Sed quærunt sola cælica regna fide.  
Denique quicquid amat stomachantur, quicquid adorat,  
Subsanant, quicquid reprobant atque probant.  
Ast aliæ quot sunt diuersæ relligiones,  
Agnoscent vnum quæ tamen esse Deum  
Quem placare sua se credit quisque, piumque  
Et patrem sese iactat habere Deum.  
Ergo hominum mentes cum sint e luce creatæ  
Dic has quæ verum cernere causa vetat.*

Non labor hic paruus, nam prima ab origine mundi  
Est opus. Incipiam, si recitare velim:  
Dum seruabat homo supræmi iussa parentis  
Omni alia prorsus lege solutus erat.  
Libera mens illi calos cernebat apertos  
Solaque curabat pars animalis humum  
At postquam e calo suasu regina ministræ  
Hæc calo terram prætulit æthereo  
Mutatus status est, dominam seruire coegit  
Et parere suis serua libidinibus.  
Non tamen id subito, crescunt nam crimina sensim,  
Turpis & ad summum nemo repente fuit;  
Non cito purpureo circumdare corpus amictu,  
Non cito purpureis vestibus adocuit;  
Conficere & vestes auro argentoque trilices,  
Æoas gemmas addere quinetiam,  
Membra sed ut foliis tegetet genitalia ficus,  
Fructu non sat habens exsatiasse famem.  
Quid te fecit homo naturæ dona pudere?  
Quid? nisi peccato mens hebetata tuo?  
Et quoniam illius violasti iura pudoris  
Reddidit has partes quæ tibi honoris erant.  
Nam prius e cæli speculo mens vera videbat  
Nullius sensus exterioris egens  
Demum at nec calos nec calica vera videre  
Nonnisi per sensus corporeos potuit.  
Fallitur idcirco, ac eadem sæpiissime fallit  
Pauper, inops sensus debilitate sui  
Neue sat hæc primo potuere nocere parenti  
Primus nempe fuit, sed minus ille nocens  
Sed concreuerunt crescenti crimina mundo,  
Concreuit culpæ pænæque iusta suæ,  
Omnis enim tellus natis cum patre duobus  
Fundus erat, poterat quæ satis esse tribus.  
Non tulit hoc onus, sed regnum ut solus haberet  
Asperfit primus sanguine fratris humum.  
Causa fuit tanti sceleris mens inuida. Causa  
Inuidiæ; culpâ mens hebetata patris.  
Mortali scelus hoc nec finem sumpfit in vno,  
Sed veluti cancer serpsit in omne genus;  
Nempe auidæ mentes plus quam natura requirat



*Brutis peiores in scelus omne ruunt.  
 Cætera nam nulla ratione animalia certant,  
 Inde minusque nocent quod ratione carent,  
 At rationis homo rationem lancinat armis  
 Inde magisque nocet quod ratione nocet.  
 Hic me defecit spiritus meus.*

Ihauoie ainsy commence, ami liseur, mais il mest adueni, come se dict que fit iadis a M. Francesque Petrarcha, excellent poete en son language thoscan, qui hauoit escritz en carmes latins ces triumphes que hauons maintenant entre nouz mains, come sest treuue le commencement en vne librairie de Paris, mais pource que sa veine & haleine ne furent souffisantes de le conduire iusques au bout du chemin, il sen retourna des le milieu en son pays de Thoscane, ou en son language il parfit son ouurage, tel que se voit maintenant. Ainsy mest adueni en ceste entreprise, car le souffle mest failli a my chemin, pourquoy men retouruai en mon pays quest en Gaule & messiaai en escrire en poesie de mon language quest gaullois & pour essay en fis vn douzein come senfuit :

*Adam estoit tandis home de bien,  
 Et bienheureux que sa rayson celeste  
 Plus de soucy pour son corps terrien  
 Entretenir nhauoit que brute beste  
 Ains au seul ciel drecoit yeux, cueur & teste,  
 Laisant le soin a lappetit terrestre  
 Dentretenir le corps terrestre en estre.  
 Mais il deuint meschant & malheureux,  
 Quant lappetit luy fit baisser les yeux,  
 Le rendant serf au lieu quil estoit maistre,  
 Pour avec luy de terre sentremettre  
 Et pour la terre abandonner les cieux.*

Mais estant encor en mon pays ie nhai sceu ou ien estoie & hay experimente que la chose quest aux homes tandis quilz sont en ce monde terrien, la plus necessaire leur est la plus difficile & presques impossible, quest dobtemperer a la deuise iadis escritte en la paroy du temple de Apollo delphique ainsi *Γνωθι σεαυτον*, Cognoy toy toy-mesme, quest vne des plus merueilleuses choses que soient au monde, que lhome cognoisse quest en mer, en terre, en feu, en aer, voire sus les cieux qui sont de luy si lointains, & ne cognoisse pas son plus prochain quest soy-mesme, mais ce nest pas hors des limites de rayson, veu quil est cree a limage & semblance de Dieu qui est incomprehensible, & pourtant si lhome ne participe en ce du tout avec luy, il est consonant quil le face en partie, & ce pour ampreux. Pour le segondt, nostre premier pere deuant quil eust peche en hauoit entiere cognoissance, a cause quil hauoit celle de Dieu, sinon en comble mesure, aumoins tant quil luy estoit expedient pour sa felicite, & au myrouer de la face de Dieu se voioit, & cognoissoit soy-mesme, mais le malheureux ne se sceut pas entretenir en son estat, ains a la persuasion du serpent & de sa femme par icelluy deceue deceu, aussy voulut centre la deffense par Dieu luy faicte plus scauoir que ne luy estoit necessaire, pour quoy perdit ce que luy estoit necessaire de scauoir, mangeant du fruct de larbre de science de bien & de mal par Dieu luy deffendu, que Iosephe appelle larbre de prudence a bon droict, car lobiect



de sapience est le bien tant seullement, celluy de prudence du bien & du mal pesse mesle, cependant que Adam demeura en lobeissance de Dieu questoit en simplicité: pour de quoy donner plus clere intelligence faudra amener le texte de la S. Escriture, puis lexposer selon laduis que Dieu nous donra. Moyse dict au premier du Genese, que apres que Dieu eut parfourni le monde il voulut faire en terre vne marque a son image & semblance, come il hauoit faict au ciel les anges come vous veez limage & semblance des corpz terrestres dedans leauue ou vn mirouer ou autre que sappelle diaphane perspectif. Ainsy crea Dieu lhome a son image & non seullement le crea mais le fit & forma de ses mains (come dict l'Escriture) du limon de terre, pour demonstrier quil ha-uoit plus daffection a produire vne telle creature que point des autres sus terre, tesmoin quil ne voulut ainsy faire des plantes, arbres & herbes, quil doua tant seullement dame germante par Latins appelee vegetatiue, ni encores de ceux auxquelz il lhauoit donne sensitiue, come oyseaux, bestes, poissons, &c., car de ceuxcy il commanda tant seullement a la terre quelle les produisist, disant & commandant, produise la terre lherbe verte, les eauues, les reptiles ou se trainantes, &c.: mais de lhome il dict: Faisons lhome a nostre image & semblance. De ce propos est grande contro-uerse entre les Iuifz & les Chrestiens, car les Iuifz dient que Dieu parla la en la facon des royz, princes & groz maistres qui puisquilz sont seulz parlent

parlent ce nonobstant tousiourz en nombre plurier de soymesmes, disantz faisons, disons, &c. Les Chrestiens dient que cest la Trinite que parle, le Pere, le Fils, & le S. Esperit, vn en iij & iij en vn, se deliberantz de former sus terre leur image, que seroit vne ame douce de ces iij vertuz, entendement, rayson & volente, que toutes iij ne sont que vne ame de laquelle lacte estre substance. Et pourtant dict, faisons, en plurier, & se mit en besoigne, faisant & formant premierement le corps humain de la poudre de la terre come vn tuyeau de lame, & pource que a baston si noble ne failloit pas villain tuyeau ou fourreau informe & lourdt, fit ce corps pluz noble que a touz autres animaux de terre, aer ni eauue, luy drecant le chef en haut regardant contre le ciel come pays de son origine, au contraire des bestes qui lhont courbe contre terre come matiere de leur essence, come Ouide ha bien descrit au premier de sa metamorphose disant :

*Pronaque conspēctent animalia cætera terram,  
Os homini sublime dedit, cælumque videre  
Iussit, & erectos ad sydera tollere vultus.*

Ouide.

Ce que Marot ha ainsy tourne :

*Et neantmoins que tout autre animal  
Iecte tousiours son regardt principal  
En contrebas, Dieu a lhome ha donne  
La face haute, & luy ha ordonne  
De regarder lexcellence des cieux,  
Et desleuer aux estoilles les yeux.*

Marot.

Pourquoy Dieu ainsy faict le corps humain pour vn tuyau de diuin esperit, ce que fust este

Ame ger-  
mante.

F.



pour neant sil leust laisse vuide. Et luy donna premierement ame germante commune aux herbes, arbres, & racines, de laquelle loffice est augmenter & amoindrir, & pour augmenter attraire a cause quelle attrait lentretenement de lanimal moien nourriture.

La retentive, par laquelle lattraict est retenu iusques il soit digere.

La digestiue, par laquelle lattraict est retenu & digere.

Lexpulsiue, par laquelle la superfluite du nourrissage est hors pousse.

Laugmentatiue, de laquelle lobiect est le nourrissage.

La generatiue, de laquelle la fin est engendrer a soy semblable en espee & de ce lobiect est le nourrissage selon que le generatif est de soy semblable en espee & ha este baille par Dieu & nature pour lentretenement de lespee.

Après il luy ha donne lame sensitiue, de laquelle

*Ame sensitiue.* les vertuz sont :

La veue,  
Louie,  
Lafflairement,  
Le goust, &  
Le tast.

Et cecy sont les sentementz par dehors.

Sentiment commun, duquel la vertu est rendre toutes les choses sentues, & est come le point ou centre auquel se vont rendre toutes les choses sentues coment a circumference des v sentz de ce procedantes come les rameaux de leur arbre.

Phantasie ou Imagination que, selon Aristotes, est le mouuement faict par le sens selon l'acte.

Lextimatiue questant es homes est appelee pensante, en latin cogitatiua, quest vne vertu apprehendante de ce que nest pas sentu, ce que lest come font les intentions.

La memoratiue est vertu conseruatiue des intentions par lextimatiue apprehendees ou empoignees: si elle est es homes, elle sappellera souuenance.

Ceste cy est lame des bestes qui hont aussy avec les herbes & arbres la bourionnante ou germente, mais icelle bourionnante nest par la pareille participante a la sensitiue.

Il faudroit faire non seulement vn singulier liure, mais vn ample commentaire qui voudroit mediocrement seulement deuiser de ces vertuz animales, ce que ha faict Galien, & aussy cela est plus tot lofficce dun medecin que dun theologien.

Mais reste encores le plus difficile, quest lame *Ame intelle-* intellectiue, que appartient a lhome tant seulement, quest la partie de lhome quest immortelle *ctiue.* seulement viuante apres sa dissolution dauec le corps a cause quelle est deffence non seulement celeste, mais superceleste, que nest point materielle ni consequemment corruptible, veu que telles choses sont tant seulement des le ciel de la lune en bas, car lessence des autres ij ames est produitte de la qualite des iiij elementz producteurs des choses materielles & pour ce corruptibles, pour



quoy quant l'animal est mort ces iiij qualitez abandonnantes le corps dicelluy retournent se resoudre chascune en lelement dou elle est procedee, mais les iiij parties de lame formees a la semblance de Dieu, que sont lentendement, la rayson, & la volente, iiij en vne & vne en iiij, se resoluent a ce dou elles sont procedees, quest Dieu, & sont immortelles, si pendant quelles hont reside en ce corps terrien elles ne se sont pas abusees en desirz terriens, ains hont tousiours ahanne au lieu dou elles sont parties quest au ciel, & a Dieu. Mais si, par contraire, elles samusent a la terre, preferentes les vanitez dicelle aux biens celestes, le ciel les reiectera non les voulant recevoir, ains les en renuiera en terre & au plus profondt dicelle que lon appelle communement enfer, que theologiens appellent le sepulchre des mortz eternellement iacoit ce quelle soit immortelle, pourquoy a mon aduis ne se doit pas appeller la paine dicelle la mort eternelle, mais (sil estoit permis de fourger nouveaux vocables) morition eternelle & continuel acte de mourir, car la mort du corps & celle de lame ne sont pas tout vn. Le corps incontinent que lame est de luy despartie pert tout sentement tant de bien que de mal & nest plus en essence bone ni mauuayse. Lame est non seulement en essence, mais sentement, si elle ha a Dieu compleu, en bon, si despleu, en mauuays, & la plus griefue angouisse que l'animal sente est en la mort, laquelle angouisse est passee tout incontinent que lacte de mourir ha prise fin, car la cause dicelle angouisse est le des-

part que lame faict du corps quelle viuifioit. Or ainſy come lame viuiffie le corps, Dieu viuiffie lame, de laquelle quant il (eſt) deſparti la mort delle ſenſuit eternellement, non pas en telle felicité que le corps qui pert tout ſentement & de mal & de bien, car elle ne perdt pas le ſentement de mal ains eſt en elle fiche continuellement receuant de luy plus de douleur ſans comparayſon, quelle nha elle & ſon corps en leur deſpartement, le principal mal quelle endure eſt que elle ha continuel deſir & continuel deſpoir deſtre aſſouie de ſon deſir: elle deſire felicité eternelle que git au ſouuerain bien queſt Dieu, & toutesſois eſt en deſpoir eternel de non iamais en iouir. Aduiſez en quel regret elle eſt: ſi elle iouiſſoit de Dieu elle iouiroit du bien ſouuerain & eternel. La priuation du bien engendre habitude du mal, eſtant a icelluy oppoſite, ſenſuit donc que la priuation du bien ſouuerain & eternel eſt lhabitude du mal ſouuerain & eternel. Si hont chaſcune de ces iij ames ſa diſſinition a part, telles :

Ame germante eſt le principe ou commencement par lequel premierement nous germons.

Ame ſenſitiue, eſt le principe au commencement par lequel premierement nous ſentons.

La diſſinition de lintellectiue eſt auſſy difficile que les qualitez du diſſini, en ſorte que Lactance en ſon traicte de louurage de Dieu, chap. xvij<sup>me</sup>, dict, Que les philoſophes nhont iamais eſte de ſentence accordante en cela, ni parauanture iamays ſeront. Toutesſois ie me hazarderay den

*Lactantius de  
opificio Dei.*



dire quelque chose, apres aucuns philosophes tant gentilz come chrestiens, & premierement celle de Aristote gentil, lib. ij, De anima, quest generale, disant :

*Aristote diffinit  
lame en gene-  
ral.*

Ame est le principe ou commencement par lequel nous viuons, sentons, entendons, sommes nourriz & esmeuz selon le lieu premierement.

Item la mesme ame est le premier acte substantiel du corps naturellement instrumental, haiant vie en son pouuoir.

S. Augustin, au liure des diffinitions la limite ou diffinit ainsy chrestienement :

Ame est vne substance a par soy inuisible & semblable a Dieu immortel non haiente autre image que celle de son createur.

Mais maintenant faut suyuant le texte declairer come elle estante si noble creature sest ainsy auillanee, ce que ferons suyuantz le texte.

Il dict crea apres Adam luy dormant ascauoir Adam, de lune de ses costes sa femme appelee Eue, & les beneit leur disant, Fructifiez & multipliez sus la terre & lassubectez, & hayez seigneurie sus les poyssons de mer & sus les oyseaux du ciel, & sus touz les animaux qui se meuuent sus la terre. Et Dieu dict : Voicy, ie vous hai donne toute herbe portante semence qui est sus la terre, & tout arbre qui ha en soy fruct d'arbre portant semence, afin quilz vous soient pour viande. Et aussy a touz animaux de la terre, & a touz oyseaux du ciel, & a toute chose mouuante sus la terre que ha en soy ame viuante, hay donne toute

verdure dherbe pour manger. Cecy dict Moyse en son ij. chapitre, puis poursuit son premier propos des autres creatures. Apres au iij. chapitre, il reprennt celluy de lhome, disant: Aussi le Seigneur Dieu planta vn iardin en Eden, vers Orient, & mit la lhome quil hauoit forme. Et le Seigneur Dieu fit germer la terre tout arbre plaissant a veoir, & bon a manger, & au mylieu du iardin larbre de vie & larbre de science de bien & mal. Et vn fleuve sortoit de Eden pour arrouser le iardin, & de la se separoyt en iiij chefz. A lun est nom Phison. *iiij riuieres de paradis terrestre.* Cest celluy qui auironne la terre de Heuilars, la ou croit lor & lor de ceste terre est bon: la aussi se treuve le bdellion & la pierre onix. Le nom du second fleuve est Gihon, qui est celluy qui auironne toute la terre de Ethiope, & le nom du iij<sup>me</sup> fleuve est Tigris. Cestuy va vers la partie orientale de Assyrie: & le iiij<sup>me</sup> fleuve est Euphrates. Or le Seigneur Dieu print lhome, & le colloqua au iardin de Eden, pour le cultiuer & le garder. Adonc le Seigneur Dieu commanda a lhome disant: De tout arbre du iardin tu mangeras, mais de larbre de science de bien & de mal tu ne mangeras point. Car des le iour que tu mangeras dicelluy tu mourras de mort. Et le Seigneur Dieu dict, Il nest pas bon que lhome soit seul. le luy fera vne aide semblable a soy. Ainsy le Seigneur Dieu hauoit forme de la terre touz animaux des champz, & tous oyseaux du ciel, puis les amena a Adam afin quil vist come il les appelleroit. Et toute chose haiant ame viuante, & ce que Adam nomma fut



son nom. Adam donc imposa noms a toutes bestes & oyseaux du ciel & animaux des champz, mais a Adam n'estoit pas treuuee aide semblable a luy. Le Seigneur Dieu donc fit tumber vn somme sur Adam, & quant il fut endormi, il print vne des costes dicelluy, & reserra la chair au lieu dicelle & le Seigneur Dieu fit de la coste quil hauoit prise de lhome vne femme, & lamena a Adam. Lors Adam dict: A ceste foys cest os de mes os, & chair de ma chair. On appellera ceste homate, car elle ha este prise de lhome. Et pourtant lhome delaissera son pere & sa mere & sadioindra a sa femme & seront vne chair. Et estoient tous deux nudz a scauoir Adam & sa femme, & nen hauoient point de honte. Apres cela le Genese recite come le serpent seduisit la femme luy persuadant de manger du fruiet deffendu & en faire participation a son mari. Et pource quelle lhauoit veu bon a manger & playfant, & que lors leurz yeux furent ouuertz & cogneurent quilz estoient nudz, si coufurent ensemble des feuilles de figuier, & sen firent des sainctures. Enapres ilz ouirent la voix du Seigneur qui se pourmenoit au vespre: lors Adam & Eue se cacherent de la face du Seigneur entre les arbres du iardin, mais le Seigneur Dieu appella Adam & luy dict: Ou es tu? Lequel respondit: Jhai oui ta voix au iardin & hay crainct pource que ie suis nud, dont ie me suys cache. De rechef il dict: Qui tha demonstre que tu estois nud? De l'arbre que ie thauoie commande de nen manger, nen has tu pas mange? Adonc Adam dict: La  
femme

femme que tu mhas donnee pour estre avec moy, mha donne de l'arbre, & en hai mange. Puis le Seigneur Dieu dict a la femme : Pourquoi has tu faict cela? Et la femme dict : Le serpent mha deceu, & en hai mange. Lors le Seigneur dict au serpent : Pourtant que tu has faict cela tu seras maudict sus toutes bestes & sus tous animaux des champz. Tu chemineras sus ta poitrine, & mangeras la pouciere touz les iourz de ta vie, & mettrai inimitie entre toy & la femme, entre ta semence & la semence dicelle. Ceste semence te cassera la teste, & tu luy poindras le talon. Auffy dict il a la femme : Je multiplierai ton trauail en conception, en trauail tu enfanteras tes enfantz, & ton desir sera a ton mari, & icelluy haura domination sus toy : puis dict a Adam : Pource que tu has obei a la voix de ta femme, & has mange de l'arbre lequel ie thauoie deffendu disant : Tu ne mangeras point dicelluy, la terre fera maudicte a loccasion de toy. Tu mangeras dicelle en trauail tous les iourz de ta vie, car elle te produira espines & charbons, & mangeras lherbe des champz. En la fueur de ta face tu mangeras le pain, iusques a ce que tu retournes en la terre, car dicelle tu es prins. Et pourtant donc que tu es poudre, tu retourneras auffy en poudre. Et Adam appella le nom de sa femme Heua, pource quelle est la mere des uiuantz. Or le Seigneur Dieu donc feit a Adam & a sa femme des habillemens de peaux, & les en vestit. Adonc le Seigneur Dieu dict : Voyla, Adam ha este faict come lun de nous pour scauoir le



bien & le mal, & maintenant il est danger quil ne remette la main a prendre de l'arbre de vie & viue perpetuellement. Le Seigneur Dieu donc lenuoya hors du iardin de Eden, pour labeurer la terre de laquelle il hauoit este prins.

Ainsy dechassa lhome, & colloqua des Cherubins vers lorient du dict iardin de Eden, & vn glaiue voltigeant trenchant de ij costez pour garder la voie de l'arbre de vie.

*Quel estoit paradis terrestre.*

Cecy dict Genese, que peut seruir a nostre propos de la source de peche, car fus ce se pourroient drezer plusieurs questions. Et premierement quel estoit ce iardin de Eden communement nomme paradis terrestre, auquel l'Escrature ne dict pas que Adam fut forme, mais transporte tant seulement, & nest pas la question impertinente, car puis que Dieu ha deffendu aux posterieurz de Adam l'entree corporelle dicelluy, il nha pas deffendu aux esperitz diceux s'approcher de la porte, quelz Cherubins qui le gardent & senquerre que ce peut estre des Cherubins mesmes qui sont interpretez comble d'intelligence. Car la description quen fait l'Escrature ne monstre pas quil fust en aucun lieu particulier limite. Et aussy ne se peut par rayson preuuer. Premierement elle dict quen icelluy hauoit iiij riuieres que nous hauons dessus nommees, lesquelles touz cosmographes dient ha- uoir leur source bien lointaine lun de lautre, & encor ne peux penser que veue la curiosite des homes de nostre siecle, quil nen y haie qui ne les haient nauiguez, bien que ne lhaie encor oui

*Riuieres du paradis terrestre.*

dire, ni veu par lecture. Outre ce : de quelle estendue eust failli que fust este ledict lieu? Veue que sans le peche de Adam luy & touz sa posterite fussions este immortelz, come eust donc peu tout ce comprendre, ie ne dis pas vn iardin mais vn royaume, quant bien nous serions coignez lun a lautre? Et pourtant dict M. Wadian en sa cosmographie quil ne faut pas penser que paradis terrestre fust vn lieu particulier en terre limite, ains que toute la terre estoit paradis peut estre, que Dieu colloqua Adam au lieu de la terre plus delicieux, car sa persone ne pouuoit occuper toute la terre, duquel peut estre que Dieu le chassa par mouuement local, mais ce nestoit pas ce paradis duquel il le chassa par mouuement local, ains par celluy de alteration, ou de mutation, car Aristote en ses categories ou vniuerselles, assigne vj sortes de mouuement, ascauoir generation, corruption, accroissement, decroissement, alteration, que nous pouuons nommer mutation & de lieu changement quest mutation locale : car il ne le fit pas esmouuoir pour sortir hors de la terre, mais laltera & le changea dune qualite en vne contraire, cest que du plaisir & volupte quil receuoit pour veoir la terre, de laquelle il estoit constitue seigneur luy porter tant de playfir & de proffit sans aucun sien travail ni sollicitude parauant, des lors estoit deuenue si despitueuse quelle ne luy vouloit donner ce que luy estoit necessaire sans la sueur de sa face, dauantage tant de malheurz ausquelz Dieu lha-uoit condemne & a la mort finalement. Il estoit

*Wadian en sa cosmographie, de paradis terrestre.*

*vj sortes de mouuement.*

*Adam ne fut pas chassé de paradis par mouuement local, mais d'alteration.*



rumbe en desplayfir, ce que adroict se peut nommer mouuement de alteration, car quel plus grandt desplayfir peut estre que destre rumbe de felicite souueraine & pardurable en calamite extreme & pardurable, car les fins du bien & du mal ne git pas en la cessation diceux, mais au bout ou ilz conduisent leurz supportz: mais puisque nous hauons declaire du lieu que contenoit lhome y ne faut pas oublier le contenu quest iceluy home. Premièrement S. Augustin en son ij liure de Genesi contra Manichæos, c. vij, reprent sus ce passage les Manichiens qui sen mocquoient come de tous autres lieux de lAncien Testament, pource quilz nentendoient lEscriture sinon charnellement & disoient pourquoy fit Dieu lhome de la foillure de la terre, que Latins appellent limum. Luy deffailloit y autre matiere meilleure & plus noble matiere & celeste de laquelle il leust peu former, non pas dune ordure de terre si fragile & mortelle? Sus ce leur respondt S. Augustin, Quilz nentendent pas premierement come en la S. Escriture par la terre & leauue sentendent plusieurs choses: car limus ou la boue nest autre fors vne meslange de terre & deauue. Or nous hauons dict que le corps humain apres le peche deuint morfondu, & fragile, & caduque, quest le tout quilz abhorrissent en nostre corps que la mortalite a laquelle nous hauons estez condamnez par nostre demerite, mais ie leur respondtz (dict Augustin), ilz se pensent quil y haie chose a Dieu difficile, & quil ne peust dune si vile matiere former vn corps

*Augustin de  
gen. contra  
Manichæos.*

exempt de corruption, fil se fust abstenu de pecher, luy qui ha le tout faict de neant. Dict aussy illec S. Augustin, que ainsy come de la boue quest vne meslange de terre & eauue le corps humain fut forme, tout le quoy sappelle boue, que tout lhome le fut de la meslange de corps & ame de fort diuerses matieres.

Or apres que Dieu eut faict le tuyeau, il estoit besoin de faire aussy ce que deuoit estre dedans, que fut lame douee de entendement, rayson, & volente, tierz en vne, & vne en iij a sa forme & semblance, qui est vn en trinite, & iij en vnite, ce quil fit avec son soufffle, come dict le texte. Sus quoy S. Augustin dict au viij<sup>me</sup> chapitre dudiect liure, que ce que se dict le soufffle de Dieu en la face de lhome, se doit entendre de lacouplement que Dieu fit de lame a son corps, si toutesfois il ne faut pas entendre que lhome fust este faict spirituel quant il fut faict en ame viuante, non pas que ce soufffle fut conuerti en ame viuante, mais quil ouura en lame viuante: mais lors il nestoit pas encores spirituel, mais anime tant seulement. Car il fut faict spirituel tant seulement quant estant constitue en paradis quest a dire la vie heureuse, il receut aussy le commandement de perfection, afin quil fust accompli par la parolle diuine. Et pourtant apres quil eut peche abandonnant le commandement de Dieu, & quil fut iecte hors de paradis ceste grace luy fut encor faicte quil demeureroit animal, pourquoy touz nous qui sommes naiz de luy apres quil eut peche demeurons tou-



fiours homes animes, iusques haions acquis le Adam spirituel, cest nostre Seigneur Iesus Christ, qui oncques ne pecha & que par luy recreez & viuifiez soions restituez en paradis ou ce larron implora destre avec luy le iour quil mourut. Si conclud S. Augustin apres beaucoup de parolles que pource que le texte dict que Dieu souffla dedans Adam lesperit de vie il ne faut pas conclure que lame humaine soit vne partie de deite, mais son image tant seullement. Dict en outre que l'Ecriture, parlant de lesperit de lhome, nentend que ce soit autre que la puissance raysonnable de lame, quest different de lame des bestes, & par la loy de nature ha sus icelles seigneurie. Cecy dict Augustin au vij. & viij. chap. du ij. liure de Genese contre les Manichiens.

Or dict apres le texte que Dieu donna puissance a lhome sus toutes bestes de la terre, oyseaux de la terre & poyssons des eauues, sus quoy lon pourroit dire come ha faict Dieu lhome seigneur sus toutes bestes, veu que plusieurs sont tuez des bestes de terre, & que nous receuons plusieurs dommages par les oyseaux desquelz nous ne nous pouuons pas garder, & le plus souuent ne les pouuons prendre quant nous le volons. Come doncques hauons nous puissance sus elles? S. Augustin, en son premier liure, chap. xvij., contre les Manichiens, respondt ainsy sus cela. Premièrement, que ceste preheminance luy fut donnee deuant quil pechast, mais que par le peche il perdit icelle avec des autres. Segondement, que combien que plu-

sieurz bestes y a que le pourront tuer par leur force corporelle, & la fragilite dicelluy, si nhont elles pas telle subtilite desperit quelles le puissent dompter, ce que luy faict presque toutes.

Après le texte dict come haïant Dieu constituez Adam & Heue au iardin appelle paradis terrestre, leur commandant premierement quilz œuurissent & le gardissent, & entre touz les arbres questoint plantez la estoient deux les principaux, ascaoir l'arbre de vie & celluy de la science de bien & du mal. Luy permit de manger de celluy de vie & leur dict : Vous mangerez du fruiet de tout arbre excepte de celluy de science de bien & de mal, car des a ce que vous en haurez mange, vous mourrez de mort. Et Dieu dict & commanda a Adam & sa femme après quil les eut constituez au iardin quilz y ouurissent & le gardissent. Sus quoy S. Augustin dict au ij. liure chap. xi., que ce ouurage estoit louable non laborieux. Car il y ha difference de l'œuure que se faict au ciel a celle que se faict en terre, auquel l'home fut condamne après qu'il eut peche. Et declare ce que sensuit le precedent, quest quilz gardissent le iardin, par quoy se peut entendre quel ouurage ilz hauoient affaire. Quest que en la tranquilite & repos de la vie bienheureuse on nha aucune mort, tout l'affaire git a garder ce que lon tient : lequel affaire nest pas laborieux, car il est plus laborieux a dissiper ce que lon ha que de le garder encores dis ie en terre, outre S. Augustin.

Après quoy Dieu dict, De tout boys & de tout



fruiet vous pourrez manger excepte de celluy de la science de bien & de mal, car le iour que vous en mangerez vous mourrez. Voicy le blanc pour auquel attaindre nous hauons tant trauaille, quest la deffense, la transgression laquelle ha este mere de touz pechez, & paines diceux sensuiuantes, de quoy nous hauons touche en nouz carmes latins & gauloyz. Et principalement en nostre douzain gauloyz nous hauons auance vne merueilleuse paradoxe ou contreopinion, disantz que Adam estoit home de bien, & pource bienheureux tandis quil viuoit come brute beste, come si lhome pensoit sagement de pretendre a estre heureux pour viure come brute beste. le le reitere & conferme encores que cestoit ce que Dieu luy hautoit commande & pour a quoy non obeir il tumba du comble de toute felicity en toute infelicity de laquelle il nous ha laissez heritierz. le distingue toutesfois ce mot de viure, car il se peut prendre en ij sortes, ascauoir selon lame, & selon le corps, car la vie de lame sentretient par viande spirituelle, & consequemment incorruptible, celle du corps par materielle & corruptible consequemment. Mais parlons premierement des puissances ou offices des ames des bestes. Icelles hont la germante que leur est commune aux plantes, arbres & herbes, & la germante auance lanimal en estre, la sensitiue le y entretient, de laquelle sensitiue encor prouient lappetit. Les sens exterieurz instrumentz de la sensitiue par loeil, par les oreilles, le nés par le flairerement, par le goust, & par le tastement les passions

sions du corps que sont, les yeux les couleurz, les oreilles les sonz, le nez les flairementz ou odeurz, la langue le goust, la chair ou nerf ramiffie le tact font rapport a la sensitiue de ce que luy est expedient pour sentretenir en estre come de la viande queest pour son nourrissement, les lieux ou il se doit reposer, & le bon cheual par louye de sa trompette si resiouit, les chiens par le son du cornet. La sensitiue lenuoie a lappetit que leschauffe, & ainsy eschauffe le renuoie au sentement qui esmeut les membres a suyure ce que luy est necessaire, ou le fuir, car lappetit sestendit aussy bien a fuitte du contraire de son corps, come a fuitte.

Lexemple y est. Si vne brebis que son appetit haura esmeue a suyure son pasquis pour sentretenir en estre voit le loup qui tasche len priuer, elle fera par son appetit aussy bien esmeue a fuiete pour garder son dict estre come elle hauoit este a fuitte & ainsy de toutes autres bestes, lame sensitiue ha encor vne autre puissance outre lappetit que sappelle en latin loco motiuo, que se peut exposer muable de lieu a autre, car ceste muable de lieu avec la sensitiue peuuent bien estre sans lintellectiue, mais non pas le contraire. Ces puissances animales de la qualite des iiij. elementz hauoit Dieu par nature donnees a lhome pour len-tretienement de son corps pource quil ne lhauoit encor exempte de viure sans viande come du tout spirituel come il fera aux fideles gentz de bien apres le iour du iugement ou les corps seront come les celestes non haiant mestier dautre sub-



stentation que de euxmesmes come dict Christ. En ce iour la iij. haura mariage, ce que sera faict & seront les corpz come les anges du ciel, mais deuant cela iacoit que sans le peche les homes neussent sentue corruption, si nestoit pas expedient quilz fussent sans generation, ce que Dieu leur havoit commande pour emplir la terre, disant, croissés, multipliez, &c., affin que quant le nombre quil havoit par sa intremuable prouidence ordonne seroit atourne quil fist ciel & terre nouveaux, qui fortunissent tellement ce quilz contiendroient quilz neussent plus besoin de boire ni manger, mais pource que generation se faict de la superfluite de la iij. ou plus tost de la iij. digestion de la viande, Dieu voulut quilz beussent & mangeussent, combien quil eust bien peu faire les homes prouenir lun de lautre sans coniunction de masle & femelle, aussy bien come il fit Adam & luy mesme voulut naistre. Ce que Platon mesme ha cuide, & en ha faict mention en son Prothagoras, come nous hauons dict en nous aduiz & deuiz, & ce fil luy eust pleu aussy bien tenir ilz pourroit faire croistre ble & vin sans pluie ni autre eauue, mais y faut considerer quil nest pas seulement tres puissant, & la puissance mesme, mais aussy tres scauant & la sapience mesme, tres bon & la bonte mesme, iij. persones en vne mesme essence, & ne se discordent iamais ces iij. persones ains veullent vne chascune monstrier sa gloire par les choses creees. La puissance quest attribuee au Pere se monstre en la facture des choses. La sa-

*Plato in Pro-  
thagora.*

pience quest au Fils en l'ordonnance dicelles, la  
 bonte quest au S. Esperit en l'usage. Doncques puis-  
 que la puissance se voulut monstrier en la facture  
 de l'home, la sapience ha voulu donner ordonnance  
 a sa nature, la bonte luy donnant vsage par lequel  
 il se deuoit en son estre entretenir, & touz voulu-  
 rent que entre les homes fust tel ordre quilz pro-  
 uinssent lun de lautre par generation come toutes  
 autres choses animees. Qui voudra demander pour  
 quoy a celluy ne faut faire autre responce, fors  
 que pource quil l'ha voulu, & luy dire avec le  
 sage, Qui feuillera la maiesté sera opprimé de la  
 gloire. Si tu le veux scauoir, vais le treuuer de-  
 dans son cabinet & le luy demandes, & te rendz si  
 ami de Dieu quil le te die selon le conseil de S.  
 Augustin, lib. i, cap. ij de Genes. contra Mani-  
 chæos: Dieu par nature fit les puissances dame  
 dessus dictes pour l'entretienement du corps non  
 seullement en estre mais en bien estre, questoient  
 communes a touz animaux, mais il en donna a  
 l'home seul iij autres creees par luy seul sans nature,  
 que sont l'intelligence, la rayson & la volente,  
 ordonnant a vne chascune son office. Intelligence  
 ha la charge de apprehender le bien, rayson de  
 l'ordonner, & volente a inuiter a l'usage dicelluy,  
 & ne sont que iij en vne come ha este cy deuant  
 dict. Luy haiant donc Dieu donne ces iij puissances  
 immortelles a l'home pour l'entretenir en estre, & bien  
 estre, & encor eternellement ne voulut pas quelles  
 sempechassent de l'entretienement de l'estre du corps,  
 ains laissassent l'office de cela aux autres puissances

*Intelligence,  
 rayson & vo-  
 lente, iij puis-  
 sances de lame  
 immortelle.*

*Fruict de vie,  
 & fruict darbre  
 de science de  
 bien & de mal.*



*Que cest man-  
ger du fruit  
de science du  
bien & mal.*

*Allegorie de  
action, & de  
contemplation,  
sus Marte &  
Marie. Luc.*

communes a touz animaux, a scauoir quant lappetit inciteroit lhome a manger, quil mangeast, a boire quil beust, a dormir quil dormist, & semblables, & des fruitz que nature luy fournissoit sans aucune sienne sollicitude, come font les bestes de terre, daer & deauue, & que les puissances qui estoient celestes ne se messassent que a la contemplation de Dieu, & des choses celestes, estantes rauies en Dieu non en gueres moindre felicité que les anges, ce que faire sappellat manger du fruit de vie entretenant lhome en immortalité & felicité pardurable, faisant lopposite, & se voulant mesler avec les parties brutales de science apte & propre a entretenir outre que en estre, en playfir, & volupté non necessaires, que sappelle manger du fruit de science de bien & mal; elles le rendroient malheureux & mortel & (conclusion) ne vouloient que les parties celestes de lame se messassent que de contemplation, laissant l'action es autres, ce que Iesus Christ ha demonstre allegoriquement, come est raconte en lhistoire escripte Luc XII par lexemple des ij seurz Marie & Marthe. Car il dict questant Christ en vne maison a elles commune, Marthe estoit apres a aprestre le manger pour luy & ses disciples, mais Marie estoit oyfifue, non se meslante fors destre assise aux pieds de Iesus Christ pleurant ses pechez, & arroufant ses piedz de ses larmes, & contemplant sa face pour lamour quelle luy portoit, & delaissoit touz autres affaires pour vacquer a celluy seullement. De quoy Marthe fut fâchée & enuieuse, & dict a

Christ. Seigneur, tu dis que ihay tant d'affaires en mon mesnage pour rapprester ce que test necessaire, & nhay aide de persone. Voyla ma seur a laquelle appartient come a moy, que ne sen foucie, ains se fier aupres de toy come vne dame. Commande luy quelle se lieue vn peu & me vienne aider. Et lors Iesus luy dict : Marthe, Marthe, tu es soigneuse, & diligente, & aussy troublee en plusieurs affaires. Toutteffoys necessite le requiert, mais Marie a choysi le meilleur partage, que ne luy sera pas oste. Come sil eust voulu dire, Vous estes seurz, & haez parti, mais Marie ha choisie la meilleure partie de lheritage, quest le ciel, qui ne luy sera pas oste, & tu la moindre, quest la terre, car y faut que lentretennes a la sueur de ton corps, & trauail de ton esperit. Toutteffois cest vne necessite imposee par le peche du premier pere, ce que nest pas tant peche come paine de peche. Et pourtant comporte Marthe & la dispense de mener vie actiue, & loue Marie de ce quelle meine contemplatiue telle quil hauoit commandee a Adam, combien quil ne veuille encor fourclorre les actifz des cieux aussy peu que les contemplattifz, pourueu quilz guident leur action par contemplation legitime, car la difference y est telle tant seulement que les actifz cheminent au ciel par terre, & ne y sont que a my chemin, & les contemplattifz y volent, & sont a la porte, ou (selon la comparaison de sainct Bernard) les contemplattifz passent au ciel par sus vn pont & pourtant y arriueront plus tost & a moindre danger ; les autres y nauignent



*Virgilius facili  
lis descensus  
Auerni.*

fus vn basteau plus loingtains du port, & en plus grandt danger de perir. Et est cecy vne histoire de laquelle se tire l'allegorie de la source de peche. Car par Marie se peut entendre celle partie de lame que nous tenons du ciel, come nous hauons dessus dict, par Marthe, celle que tenons de la terre, que sont toutteffoys leurs toutes deux en vn corps ; mais la partie celeste y est pour le ciel, la terrestre pour la terre come nous hauons dict cy deuant. Mais Sathan en guise de serpent enuieux de ceste felicity de l'home ne tascha fors a luy faire trespasser le commandement de Dieu, afin de le ruiner come luy hautoit este, ce quil se pensa faire ayseement, a cause que naturellement il est plus ayse de descendre que de monter, come dict Virgile, pourquoy estoit plus facile de luy faire baisser les yeux de lesperit contre la terre, que les luy faire tousiours tenir drectz haut contre le ciel : pourquoy esmeut l'appetit & le sentement brutal a faire a intelligence, rayson & volente come Marthe vouloit faire a Marie & fit quilz dirent a intelligence, rayson & volente que nestoient que vne chose. Madame, que faictes vous tout le iour ? Vous estes vne oysifue, vne paresseuse, que ne cherchez que vous solaz, & n'hauez soucy de ce paouure corps, ains men laissez toute la charge que ne peux pas a tout fournir. Aussi vous veez come il se porte. Les bestes brutes sus lesquelles Dieu luy ha donne seigneurie sont plus honorablement acoustrees que luy. Elles le sont aucunes de plumes, aucunes de poil, aucunes despines, au-

cunes descailles, &c., & le paouure corps humain est nud dautre que de sa simple pel. Et principalement nest ce pas gros honte que les autres animaux oront queues pour cacher leurz membres genitaux, & que lhome les haie descouuertz? Donnes y ordre, ce que pourrez si luy faictes manger du fruit de science de bien & de mal, que lenseignera a se pourueoir. La rayson nhauoit lors persone que respondit pour elle, come Marie ha-uoit Iesus Christ, mais faillut quelle respondit elle mesme & dict: Ne scais tu pas bien que Dieu nous ha commande de nous soucier de cela? & nous ha deffendu de manger du fruit de science de bien & de mal, & ce fus paine de la vie? Laurre instruite par le serpent repliqua: Cest follie a vous de penser mourir pour taster de ce fruit. Dieu le vous ha deffendu par enuie, craignant que ne fussiez esgaux a luy par la science de bien & de mal. La rayson donc a la persuation de la sensuallite descendit de haut en bas, non se ioignant & esgallant seulement a la sensualite, que parauant estoit sa chambriere & esclauue, mais encore se soutezmettant a elle come nous hauons dict en nouz carmes latins & gauloiz en latin, ainsy:

*Dominam seruire coegit  
Et parere suis serua libidinibus.*

En gauloys:

*Le rendant serf au lieu quil estoit maistre  
Pour avec luy de terre s'entremettre  
Et pour la terre abandonner les cieux,*

& mangerent le mari & la femme de la pome, & avec elle la calamite si horrible a eux & leurz suc-



cesseurz, & la premiere paine quilz sentirent de leur peche fut verguoigne, cest quilz se donnerent honte des membres desquelz nature les hauoit mieux honorez, questoient ceux de generation, le principal de leur corps, come avec ceux que leur espece estoit conferuee, ce que deuant ilz ne faisoient pas, ni eussions nous leur posterite filz fussent demeurez en leur simplicité & innocence, & de ce se voit lexperience encores de present, car cependant que lhome est encor en enfance & simplicité consequemment rien ne luy messiet, & aussy il nha honte de rien, puis que lenfant court tout nud monstrant tout ce quil porte. Il nen offendt ni ses yeux ni ceux des autres, mais leur ordonne plus tot playfir, ce que frere Baptiste ij, poete mantouan, ha bien declaire en ses bucoliques disant :

*Baptista Mantuanus.*

*Et nihil est aliud placidis Adaamus in hortis  
Vt pueri sine labe dies.*

Quest autant a dire coment :

*Le simple enfant est en tel estre  
Que Adam en paradis terrestre.*

De quoy est cause sa simpleesse, mais incontinent que nous sommes hors denfance, & hauons les yeux de lesperit ouuertz, ces membres commencent a sembler deshonestes a nous yeux premierement, & apres a ceux des autres, pourquoy les couurons tant que pouuons par honestete publique. Et quant par necessite ou cas fortuit nous sommes necessitez & contrainctz a descouurir les autres membres, nous laissons encor ceux cy couuertz

uertz de linge ou autre, au moins la matiere; mettez que la forme ne se puisse celer, bien quil y haie eu des philosophes anciens qui hont par doctrine & par exemple afferme cecy nestre vergoigneux. Car Aristipus disoit que honestete ne prouenoit pas de nature, mais de meurz & coustume seullement, combien que luy ne mettoit pas sa doctrine en pratique. Mais ce firent bien les philosophes cyniques dictz de ce vocable *κυνος* que veut a dire chien, pource quilz estoient impudentz come chiens. Desquelz le prince & inuenteur fut Diogenes, qui marchoit tout nud, & de ses membres genitiaux come des autres, non se souciant pour son viure fors de ce que nature luy produisoit, rongeoit les oz quant il les treuuoit come vn chien, nhauoit autre pour son habitation que vn tonneau quil tournoit quant il sentoit trop de chaut contre ponant, quant trop de froit contre leuant, & ainsy come luy venoit daise, & habitoit avec sa femme en public. Et quant on luy demandoit quil faisoit, il disoit : le plante vn home, & faisoit plusieurs autres villennies come pourrez veoir en Laertius, de *Vitis philosophorum*. Despuis (come dict S. Augustin en son x<sup>me</sup> liure, chap. xx<sup>me</sup> de la cite de Dieu) honestete publique vainquit ceste opinion, & faillut abbatre cela. Autrement qui le feroit ne meriteroit seullement estre doubte a coupz de baston, mais assomme a coupz de pierres & ne sont les faictz fales seullement, mais les dictz & vocables les signifiantz sans figure, combien quilz soient licites. Et dau-

*Aristipus de honestate.*

*Cynici philosophi Diogenes.*

*Augustin.*



*Cicero ad Pætum.*

tres vocables y ha signifiantz faictz non seulement deshonestes, mais meschantz & enormes, & les nomz & verbes diceux honestes & non reiectables en compagnie humaine. Ce que Ciceron declaire en vne epistre ad Pætum commencante : Amo verecundiam, disant que commettre larrecin, briganderie, meurtre, &c., & deshonestete, est meschant ; mais les vocables signifiantz leur substance & les motz ou verbes signifiantz leur acte ne sont deshonestes ni abhorrissables en compagnie, come quant ie dirois, tel ha desrobe, brigande ou tue, &c., ni le nom ni le verbe ne seront pas tenuz pour deshonestes entre les escoulantz quant bien ie ne presupposerai reserue dhonneur ou reuerence ; mais vous parles des choses qui ne sont pas deshonestes, pource quelles sont naturelles, mais desquelles lacte est aux sentementz fales, come des egestions & purgations du ventre, de habiter avec vostre femme ou des membres a ce desservantz, sinon figureement & encores avec reseruation dhonneur, vous serez tenu pour inciuil & villain. Come le faire deuant les gentz est deshoneste, de cecy nous hauons faict ij quatreins en nouz menues pensees disantz ain sy, au premier :

*Lon peut parler honestement  
De plusieurs faictz qui sont villains  
Et aussy deshonestement  
De plusieurs qui sont bonz & sains.*

au segondt :

*Lacte charnel de mariage  
Est acte de louable ouirage :  
Pourquoy vertu veut quil soit sceu,  
Mais honte ne veut quil soit veu.*

Toutteffoys nous voions de nostre temps la *Facon de viure des sauuages.*  
preuue de la sentence de Aristipus en aucunes is-  
les treuuees de nostre dict temps habitees par au-  
cuns que nous appellons sauuages, combien quilz  
ne sextiment pas telz, mais plus humains, & viuantz  
mieux selon la loy de nature que nous, & si sont  
touz nudz, excepte que encor en y ha qui se de-  
monstrent hauoir quelque verguaigne, car ilz por-  
tent des braies, mais en dautres ilz nen hont en-  
tierement point, come en celle que ha descouuerte  
Villeguaignon, ou ilz ne couurent aucunement  
leurz parties honteuses, ains marchent nudz droict  
come ilz sortent du ventre de leurz meres, si que  
vous diriez quilz sont citoiens de paradis terrestre,  
& aussy que leur habitation est le dict paradis,  
car elle est attrempee en chaut, froit, &c., &  
cela toute lannee a cause de la temperature du ciel  
soutz lequel ilz sont. Et non seulement sont ces  
fructz substantieux, mais souefz & delicatz & ce  
sans aucun labeur ni fueur de leur corps. Ilz hont  
bestes, oyseaux, poyssons & autre viande pour cela,  
si que filz ne mangeoient les vns les autres ilz vi-  
uroient plus de iij c. ans, ce que se monstre par  
quelcuns qui sont eschappez des mainz de leurz  
ennemiz qui sont de souuenance de plus de ccl ans  
& combien quilz haient en ces lieux force mines  
dor, ilz sen soucient moins quilz ne feroient de  
festuz de paille, & ne les daigneroient four, mais  
nonobstant quilz ne se soucient de metal, ce me-  
tal est cause de leur ruine, par lauarice & iniquite  
delle procedante, de nous qui nous appellons chre-



fiens, qui les outrageons non seulement vnchre-  
 stiennement, mais inhumainement, car nonob-  
 stant quilz nous souffrent raur leur & autres biens  
 a nostre appetit sans contredicte, nous ne nous  
 contentons pas de leurz biens, mais aduifons leurz  
 persones en seruitude, puis nous ventons ce fai-  
 santz destre catholiques, & de auancer la foy chre-  
 stienne. Or des anthropophages ie ne veux pas  
 contredire, a cause quilz ne sont pas seulement  
 ennemiz des chrestiens, mais de toutz homes, &  
 meritent bien estre domptez, & a coupz de baston,  
 mais il en y ha des autres qui sont simples & in-  
 nocentz, non dommageantz, non seulement les  
 homes mais les bestes. Vray est quil en y ha qui  
 sont idolatres; mais dou leur vient cela finon de  
 ce quilz nhont pas eu gentz qui leur enseignassent  
 quil y ha vn seul Dieu immortel, & eternal qui  
 ne se peut cognoistre par les sentementz exterieurz,  
 mais par le seul entendement, & ha vn fils dict  
 Iesus Christ, & le S. Esperit qui ne sont que iij en  
 vn & vn en iij, &c., car par faute de cela iacoit  
 ce que en leurz cueurz soit este grauee la cognois-  
 sance dun seul Dieu come a touz autres homes,  
 si ha elle este par le diable tellement cachee quilz  
 hont creu que Dieu estoit sensible, & pourtant  
 hont adore Dieu en la forme de ce quilz hont es-  
 pere leur estre plus profitable, ou crainct de leur  
 estre dommageable, en sorte que plusieurs de  
 eux hont adore le dyable. Si nous gentz hauoient  
 des homes scauantz qui apres hauoir apprise  
 leur langue leur preschissent la doctrine chre-

*Adorateur du  
 dyable*

stienne, & non seulement par monstre, par paroles, mais par exemples de faictz, ie ne fays point de doute quilz ne fussent tantost guaignez a Iesus Christ, mais come taschons nous a cela? quant bien on leur annonçeroit Christ par doctrine, par effaictz lon le leur nieroit, car nous disons que la profession du bon chrestien est destre bonhome; come pourra donc estre bon chrestien celluy qui nest pas bonhome? Est bon home ou bon chrestien celluy qui enfrainct ce commandement a touz homes comun, de quelque religion quilz soient, Tu ne feras a autrui ce que tu ne voudroies que fust faict a toy? Obserues tu bien cela? La loy de Christ porte nonseulement que lon pardonne a ses ennemiz, mais que encor lon leur face bien, & tu fais mal a ceux qui te font du bien, quant pour les recompenser du bien quilz te souffrent prendre en leur pays tu les reduitz en seruitude? Tu me diras, Nous leur faisons cognoistre & recognoistre Iesus Christ pour vray Dieu, mais come les fais tu? come recognoistront ilz pour bon capitaine celluy qui ha des soldatz si meschantz & larronz? silz ne le cognoissent, ilz le recognoissent mieux que toy, car ilz se monstrent chrestiens par œuures, ou tu ne le fais (que) par confession de bouche, & le nies par œuures, que faict que silz ne cognoissent pas le nom de Iesus, Iesus les recognoit eux, car ilz vivent en la simplicité a Adam commandee de par nostre Seigneur, de laquelle tu les veux debauscher a la façon que le serpent fit a Adam & Eue; mais a la reste iextime que le



droict paradis ou demouroit le premier pere estoit en quelcune de ses regions & que les habitantz en icelles s'approchent fort a la simplicité par Dieu a Adam commandee, combien quil ne peut estre quilz ne l'haient aucunement brisée, ce que se monstre quilz endurent encor la payne de laquelle Dieu hauoit menace Adam sil ne luy obeissoit, veu quilz souffrent encor des maux beaucoup, ne fust que par les mouchillons qui ainſy nudz les picquent, que leur terre produit espines & chardons, come Dieu hauoit predict a Adam, & combien quilz vivent longuement, a la fin meurent.

*Nudite de  
l'home.*

Mais fuyons la reste. Le texte dict que la femme, deuant que manger du fruit de vie vit quil estoit beau; & puis dict que apres quilz en eurent mange, ilz virent quilz estoient nudz. Sus quoy se pourroit dreſcer vne question ainſy: Come peut estre cela? Sils virent le fruit de l'arbre qui estoit beau, sensuit quilz nestoient pas aueugles. Ilz pouuoient doncques auſſy bien veoir leur nudite, & il dict que apres quilz en eurent mange ilz cogneurent tant ſeulement quilz estoient nudz; sensuit donc que le texte se contredie diſant quilz virent que le fruit estoit beau, car par ce il declairoit quilz y veoient beau, & apres quilz virent quilz estoient nudz apres quilz en eurent mange, que denote quilz ni veoient pas beau parauant. A ceste question reſpondt S. Auguſtin & laſſout au ij<sup>me</sup> liure ſus le Geneſe, contre les Manichiens, chap. xv<sup>me</sup>, diſant que ce ne fut pas des yeux

corporelz, mais spirituelz. Car incontinent apres leur creation ilz virent aussy beau & clair come apres quilz eurent peche, mais ce fut des yeux de lesperit & de la pensee quilz les virent nudz, ce quilz nhauoient faiet parauant estantz en la simplicité que Dieu leur hauoit ordonnee, car lors ilz ne scauoient que cestoit qued nudite, pource quilz ne scauoient que cestoit que de vestement. Et les opposites se cognoissent les vns par les autres. Lon cognoit le blanc par le noir, le froit par le chaut, & finalement le bien par le mal, come dict Platon; mais les parens, combien quilz neussent iamais veu vestement le conceurent nonobstant en leur imagination, esmeuz par la duplicité de cueur quilz hauoient receue pour non se daigner demeurer en la simplicité leur commandee, en laquelle ilz estoient si heureux, commencerent a le desirer, & sessayèrent den faire premierement pour tant seulement couvrir les membres que leur peche leur fit extimer verguoigneux de feuilles de figuier. Si ne faut pas dire que nudite fust alors priuation de vestement, aussy peu que nomer auerglerie des chiens, des chatz, des connilz, & autres bestes que demeurent ix iourz apres leur naissance sans y veoir goutte, priuation de lumiere, pource quilz ne lhont iamais eue, car cest vne regle de philosophie que priuation presuppse habitude, car de cela que lon nha ni ha on iamais eu la faute ne sappelle pas priuation, mais sans deffence, laquelle lhome deuant quil eust peche nhauoit pas de vestement, mais apres sa nature deuint debile,



tellement quil luy fut necessaire en hauer, & le bon Dieu encor len pourueur.

Après ce le Genese dict que voiantz Adam & Heue, Dieu se pourmenoit par le iardin ilz eurent honte & fallerent cacher entre les arbres, ce quilz neussent faict filz neussent este priuez de sapience, car ilz eussent bien pense que rien ne peut estre a Dieu cache. Mais ces folz pensoient le contraire. Et Dieu sen mocquant faignit de non scauoir ou ilz estoient, pourquoy cria a haute voix: Adam, ou es tu? Adam ne luy respondit rien, iusques il leut crie par la iij<sup>me</sup> foys. Et lors il respondit. Et Dieu luy dict: Pourquoi tes tu cache? Et Adam luy respondit: Pource que ie suis nud ihauoie vergoigne de me monstrier a toy. Lors Dieu luy dict: Qui tha dict que tu estoies nud, sinon que lhas cogneu par le fruit de l'arbre que ie thauoie deffendu? Lors Adam voulut faire come presque touz les pescheurz, qui reiectent la coulpe de leur meffaict volentier sus autrui, voire les petitz enfantz en vsent; si quil en vouloit charger Dieu mesme come font beaucoup d'autres pecheurz aussy, qui dient que la fragilite que Dieu leur ha donnee est cause de leur peche. Aussy Adam ne voulut charger sa femme simplement, mais encor Dieu mesme par vn merueilleux orgueil, disant non simplement, ma femme, mais la femme que tu mhas donnee, come fil eust deu dire: Tu ne me deuoies pas donner vne telle femme. La femme aussy sexcusa sus le serpent. A cause de quoy Dieu condamna lhome, la femme & le serpent, ainsy come

come hauez peu veoir cy dessus, & estant priue Adam de la beatitude celeste & rumbe aux miseres terriennes nous ha laissez nous ses enfantz heritierz de sa coulpe & de la paine dicelle que sapelle le peche originel, ce que ne fust adueni si se fust contente de viure selon le corps, come les bestes des fructz que sans aucun labeur la terre produisoit, non empechant sa rayson a sus ce pourueoir, en sorte que sans lesperance que nous hauons en la misericorde de Dieu par Iesus Christ de la vie eternelle, il ni ha sorte de beste si malheureuse que celle des homes, car quel meilleur heur se peut treuuer sus terre que de viure sans soucy, ce que les bestes hont, & non les homes, que paruient aux homes par conuoitise prouenante de coustume, & non de nature, que pour hauoir peu de playfir les esmeut a continuel desplayfir, car lhome vait a pied & a cheual, nauigue sus mer & sus eauue douce, se mettant en celluy & autres dangerz pour des choses qui ne seruent de rien a lentretenir en essence, ains seulement pour viure ou en volupte & en gloire; si veut manger y luy faut semer du ble, quant il est meur le recueillir, apres le battre, apres le porter moudre au moulin. Cela faict, le pestrir, & finalement porter au four. Si veut boire il luy faut planter vigne, la fouir, faire vendenges apres que le raysin par elle produit sera meur, & tant endurer dautres langueurz & anguisses pour viure en volupte. De tout quoy sont exemptz les animaux irraysonnables qui nhont soucy de lendemain, ains viuent

*Calamitez humaines.*

H.



*Pline, Plutar-  
che & frere  
Anshelme de  
la calamite hu-  
maine.*

de ce que nature leur produit naturellement sans aucun leur labeur, ce que Iesus Christ mesme dict a ses disciples: Considérez la volaille du ciel, considérez les liz, elles ne filent ni cousent, & ce non-obstant le pere celeste les entretient en essence. Mais il ne nous en faut pas faire plus long sermon, car vn Pline lancien, vn Plutarque cheronien & finalement vn espagnol nome frere Anshelme cordelier iadis prefect a Thunis sus les marchandz espagnolz en hont deuise fort a plain. De Pline ne se faut merueiller, car il estoit de secte Epicurienne, que tient les ames mortelles quant & les corpz. Plutarque a drece vn dialogue entre Vlysses & vn de sa compaignie que Circes hauoit mue en pourceau qui estoit nome Grillus, par lequel veut persuader a Grillus de laisser la forme de pourceau, & reprendre lhumaine, mais Grillus le luy reffusa tout a plat, luy rendant rayson de son refus que luy qui nestoit que vne villaine beste viuoit mieux selon Dieu & nature & estoit mieux a son ayse que Vlysses, que luy Vlysses qui estoit extime le plus sage de son temps, ni touz les homes du monde. Doncques come doiuent estre & faire les bestes plus nobles? Frere Anshelme introduit vn asne disputant avec luy sus la mesme matiere, mais a la fin lasne consent a frere Anshelme que lhome est plus heureux, a cause de limmortalite de lame. Dieu donc chassa Adam de paradis, quest a dire de sapience en follie & ignorance, de vertu en vice, & de souueraine felicite en calamite extreme, de vie en

mort, & de tout bien en tout mal, ce que a droict l'Escripture appelle la vallee de misere, a cause que nous ne y sommes iamais a nostre ayse. Toutes les creatures que Dieu nous hauoit assubiection nous voiantes (que) Dieu nous hauoit delaissez perdirent la crainte & reuerence quelles nous portoient & se secouirent de nostre ioug. La terre que nous hauoit produitz & estoit nostre mere deuint nostre marastre, puis quelle nous hauoit enfantez refusant de nous nourrir au lieu de tant darbres & herbes plaisantz & fructueux nous produisante espines & chardons & ne nous donnant viures de son bon gre, mais par contraincte & efforcement quil faut que luy faysons; mais Pline, Plutarque & frere Anselme par nous cy deuant alleguez lhont souffisamment deschiffre, pourquoy nest besoin de plus trauailler apres eux, mais y faut encores dire cela que celle de toutes creatures quest a lhome plus dommageable est lautre home, ioux le commun prouerbe grec Ἄνθρωπος ἀνθρώπου λύκος, lhome est loup a lautre home, come nous hauons dict en nostre Amartigenee latine:

*Cetera nam nulla ratione animalia certant,  
Inde minusque nocent quod ratione carent.  
At rationis homo rationem lancinat armis,  
Inde magisque nocent quod ratione nocent.*

Ce que se interprete ainſy :

*Tous autres animaux aux humains nuisent moins  
Pource que sans rayson sont, mais mesmes humains  
Aux autres humains sont de tant plus dommageables  
Quilz nuisent come font animaux raysonnables.  
Et avecques rayson autre rayson combattent,  
Et maintesfoiz rayson avec rayson abbatent.*



Toutteffoys le Seigneur Dieu ne fect pas encor voulu monſtrer a nous iuge ſeuere, nous puniſſant avec le glaïue a mort come bien nous lhauions merite, mais avec verges en emendement, pourquoy au lieu quil luy hauoit donne vne puissance de contemplation ſeulement, voiant quelle ſeſtoit tellement abbaiſſee quelle ſeſtoit voulue meſler avec les ſenz brutaux des affaires terriens & caduques, ne la voulut pas laiſſer du tout ſubiecte aux dictz ſenz brutaux, voire ne voulut que icelluy ſeſgallaſt du tout a elle, mais luy demeurast encores quelque peu ſubiect. Ains adiouxta a la puissance contemplatiue quelle hauoit mais foible & debile & (come dient les philoſophes latins, In gradu remiſſo, ceſt a dire en degre pareſſeux & laſche) vne autre queſtoit actiue, ſi que au lieu dune puissance elle en eut deux; lune la contemplatiue, que ne ſe meſloit que des choſes rayſonnables & celeſtes, que ſont de ſa nature & lautre lactiue pour ſe meſler des irrayſonnables & des terreſtres & caduques, de quoy parle Ariſtote au vj<sup>e</sup> de ſes Ethiques ou moralles, Ad Nicomachum, come nous hauons dict par la ſimilitude de Marthe & de Marie. Les ſcholatiſtiques noment ces ij puissances dentendement, lune lentendement pouuant & lautre poſſible, & auſſy entre touz homes (de quelque relligion quilz ſoient) des tout temps hont obſerue en leur politique de conſtituer deux ſortes de magiſtrat : les vns ſont ceux que nous appelons eccleſiaſtiques qui ſont pour la police contemplatiue, les autres citoïens ou ciuilz qui ſont

pour lactiue, combien quil y haie telle colligance entre lesprit & le corps quil faut necessairement quilz sentremettent le plus souuent des affaires lun de lautre, combien que par la coulpe hereditaire nous nexercions bien lun ni lautre, & pourtant en sentons la paine par iuste punition, come declaire S. Augustin au ij. liure chapitre 23 : De Genesi contra Manichæos, disant que par le Cherubin est entendue la plenitude de science selon lhebrieu, par le glaiue enflambe voltigeant sentendent les pains temporelles que voltigent selon le cours du temps, & se dict le glaiue enflambe pource que toute tribulation est bruslante son suppost. Mais il y ha ij sortes de bruslement, lun est pour consumer le suppost, lautre pour le purger. Car la lapostre dict, ij Cor. xj<sup>mo</sup> : Qui est scandalise & que ie nen *Paulus II<sup>e</sup> Cor. XI, xj.* brusle, cest a dire nen haie anxiete; mais ceste affection le purgeoit, non consumoit, pource quelle pouenoit de charite. Et appartiennent ces tribulations que les gentz de bien endurent a ce glaiue enflambe, a cause que lor & largent espreuent par le feu, & les homes a Dieu acceptables en la fornaiſe dhumilite come dict lEcclesiaste au ij & au 27 : La fornaiſe espreuue la vaisselle du pottier & la tentation (&) tribulation les iustes; & Paul, Hebr. xij<sup>o</sup> : Car Dieu corrige cel- *Hebr. XII<sup>e</sup>.* luy quil ayme, & fouette celluy quil aduoue pour son enfant; & ce mesme, Rom. v<sup>o</sup> : Scachant come tribulation œuure patience & patience approbation. Et pourtant nous lisons & ouions, & est de croire que larbre de vie & la plenitude de science



font gardez par le glayue flamboiant; & ne peut persone paruenir a l'arbre de vie sinon par ces ij voies, ascauoir par soufferte des tribulations & plenitude de science, mais la soufferte des tribulations & fascheries n'est espargnee a persone viuante en ce monde quil ne faille passer par la a qui voudra paruenir a l'arbre de vie, mais peu de gentz peuuent paruenir a plenitude de science, en sorte que quasi touz ceux qui paruiennent a icelluy arbre ni paruiennent pas par plenitude de science, combien quil ni haie qui ne sente le support des fascheries, que sont le glayue enflambe voltigeant; mais si vous entendes ce que lapostre dit, Rom.

*Rom. 13.*

13: La plenitude de la loy est charite, nous treuuerons que la mesme charite est contenue en ces deux commandementz, que Iesus Christ auance

*Matth. 22*

Matth. 22: Tu aymeras ton Seigneur Dieu de tout ton cuer, & de toute ton ame, & de toute ta pensee. Et aimeras ton prochain come toy mesme. Desquelz ij commandementz depend la loy & les prophetes; pourquoy sappert euidemment que lon ne paruiet seulement a l'arbre de vie par tolerance des fascheries temporelles, signiffiee par le glaue flamboiant, mais par la plenitude de science, cest ascauoir par charite, car il dict: Si ie nhay charite, ce n'est rien que de moy, Cor. 13. Cecy dict S. Augustin en ce passage: Si ne faut pas encor penser que le dict Augustin entende par cela que lon paruienne encor a l'arbre de vie tandis que lon sera en ce monde corruptible mais tant seulement apres que lon en

fera sorti. Nous chrestiens deuons preferer la vie contemplatiue a lactiue, mais ce nonobstant ne deuons pas reiecter lactiue. La premiere nous deuons honorer pour sa dignite, lautre entretenir pour la necessite que nous en hauons, car le subiect de la contemplatiue est sapience, prudence de lactiue. Sapience doit enseigner prudence en vertu, come la mere sa fille; prudence disposer selon que sa mere luy enseigne. Les scauantz gentilz hont este en grande controuerse, laquelle des ij estoit plus desirable. Les philosophes qui nestoient adonnez que a lestude vmbrageux de sapience sans se mesler daffaires publiques preferoient contemplation a action. Les parlierz, que lon nommoit orateurz, qui hauoient tiree philosophie hors des escholes & luy hauoient donne son entregent pour la faire marcher en public, & se fourrer parmi les assemblees humaines afin de les conduire & gouverner donnoient lhonneur a action & pratique, voire se mocquoient des autres le proposantz. Le broccart que vne paouure vieille donna iadis a Thales qui marchant pour contempler les mouuementz du ciel leuoit tellement la teste contre le ciel quil ne vit pas vn fossé qui estoit deuant ses piedz, pourquoy y tumba, & la vieille luy dict: Paouure fol, come pourras tu cognoistre du ciel qui est si loin de toy quant tu ne cognois pas ce de terre quest deuant tes piedz. Se mocquoient auffy de Archimedes mathematicien qui estoit a Syracouse quant elle fut prinse par les Romains; & ce pendant quilz donnoient lassaut & prenoient



Platon.

la ville estoit si attentif a paindre en terre certaines figures de geometrie quil ne se print garde de tout cela, pourquoy fut tue sus le champ par vn soldat qui ne le cogneut pas pour autre que pour vn fol, dont Marcel coronel de larmee fut bien marri. Platon aussy souuerain contemplatif repre-  
noit Dion son principal ami, de ce quil sadonnoit tellement a lestude de sapience quil en perdoit ci-  
uilité & son entregent. Dict aussy en son liure de la chose publique quil ne veut pas que gentz fort contemplatifz soient colloquez en magistrat. Cice-  
ron au liure des offices ou de deuoir dict que toute vertu & louange de vertu prouenant con-  
siste en action & besoigne, allegue aussy le propos de ce tenu par le roy Pirrhus qui failloit philoso-  
pher mais legerement. Vn argument se peut fonder pour les contemplatifz sus vne regle generale ou maxime de philosophie quest: Ce quest pour quelque autre ne vaut pas ce pourquoy il est, ou: La cause dou quelque chose se faict est plus grande que ce que se faict, come (parexemple) le vestement est faict pour lhome; doncques lhome vaut mieux que le vestement, & ainsy de semblable. Et que action soit pour contemplation se demōstre par tel argument: Tout mouuement est faict pour repos. Action est mouuement & contemplation repos. Ergo action est pour contemplation de leternel repos quest Dieu. Mais S. Bernard donne arrest sus ce procez ainsy: que la vie contemplatiue doit estre preferee a lactiue pour sa dignite, & lactiue a la contemplatiue, pource quelle sert a neceffite,  
car de

car de la contemplative s'engendre sapience que discerne le vray du faux, de l'active prudence, que discerne le bien du mal & s'appellent autrement theorique & pratique, & faut que toutes deux servent a charite que consiste en ces deux commandementz, de aymer Dieu plus que soy-mesme & son prochain come soy-mesme, si quil faut que la charite que appartient a l'active ou pratique soit ordonnee & reglee par linstruction de verite, luy monstrant verite, latrempeance de laquelle elle doit user faisant son office, luy reprimant sa colere que tendt a servir aux homes ses prochains, non seulement outre, mais contre le commandement de Dieu, come nous monstrerons par exemple en vn autre lieu.

Charite pour ce quelle est chaude & consequemment soubdaine doit inciter & enflammer verite, que quelquefois par les ambiguites des considerations devient froide, lente & paresseuse a non tant penser mais a besoigner. Nous en havons escrit en noz menues pensees ces carmes & premierement :

*Charite sans discretion  
Est de trop soubdaine action,  
Discretion sans charite  
Foible & de peu d'utilite.*

Pourquoy le dict S. Bernard appelle la charite contemplative affectuelle que doit servir a Dieu tant seulement qui est verite; l'active actuelle que doit servir a la necessite de soy & de son prochain. De quoy aussi nous havons la escrit ainssi :

H.i.



*A neceſſite, dignite  
 Prefere celle charite,  
 Que lon appelle affectuelle  
 Et (par contraire) lactuelle  
 A dignite, neceſſite.*

Nous hauons parle dauantage come les faut at-  
 temperer, diſantz :

*Ordonner par de verite  
 Charite, faut laſſection,  
 Et de charite, verite  
 Enflammer a laſſection  
 A qui dau truy ſauuation  
 Et de ſoy faire eſt incite.*

Car Dieu qui eſt le ſouuerain bien nha beſoin de nouz biens, ni de nouz œuures, veu quil eſt aſſes honore & gloriffie en ſoy meſmes ſans nous. Et ne recoit biens de nous, mais les nous donne ſans quil haie beſoin en hauoir de nous recompense. Toutteſſoys il veut que lhonorons & adorons, luy ſeul ſans autre, non pas pour amour de ſoy qui nen ha que faire, mais de nous meſmes. Et pourtant ce conſiderant il ha eſcrites loix aux homes du deuoir quilz hont a luy ſeul, & puis pour amour de luy les vns aux autres. Et pour declairer le deuoir que lon ha a luy nha eſcrit que ij articles & demi. Le premier eſt que on layme de tout ſon cueur, de toutte ſon ame & de tout ſon eſperit. Le ſegond que lon ne prenne point ſon nom en vain. Le iij<sup>me</sup> commence a eſtre moien entre Dieu & les homes, car il dict que lon ſanctiffie le iour du repos, appelle en hebrieu Sabath, en remembrance de ce quil feſtoit luy reſoſe le vij<sup>me</sup> iour apres quil eut forme le monde. Et pourtant ſont

les homes redeuables a Dieu de lenfuyure ce iour, haiantz vacque la reste de la sepmaine au trauail pour fouruenir aux necessitez corporelles, chascun a par foy & lun pour lautre, ce que Dieu com- manda en partie pour foy mesme, en partie pour le soulagement de ses creatures, car il ne veut pas seullement que les maistres & maistresses se reposent, mais esclaves tant masles que femelles, touz estrangerz, voire les bestes mesmes, en signiffiance du repos eternel, car (come nous hauons souuent dict), Tout mouuement se faict pour son contraire quest le repos. La ij<sup>me</sup> partie consiste toute au deuoir que les homes hont lun a lautre, quest contenue en vij articles, dauantage que ceux qui atouchent a Dieu, en quoy il monstre quil nha que faire des homes, mais bien les homes de luy, pourquoy il veut quilz lhonorent & adorent pour eux mesmes, non pour luy car lhome est cree sus terre pour cela. Et pource ne requiert pour foy laction de lhome, mais lintention tant seullement, pourquoy sont vaines & friuolles tant de ceremonies desquelles lon vse pour penser par elles a Dieu complaire. Et pourtant se doit nommer la charite que nous hauons enuers Dieu affectuelle, mais il naduient pas ainsy entre les homes, car il ne souffrit pas dhauoir affection lun a lautre, mais il faut se mettre en action, en besoin, mettre la main a la paste pour fouruenir aux necessitez les vns des autres a cause de lhumaine fragilite, & doit celle charite estre nonseullement affectuelle, mais actuelle, a cause que de quoy



*Marc xiiij<sup>e</sup>.*

nous sommes animaux de compagnie & pour icelle charite actuelle exercer faut souuent entreposer l'affectuelle. le ten vais donner vn exemple. Ouir la parolle de Dieu est seruice de Dieu, & charite affectuelle, mais si estant au sermon lon rapporte nouuelle come quelcun sest rompue la iambe ou le bras, ie te demande si Dieu sera courrouce contre toy si tu placques le sermon & cours en ta mayson pour y donner ordre? Dauantage si estant la lon crie au feu ou a lallarme si tiendras pour malfaict de laisser le sermon pour y accourir? En ceste superstition estoient iadis les iuifz & sont encor maintenant, qui ne vouloient point rompre leur sabbath pour employer leurz mains pour faire bien a leur prochain ou se garder eux & luy de mal receuoir, voire pour se garder de mort. De quoy Iesus Christ les reprint. Et Vespasien leur fit bien changer de coustume. Et pourtant faut que lhome semploie plus souuent a vser de rayson luy donne pour le gouuernement des choses irraysonnables que pour des raysonnables; car il luy faut treuuer mille moiens pour se garder des dangerz que luy pourroient iournellement souruenir; des bestes cest peu de faict, car elles nuisent sans rayson, pourquoy avec rayson lon se peut delles garder, mais la plus grande garde est de celles que avec rayson combattent rayson, come nous hauons desia dict. Combien que les homes soient creez animaux de compagnie pour souruenir lun a lautre, ilz se guident en sorte que lon diroit quilz le sont pour

foy entredommager. Toutes autres creatures vivent selon ce pourquoy elles sont este formees par Dieu & nature. Le soleil, la lune, les estoilles du ciel s'esmeuvent ainsi come Dieu leur ha establi leur cours sans se deborder ni trespasser les limites quil leur ha donnees, les choses soutzcelestes font le semblable. Le feu brusle & allume come Dieu lha ordonne. Si laer & leauue se desbordent de leur cours ordinaire, ce nest pas en verite contre lordonnance de Dieu non seulement, mais de nature que ce se faict selon le mouvement des estoilles celestes auxquelles ces elementz sont subiectz, semblablement si la terre ne respond par fruit au labeur que nous hauons eu a la cultiuer, ce nest pas trespasser les limites par nature donnees, mais nostre cognoissance seulement. Mais lhome ne regarde ni gue ni planche, mais trespasse les limites a luy de derayson contre rayson, come nous hauons dict; & pourtant faut que lhome soit en plus grande sollicitude pour se garder de lautre home que de toute autre creature, & de tant quil est plus gros maistre de tant plus grande, car il ne leur faut pas hauer soin de leurs persones seulement & de leurz biens forains, mais de ceux de touz leurz subiectz; pourquoy ha failli treuver armeures tant deffensibles come offensibles, car souuent lon ne se peut deffendre sans deuant offendre & faut que le prince seul ou plusieurs pouruoient sus cela & pour seigneurier sus certaine troupe dhomes se rende a eux subiect & plus que esclau, & (que pis est) de toute ceste



troupe toute folle le plus grandt fol, car si diffentions, noyses, & guerre finalement se faisoient entre les homes pour necessite ie le leur comporteroie, mais ce ne se faict fors pour vne folle superfluite & excès, lesquelles commencent aux particulierz & apres se fourre par luniuers, car puis que sommes tumblez, ou nous sommes empainctz plus tost par nostre conuoitise telle que par coustume nous hauons conuertie volupte en necessite, combien que ne leussions pas de nature, y faut que la puissance de rayson deutee pour le gouuernement des choses irraysonnables soit en plus continuel exercice que celle que ne se mesle fors des choses raysonnables pour les guider par le chemin a lautre conduisant, quest a contemplation, car action descendt de contemplation & si faut quelle y retourne, car combien ha on de sollicitude pour entretenir ce corps ie ne dis pas seulement en estre ni bien estre, mais en estre plaisant & voluptueux & encores le plus souuent au dict corps pernicieux, & ensorte que par lestre voluptueux nous nous priuons de bien estre non seulement, mais destre totalement pourchassantz non seulement maladies & autres calamitez, mais la mort quest la fin de toute essence. Vray est que par la coulpe de Adam nous sommes tumblez en de grandes calamitez, mais ce nest rien a respect de cela que nous mesmes nous acquerons. Sans le peche dicelluy la terre estoit tellement attrempee que nous hauions delle fruitz en abondance pour nous entretenir en essence sans aucun nostre tra-

uail ; quant aux vestementz laer estoit si attrempre  
que nous ne sentions froit ni chaut sinon tant que  
a nouz perſones estoit conuenable. Ioinct que ia-  
coit quilz fuſſent eſte exceſſifz, nous hauions corps  
aſſes fortz & robuſtes pour ce ſupporter autant &  
plus ſans ſoufferte que les beſtes. Si faillut labeu-  
rer la terre pour hauoir du pain, ce que ne fut  
pas encor ſi toſt, car encores deſpuys Adam iuf-  
ques au deluge ne ſe treuue que le pain fuſt en  
vſage, & eſt preuuable quil nen y hauoit point,  
combien que l'Eſcritture nen face mention parce  
que encores longtemps apres le deluge nen' estoit *Vin deuant que*  
point, bien dict le Geneſe quil y eut du vin. Car *le pain.*  
Noe planta la vigne, beut du vin dicelle & ſeny-  
ura, mais elle ne dict pas que luy ni autre apres  
luy de long temps ſemaſt le ble, ni peſtriſt du pain,  
ains viuoient les homes de glandtz, & autres fruietz  
haiantz eſcorce, come noix, chaſtaignes & ſem-  
blables & ſappelloit ce ſiecle laage dor pour ſa ſe-  
licite, auquel ſiecle gouuernoit Saturne & ſap-  
pelloit tout le monde alors le royaume de Saturne,  
mais il eut vn ſils nomme Iuppiter qui len de-  
chaſſa, & occupa ſon royaume queſtoit toute la  
terre habitee, & ſubuertit tout le ſimple & ſainct  
mode de viure du temps de ſon pere corrompant  
la ſimplicite dentre les homes, & faiſant entre eux  
germer duplicite & mauuayſes meurz. Les poetes  
ſaignent que ce Iuppiter couppa les genitoires a  
ſon pere, mais les hitoriens Caldiens dient que ce  
Saturne estoit le bonhome Noe, & ce Iuppiter ſon  
ſils estoit le peruers Cham, & ce que les poetes



dient quil coppa les genitoires a son pere estoit que luy qui estoit vn magicien voiant ses genitoires les charma en sorte que iamais despuis il neut generation. Si descrit Moyse assez succinctement la creation & le discours du premier home & de sa premiere posterite, mais Platon monstre en cela quil ha veu nonseulement les liures de Moyse, mais encor dautres Caldiens quil est vraysemblable qui en hont escrit & plus amplement que Moyse, car il se lit en sa vie quil alla en Egypte pour entendre la discipline des Caldees. Et aussy est a presumer que encor quil neust iamais mis le pied la, sans se bouger de son pays il leust bien peu veoir, a cause que Ptolemee Philadelphie, roy dEgypte, hauoit fait tourner toute la Bible de hebraique en grec, & ne peut estre que les Grecz nen eussent quelques doubles & en ha parle plus amplement que Moyse, combien que soutz couuerture & figure de fable, par les raysons que dirons apres le recit du texte de Platon en ij lieux, a scauoir en son Prothagoras, ou du sophyste, & au traicte du royaume.

En Prothagoras ledict Platon raconte come au temps passe nhauoit autre essence que des dieux, sans gentz ni bestes, mais ce nonobstant lesdictz dieux estoient encaintz des idees, cest a dire des proprietiez des choses, & quant vint le temps destine ilz les enfanterent les formantz es entrailles de la terre & du feu estant en icelle terre, & y entretindrent toutes les choses que sont meslees auxdictz ij elementz, mais les voulantz mettre en  
lumiere

lumiere donnerent charge a ij personages nommez *Prometheus & Epimetheus.*  
lun Prometheus, lautre Epimetheus, de la former  
vne chascune sorte ou espece, de la vertu & vi-  
gueur que luy seroit necessaire. Mais Epimetheus  
pria Prometheus son compaignon quil laissast a  
luy seul la commission de ce faire, & quil ny ne  
se meslat que de regarder come il les distribue-  
roit. Ce que lautre luy accorda. Et lors Epime-  
theus se mit en besoigne de ses distributions, &  
garnit aucuns animaux de force & vifesse tout en-  
semble, autres fressles & debiles de vifesse tant seul-  
lement. Il en arma aucuns; aux autres quil laissa  
desarmez il contreuua quelque machination pour  
les pourueoir de sauueté. Aux autres qui estoient  
de petite stature & corpulence il pourueut aussy  
leur donnant plumes & ailes pour voler parlaer;  
a aucuns de si muffer soutez la terre. Ceux qui  
estoient de aucune grandeur il renforca de leur  
grandeur propre, & a chascun animal distribua  
selon sa propriete tellement que rien ni manqua.  
Après afin que les bestes ne se exterminassent les  
vnes les autres totalement, incontreuua des fugi-  
tiues, & afin quelles peussent viure soutez laer sans  
crainte du danger du froit & du chaut, vestit les  
vnes de poil tres espes, les autres de tres dure  
peau, & sus elles fit de ses choses mesmes litiere  
afin quelles se peussent coucher a leur ayse. Il leur  
donna semelles aux piedz, ongles & peaux dures  
en elles incorporees, & finalement donna aux vnes  
pour leur viande herbes, aux autres fructz des  
arbres, aux autres des groselles & aux autres des



menuz fructz des buyffons. Autres il instruisit de manger des autres bestes que nestoient pas de leur espece, mais aux goulues que ne viuoient dautre viande que de chair & de sang il ne voulut donner grande puissance de generation, afin que de leur multiplication ne prouinst diminution & a la fin destruction de ceux dautres especes, ce que encor il delaissa aux autres innocentes pour la conseruation de leur espece. Or fut ce Epimetheus de tant plus chiche enuers lhome quil fut enuers les autres animaux liberal, voire prodigue, nonobstant que les dieux eussent de luy plus de soin que de touz les autres, car il donna tant aux bestes quil neut plus rien pour les homes. Ains laissa lhome nud & desgarni de tout confort & aide. De quoy le dict Epimetheus se treuua fort estonne & marri, & sen grattoit la teste. Prometheus aussy son compaignon qui regardoit come il besoignoit nen estoit pas content, pource que le terme sapprochoit que la terre deuoit produire lhome en lumiere, pourquoy non scauant treuuer autre moien de sauuer lhome que par finesse, il saduifa de desrober aux dieux Vulcan & Minerue qui estoient fourgerons des autres dieux le feu de leur artificieuse sapience, & fit de cela present a lhumain lignage, par lequel moien nous hauons la sapience que nous faiet viure; mais les humains dune autre sapience questoit la ciuile ou citoiene, mais elle nestoit quau donion du chastel de Iupiter, auquel Prometheus nousoit monter, a cause quil y hauoit des gardes fieres & rebarbatiues qui

lespouuentoient. Que fit il donc? Il entra secretement au martinet de Vulcan & de Minerue, ou lon exercoit les artz, & desroba vn art de feu a Vulcan & vn autre a Minerue, quil donna de rechef aux homes, par lesquelz ilz apprirent le mode de viure; si que Prometheus fut puni de ce larrecin pour amour de Epimetheus. Or pource que entre les animaux nen hautoit point qui participast de diuinite que lhome, luy seul pensa quil y hautoit des dieux & leur dreca des statues en forme humaine. Apres a laide dicelluy art il distingua les voix par parolles formant les voix en membres, fit faire robes & acoustrementz, coutres, linceux, couuertures & lietz & semblables, & commencerent aussy les homes a cuillir les fruietz de terre, mais les homes nestoient encor en felicite pour cela, ains estoient esgarez ca & la, & disperz & vagabondes, a cause quilz nhauoient citez, ni villes ou ilz peussent habiter ensemble, & pourtant ne se pouuoient deffendre des sauuagines par leur imbecilite, pourquoy estoient a touz propos delles deuorez. Car puis quilz hautoient esperit asses pour guaigner leur vie, si nen hautoient ilz pas pour se garder, que les bestes ne les leur fissent perdre, veu quilz estoient sans espees, arcz ni autres armeures pour se deffendre, ni lart militaire quest vne espece de ciuilité; pour de la quelle nuyfance se garder sasssemblerent par troupeaux & bastirent chascun troupeau sa cite, pour illec resider en asseurance des dittes sauuagines, mais estantz seurz des bestes, ilz ne le furent pas encor les vns des



autres pource que encores touz tenoient du fau-  
uage, & nhauoient encor point de ciuilité, pour-  
quoy sentreoutrageoient, frapportoient & chassoient  
lun lautre & retournoient les chasser de rechef au  
danger des bestes fauuaiges. Quoy voiant Iuppi-  
ter eut pitie de lhumain lignage, & pourrant en-  
uoia en terre Mercure avec charge de y mener  
honte & iustice avec luy, & les loger entre les ho-  
mes afin quelles les amieillissent & adoucissent les  
vns avec les autres; mais Mercure auant que deslo-  
ger interroqua Iuppiter en quelle facon il forreroit  
iustice & honte entre les homes, disant: Le ferai  
ie ainsy que les artz se doiuent distribuer, car elles  
le sont ainsy. Y seuffit de donner a vn seul home  
lart de medecine, qui apres la distribuera luy  
mesme & ainsy des autres artz? Donnerai ie donc  
honte & iustice ainsy a aucuns particulierz, qui  
apres les communiquent aux autres ou a la gene-  
rallite? Iuppiter respondit: Tu les donras a touz;  
y faut que touz en soient participantz, car les ci-  
tez ne seroient pas citez, si en la facon des autres  
artz peu en hauoient la iouissance, & non pas  
touz. Et pourrant fay vn edict a mon nom que  
quiconque fera vne cite sans honte & iustice soit  
mis a mort come peste publique.

Ceste fable raconte Platon en son Prothago-  
ras de la formation des animaux & de lhome  
principalement, mais la il ha parle du commen-  
cement de la vie des homes apres leur creation,  
mais en vn autre traicte intitule du royaume ou de  
la ciuilité il parle du discours & pratique diceux

du temps quilz estoient en celle simplicité & innocence de laquelle nous parle la S. Escriture, mais il ne nome pas vn seul home come Adam, mais plusieurs ensuyuant en ce les anciens non seulement poëtes, mais theologiens idolatriques qui, iacoit quilz eussent par auentures leue la S. Escriture & les histoires hebraïques, ce quest preuable quilz haient faict a cause quilz hont conuerties en fables plusieurs dicelles histoires (come se dira en son lieu) pource quilz estoient adonnez a la pluralité des dieux, se desdaignoient se tenir aux contes de ceux qui nen adoroient fors vn, & prenoient ce que leur sembloit bon a donner autorité & credit a leurz superstitions & le conuertissoient en fables pour sen mocquantz plus tost eux & auancantz icelles en mocquerie des autres, en quoy Platon les ensuyuoit non pas (come ie croy) a son essien, mais pour peur de, sil disoit la verité apertement, cela luy causa la mort come il hautoit faict a Socrates son precepteur. Et assignoient les dictz anciens pluralité dhomes des leur commencement come ilz faisoient plusieurs dieux, & touz en vn coup produitz au lieu que la S. Escriture nen assigne que vn. Si deduissent la félicité de laquelle lors iouyssoit l'humain lignage de ce temps qui pource estoit nome le siècle dor quilz assignoient estre soubz le royaume de Saturne; parlent aussi come Iuppiter son fils len déchassa, & fit le siècle de fer, &c., come ha esté dict cy deuant, pourquoy nen faut faire plus ample mention. Mais regardons ce que en dict Platon.



Platon donc en ce traicte intitule du royaume, ou de la ciuilité, deuise de la difference de la façon de viure questoit entre les homes viuantz soutz le royaume de Saturne, & de ceux qui hont depuis vescu soutz Iuppiter son fils. La ou (selon Marfile Ficin qui lha tourne de grec en latin & escrit sus vn chascun traicte son argument) il entend par Iuppiter lame du monde qui par loy fatale dispose de lordre du monde tel que nous le voions. Et pourtant veut que la vie de lesperit des corpz elementaires, telz que nous voions, soit iouiale cest a dire prouenante de Iuppiter quest toute adonnee aux sentementz & action. Mais pour Saturne il entendt lentendement souuerain entre les anges ou lintelligence que nesclarcit pas seulement les ames humaines par ses raiz, mais les ames humaines & non seulement les esclaire, mais enflamme & incite a fuyure continuellement de tout son pouuoir, intelligence & vie contemplatiue, lesquelz ce pendant quilz viuent ainzy lon dict viure soutz le royaume de Saturne. Si dict Platon que nouz anciens peres qui sont estez nez incontinent apres la premiere reuolution du monde (a quoy, dict il, lon nadiouxte pas foy, combien que on la deuroit bien adiouxter) hont raconte come la chose fut passée, quest que les premierz homes ne sengendrèrent pas lun lautre, mais prouenoient de terre, ce que fut faict par le benefice du cours du ciel questoit soutz Saturne, & dauantage outre lheureuse naissance quilz hauoient par le dict benefice nhauoient pas moins heureux entrete-

nement de leur essence par boire, manger, dormir & autres choses pour cela requises; car Dieu, auteur de ceste reuolution, donna le gouuernement dune chascune region du monde a aucuns dieux, assignant a chascun deux chascune province. Le genre aussy des animaux hauoit pour pasteur vne chascune troupe vn esperit appelle Dæmon, que nest pas ce que communement lon nome vn dyable, come plusieurs extiment, car vn dyable sappelle bien Dæmon en grec, mais y signifie aussy bien vn autre bon esperit que nous appellons ange, car Grecz noment touz esperitz tant bonz que mauuayz *Δαιμονας*, cest a dire intelligences & plus souuent a la bone part que en la mauuayse, car la distinction y est que les bonz ilz nomment *ευδαιμονας*, cest a dire bones intelligences, les autres *κακιδαιμονας*, cest a dire mauuayses; mais icy Platon entendt des bones, disant quilz faisoient bien au monde, car la nature des autres ne porte pas de bien faire. Si presidoit Dieu sus touz, a cause de quoy au monde nhauoit aucune cruaute, tyrannie, rapacite, gloutonnie, ni sedition, ni guerre consequemment, ni dautres maux infiniz desquelz le monde ha este tormente despuys. Et encor tant que concerne a la facilite de viure & de leur liberte, ilz lhauoient pource que Dieu les païssoit & gardoit come leur pasteur tout ainsy que les homes de nature diuine sont pasteurs des bestes. Aussy pource que Dieu gouuernoit les homes ilz nhauoient aucunes constitutions ni loix en leurs citez, ni payz. Quil que plus



est, aucune coniunction dhomme & de femme par mariage afin de procreer des enfantz, a cause quilz estoient produitz de terre, & en terre retournoient, & puis reuiuoiẽt & retournoient sus terre, mais quant ilz y estoient ilz nhauoient plus de souuenance du passe, si quilz nhauoient besoin de tout cela. Ilz hauoient aussy a foyson de blez, herbes, pommes, poires & autre fruitage pour leur nourriture, que la terre leur produisoit sans contraincte daucun labeur. Si alloient nudz se paistre ca & la sans estre empechez daucun vestement le plus souuent, ce que bien ilz pouuoient par lattremprance de laer, que leur hauoit acoustre des liẽtz pour se coucher, quant le sommeil les assailloit, dessus terre de belle herbe verte. Mais apres que le royaume de Saturne sout en periode Iuppiter commença son cours qui fut a lautre tout contraire, car le souuerain retourna en soy mesme abandonnant les homes & les autres dieux, & les entendantz esperitz firent le semblable se retirantz dentre les homes chascun de son quartier. Et apres le monde se resschiffant de son premier cours tout au contraire, dreca de grandtz tremblementz de terre, par lequel esbranlement la plus grandt part des animaux qui estoient sus terre perirent. Apres que ce eut vn peu dure, il cessa, & se desportant le monde de ces esclatz bruiantz & horribles retourna en cours ordinaire, se restablit en son ordre & autorite premiere & reprint ladministration & gouuernement de soy mesme & de toutes les choses questoiẽt de soy, suyuant de tout son pouuoir ce que

*Saturne haiaint  
acheue son pe-  
riode Iuppiter  
commence son  
cours.*

ce que luy fouuenoit de la facon du gouuernement de son autheur & pere. Et fit du commencement assés, mais par succession de temps il fourligna beaucoup de suyure les paz de son dict pere, & en fut cause la nature corporelle contaminee par la premiere nature, car deuant que Dieu eust dispose le monde, tout estoit laidt & difforme, iusques quil fut embelli de lordre du present. Si que le monde tient tout ce quest en foy de bien de son edificateur, & par le contraire, touz les maux, toute iniustice & touz vices, & consequent toutes incommoditez & calamitez que pour la punition diceux prouiennent soutz le creux du ciel de sa deformite premiere, & en ha faict a toutes choses viuantes participation; pourquoy ce pendant que le monde avec laide de son gouuerneur conduit ses animaux; il auance du mal peu, du bien beaucoup, mais quant il se desioinct dauec luy du commencement de son despart, il faict encor assés bien & iustement, mais par succession de temps il oublie cela, quest cause que le vice de la premiere defformite domine plus amplement & vehementement, & finalement apres long espace de temps decale & procreant de biens peu & encores parmy ce peu de bien faisant mélange de maux infiniz tombe en danger de perir & luy & tout ce quest en luy. A cause de quoy Dieu autheur iadis de ce ordre, cognoissant le monde estre en tel danger, ha de luy pitie, & afin quil ne se desioigne par tel trouble & tumulte, & soit plonge au lieu de dissemblance infinie de re-



chef luy assiste, & reprent le gouuernement d'icelluy, reassemble & reunit & orne tout ce que par son furieux mouuement il hauoit guaste, dissipe & dispers, & le garde de mort & de vieilliesse. Mais il ne retourne plus le monde ni ses parties en leur premiere perfection, car il n'ha plus voulu que les animaux nasquissent de terre par causes faidantes lune a l'autre, mais que ce fust par generation. Finalmente il ne voulut plus que les homes vesquissent plus ainſy ſans ſoucy ni trauail, mais permit quilz fuſſent aſſailliz par les beſtes ſauages & dicelles le plus ſouuent deuorez. Semblablement ne volut pas que la terre les nourriſt ſans trauailler, ce queſtonnoit mout les homes qui hauoient eſte nourriz ſi mignardtz quilz ne ſcauoient que ceſtoit que de labeur, ni conſequemment de ſollicitude, pour a quoy ſouruenir les dieux enuoierent Prometheus & Epimetheus qui firent aux humains les preſentz de feu, come deuant ha eſte dict; apres quoy les vns ſemerent le ble, les autres planterent vignes, & (bref) furent treuuees toutes les artz. Voyla les ij fables de lorigne & diſcours, des leur commencement des homes, auancees par Platon, queſt vne eſcorce ſoutz laquelle eſt cachee verite. Et croy que (come ihay deuant dict) il hauoit leu les liures de Moyſe, & en euſt parle plus a plain ſelon la verite ſil ne uſt eu peur quil ne luy en aduinſt come a Socrates ſon maistre, ſi que luy & des autres philoſophes tout plain eſtoient Nichodemites, car (come dict S. Auguſtin au . . . . . de la

cite de Dieu) les philosophes en leurz escholes estoient separez du commun ou peuple, mais ilz estoient d'accordt aux temples & sacrifices, & pource Platon conuertit lhistoire mosaique en fable, de laquelle se peut faire vne belle allegorie, luy roignant les cheueux & les ongles, selon que Iethro conseilla a Moyse son gendre, deuant que espouser femme infidelle, signifiant que qui veut mesler la philosophie gentile avec la chrestienne luy doit deuant roigner les cheueux & les ongles, quest a dire les superfluitez que ne sont en edification, & que sont extraictes de idolatrie, & apres la loger hardiment en la cour de philosophie sacree, pour a icelle seruir, ce que ferons de present.

Or donc resequons premierement ce quil dict de la pluralite des dieux qui estoient encainctz des animaux, & entendons que cela soit vn seul Dieu, vn en trinite & iij en vnite, ce que peut hauoir esmeu Platon a en entendre plusieurs, car par son vj<sup>me</sup> liure de la chose publique se monstre que sil nha eu cognoissance de la trinite entierement il sen est bien approuche, voire (iouse bien dire) quil en parle plus clerement que ne faiet la S. Escriture en tout lAncien Testament, car la il monstre quil cognoist le Pere & le Fils pour le moins come nous hauons declaire en nostre aduis & deuis de la deffense de la foy chrestienne. Ce bon Dieu donc, vn en trinite, & trine en vnite, estoit encainct non pas des seulz animaux, mais de toutes choses, car il hauoit comprises en soy mesme tout-



tes les proprietéz du monde & de ses parties, que Platon mesme nome idees, & se delibererent ce vn en trinite & iij en vnite de ce mettre en auant pour leur gloire. Le Pere voulut que sa puissance fust monstree en la creation des choses, le Fils que sa sapience en l'ordonnance dicelles, le S. Esperit que sa bonte en l'usage, & ainsy se mirent a creer le monde & ses parties, & haiantz cree le ciel & la terre & toute la reste mit ame au monde que se peut appeller nature la quelle est diuisee en ij parties; lune s'appelle auant pouruoiance, l'autre apres pouruoiance, nomees en grec la premiere Prometheus, la ij<sup>e</sup> Epimetheus, qui estoient compagnons, toutesfois de diuerz offices. L'office de Prometheus estoit de viuifier le monde en general, de Epimetheus de viuifier les parties dicelluy, vne chascune a par soy, & leur donner vertuz pour entretenir non seulement en estre mais encor en bien estre. Ce que se monstre par la Genese disant que Dieu commanda a la terre quelle produisist toute herbe & tout animal, ce quelle fit par la vigueur de lame de auant pouruoiance quil luy hauoit donne, que se peut appeller Prometheus, & apres ce apres pouruoiance, cest a dire Epimetheus se mit en auant pour former & animer icelles parties, mais il donna tant aux autres animaux quil ne retint rien pour l'home, mais Prometheus, cest a dire l'auant pouruoiance diuine, print le feu qui estoit au martinet commun a Minerue & a Vulcan, desquelz lun, ascauoir Minerue, estoit estimee par les poetes deesse de sapience & nee du

cerueau de Iuppiter, l'autre Vulcan, fourgeron des armes des dieux, cest a dire le feu de la sapience de son fils qui allume le feu du S. Esperit qui enflamme & art par sa bonte, & en viuiffia lhome, donnant a son entendement la puissance de contempler & speculer le souuerain bien quest Dieu & lalluma pour ce faire, & enflammant & incitant sa volente a ardent amour dicelluy, volant quilz ne sempeschassent tous deux dautres choses come nous hauons souuent dict; mais Prometheus (non pas le celeste come nous hauons dict), mais vn autre se transformant en guise dicelluy sortant denfer, que fut le serpent, se fust volentier essaie de desrober le feu des artz pour en fournir lhome, mais pource quil estoit au donion du chastel de Iuppiter ne soufa hazarder de y entrer, mais au lieu de icelluy sen descendt en enfer ou hauoit aussy des Vulcans & des Minerues fourgerons avec le feu infernal, apportant a lhome dicelluy feu qui lenflamma & incita a manger du fruiet de science de bien & de mal que luy fit oublier la lueur & ardeur de celluy que Dieu hauoit en luy mis. A cause de quoy le dict Prometheus, quest a dire le serpent, fut puni & priue de voix come hauons cy deuant dict apres le Genese que lhome non content de ce que Dieu & nature luy hauoient donne se pensa par lenhort du serpent de faire des œuures pour sentretenir en estre & bien estre aussy bien que Dieu & estre faict esgal a Dieu, scachant le bien & le mal come luy. Il se fasche incontinent de manger de glandtz, de cha-



staignes & telz fruietz haiantz escorce & aussy de lherbe simple & toute verte, come nature la luy hauoit produitte, de boire de leauue dune clere & fresche fontaine, mais pour hauoir du pain pour manger plus deliccatement sema le ble, & apres quil hauoit germe du fruiet a maturite le moyssonna, apres quil fut moyssonne le faillut porter en la grange & la le battre, estre battu le porter au moulin, apres le moulin le pestrir, apres estre pestri le faut mettre cuire au four & apres le manger. De la vigne semblablement, y la faut planter premierement avec grandt paine, & combien faut il hauoir de paine apres, deuant que arroufes du vin ton gousier? & aussy des autres choses appartenantes au boire & manger, & vestir tant seullement, ce que nous estoit pas necessaire par nature, mais coustume les nous ha rendues necessaires, mais ce nest pas asses de cela; par lenhort de ce mauidict serpent nostre volente se veut esgaller a Dieu, & pource quil excelle se veut faire excellente vn chascun home sus les autres de son troupeau, ce que ne sert de rien a entretenir lhome en estre non seullement mais encores en bien estre; que sont richesses, honeurz, pompes & semblables qui sappellent biens de fortune ou externes, a cause quilz nappartiennent en sorte du monde a lhome ni au corps dicelluy exterieurement, ni a lame interieurement, car par richesses, honeurz, pompes, dignitez & semblables, le corps ni lame humaine ne sont pas moins grands aux desirs de lhome que lappetit de manger & boire, mais le sont dauantage & ha-

zardent les homes plus souuent leurz persones pour cela que pour le boire, ni manger, ni destre vestu, & hà tousiours este la racine de touz maux *P. ad Timoth. II.* come bien ha dict lapostre, & singulierement du capital de touz les maux quest idolatrie, car aux homes nha souffit de se faire drecher statues & adorer pour dieux, de quoy Belus fut linuenteur, mais encores hont faict le semblable aux causes que les faisoient adorer, questoient les biens de fortune, come les richesses, honeurz, monoie & semblables, si que plusieurs adoroient les bestes & autres choses non seulement profitables mais dommageables : les profitables pour impetrer delles du bien, les dommageables afin quelles ne fissent du mal, leur faizantz figures corporelles, imaginees selon la qualite quelles hauoient, come ilz attribuoient deite a la sieure, a peur, a guerre & semblables, mais sus toutes les autres qualitez deifiees ilz hauoient la cause dicelle en singuliere reuerence, combien quelle fust & soit instable & inconstante, pource quilz se pensoient quelle fut dispenseresse de touz biens & maux du monde, en sorte que apres que les empereurz furent deuenuz chrestiens & que Theodosien & Archadien eurent commande que lon abbatist a Rome les idoles, le prefect de Rome Symmachus, grandt aduocat dicelles supportoit encor paciemment la ruine des autres, mais de ceste icy il se depacientoit disant *Theodosien & Archadien, empereurz, destructeurs des idoles.* en vne harengue quil fit pour ce aux dictz empereurz que cestoit tresmal faict & ingratement de traicter ainsi celle bone dame de la quelle eux &

*Theodosien  
& Archadien,  
empereurz, de-  
structeurs des  
idoles.*

*Symachus pre-  
fect de Rome,  
aduocat des  
idoles.*



*S. Ambroyse &  
le poete Pruden-  
ce contre Sym-  
machus.*

le peuple Romain tenoient la souuerainete des choses, mais le bon S. Ambroyse, lors euesque de Mylan, & le poete Aurelius Prudence le rebarberent par leurs escritz, come vous treuuez dedans les epistres du dict Ambroyse & es œuures de Prudence. Et encores leurz poetes mesmes gentilz se mocquoient de ceux qui ladoroient, & entre les autres Iuuenal, qui dict en lune de ses satyres :

*Iuuenalis.*

*Nullum numen habes, si sit prudentia. Sed te  
Nos facimus fortuna deam, caloque locamus.*

Quest a dire :

*Tu n'haurois fortune, puissance  
Si homes hautoient prudence,  
Mais ilz cuident par leur simpleesse  
Qu'au ciel soies haute deesse.*

*Viues de prin-  
cipiis philoso-  
phia & de veri-  
tate fidei  
christiana.*

Platon ha declaire le discours de cela fabuleusement, mais Iohan Loys Viues, home en subtilite desperit segondant seul a S. Augustin entre les Chrestiens au moins a mon iugement sans figure ni fable, declaire cela amplement en deux traictez quil ha faictz, lun de la premiere philosophie, lautre de la verite de la foy chrestienne. En son premier liure de la premiere philosophie, il dict que nature nous ha este si benigne quelle nous ha deliure promptement ce quelle scait nous profiter, & ha faict des choses singulieres que noz yeux hont veues, noz oreilles ouyes, & tous noz autres senz ou sentementz faisantz vn chascun son office hont cogneues, sus quoy nostre pensee, dict Mens en latin, ha faict des enseignementz generaux & vniuersels, & apres quelle les ha eu ensemble col-

ble collationez & quelle nha veu que aucune chose semblable luy haie este contraire, elle les ha prononcees pour infailliblement veritables, combien que cela se treuve le plus souuent incertain, a cause que les choses se changent selon les lieux & les tempz, & sen treuve beaucoup de fausses que hauoient des longtemps este receues & adouuees pour vraies entre les plus scauantz, mais (quelles quelles fussent) aux homes quelles fussent consignees & distribuees de main en main, combien que ce soit peu a respect de nostre indigence, car tout ce que les homes scauent nest rien a respect de ce quilz ignorent. Nous entrons en la cognoissance des choses, mais par ou? par les portes des senz ou sentementz corporelz, car nous hauons, cognoissons & iugeons des senz ou sentementz de la phantasie & de la pensee, nous cognoissons par la veue les couleurz, par louye les sonz, par le taster le chaut & le froit, &c. Vray est que nostre pensee selseue quelquefoys dessus les sentementz, mais non pas sans estre sus eux appuiee & soustenue tout ainsy come vn home estant en prison si obscure quil ne peut veoir la clarte si non par quelque canoniére, encor bien haute, si quil ne y peut paruenir, sinon pour monter sus quelque banc ou escabelle que le geollier luy permettra de grace speciale. Et pourtant peut bien iuger la pensee autrement que le sens commun ne luy rapporte, mais non pas cognoistre come font plusieurs iuges perilleux, qui donnent la sentence deuant que hauoir veu les actes. Et nous en voions

K.



lexperience a touz propos, daucunes gentz desprit debile qui sans hauoir veuz corone ni septe pensent estre royz, & dun roy qui se pensoit estre beste come Nabuchodonosor. Ainsy faict souuent la pensee, que comprend plus de choses quil ni ha en essence par nature & les faict produire, come nous voions par exemple quotidien de noz painctres, qui forment des Chimeres que ne furent iamais en essence. Lantiquaille, dicte ainsy pource que lon lha extraict des antiques painctures, come des testes denfantz que hont des aelles, & plusieurs telles choses. Ces liures que lon appelle romans, deuissant de plusieurs cheuallierz & de leurs prouesses, qui par auenture ne furent iamais en estre. Les priuations ne sont pas en essence des choses, ains par le contraire, car priuation nest fors vne mutation destre en non estre, come (par exemple) aueuglerie nest que vne mutation de veue en non veue, & (conclusio) beaucoup de conceptions sont en noz pensees que ne sont pas es choses. Et pourtant quant nous disons, cela est, ou non est, nous ne mesurons pas les choses selon leur estre, ni les iugeons selon cela, mais selon laduis de nostre pensee, dou vient que nous iugeons souuent bon ce quest mauuays, & mauuays ce quest bon. Si ne nous souffit pas nous seruir des sentementz come de noz subiectz pour rapporter au iugement & cour de rayson ce que lesdictz obiectz leur annoncent, mais les suyons come noz seigneurz ou capiteines, prononcantz selon ce que leur semble communement, combien que nostre pensee ordonne le contraire;

pourquoy combien que nous faisons & disions des statutz selon nostre iugement, si ne les pouuons nous tirer deuant la cour dicelluy, car nous ni nostre iugement ne les pouuons faire autres quelles ne sont, pourquoy me merueille de plusieurs qui non seulement se combattent par parolles, mais par faictz, tant en particulier come en general, iusques a guerre ouuerte pour vouloir lun maintenir vne chose estre vraie, lautre quelle est fause, des choses que ne se peuuent pas comprendre par sentement, veu que des choses sensibles nous ne pouuons pas iuger sainement, & haïssons a mort ceux qui ne sont de nostre sentence. Lon se doit pas combattre pour deffendre le vray contre le faux, mais le bien contre le mal, sinon que du faux sortist le mal, que nous sente estre mal par sentement, mais du vray & du faux laissons en iugement a Dieu. Il ne faut pas a lhome pour son sauement beaucoup de regles de verite, il souffit quil ayme Dieu plus que soy mesme, & son prochain come soy mesme. Faisant cela, & taschant d'attirer son prochain a Dieu & a foy par exemple de ce bien faire, si celluy qui faict cela ne voit la verite en ce monde, elle luy relaira en lautre, car lon treuve plus tost verite laymant que la cerchant; mais de cecy nous parlerons plus a plain en vn autre lieu, & pour maintenant retournerons a nostre propos, car il nous faut declairer come la phantasie peut guaigner & extraire des sentementz. Deuant le sens ou sentement faut que soit le sensible, quest a dire, ce que se peut sentir. La



phantasie donc extraict du sensile son subiect, cest a dire suppost, veu que sil ni ha des obiectz les sentementz ne peuuent exercer leurz offices, les couleurz sont les obiectz de la veue, les sonz de louie, le corps du touchement, le flairer des senteurz ou odeurz, les saueurz du goust. Ostes les de deuant linstrument des sentz, ilz nen presenteront point a la phantasie, car quant le sentement par linstrument de la veue, quest loeil, represente vn lion a la phantasie, elle cognoit par la forme dicelluy son essence quest dun lion. Le semblable est des autres sensiles, & ce sans aucun rayonnement ou ratiotination, mais souuent elle se treuve abusee, pource que les sentementz se font par la semblance des accidents ou euenementz, cest a dire de cela que fouruient aux sensiles, come (par exemple) mettez vn baston entier & droict aupres dune eauue, & regardes dedans leauue il vous semblera courbe ou rompu, pource que au baston est adueni estre imprime en chose de contraire forme a son essence, come se lit aussy dun painctre si ingenieux quil pourtraist des rayfins au vif de telle sorte que les oyseaux voloient vers eux pour les manger, come filz fussent este rayfins naturelz, & ainsy de plusieurs autres.

Cecy traicte Viues en sa premiere philosophie, que nous hauons expose en gauloys au mieux que hauons sceu & peu, y adiouxrantz ce que nous a semble bon a lauancement de la matiere. Mais en son traicte de la verite de la foy chrestienne il declare les iij vertuz de lame humaine que la

font differer des bestes, come nous hauons aussy cy deuant expose; & apres deuise des choses inuentees entre les homes par la puissance de lame pratique, ce que interpreterons aussy. Si dict laquelle Mens, ainsy appellee par les Latins que Grecs appellent *vous*, que se peut interpreter en nostre language pensee, ha ij offices. Lun par lequel elle tendt a bien ou a mal, quest la volente; lautre que linforme de ce quest bien ou mal, & enseigne come elle se y doit gouuerner, quest lentendement. La volente croit quelque foys oui, quelque foys non, a cause quelle nha point de qualite en soy mesme, mais demeure telle que cela a quoy elle sadonne; si il est bon, elle vient bone; si mauuays, mauuayse. De quoy lun sappelle vertu, lautre vice, quest certes vne grande escorcherie desperit, quant lentendement iuge lun, & la volente desire lautre, & est proprement vne guerre que se peut appeller plus que ciuile ou citoienne, car guerre citoienne se faict entre plusieurs personages diuitz, car lun nest pas ce quest lautre, combien quilz soient dune cite ou dun pays, mais ce combat se faict dedans vn seul corps, dedans vn indiuis, pourquoy se peut adroit appeller guerre plus que citoienne. Ce que bien a exprime Medee ouidienne ainsy :

*Video meliora, proboque  
Deteriora sequor.*

*Medæa  
Quidiana*

Cest a dire :

*Par le malheur auquel ie suys  
Ie iuge bien & le mal suy.*



En l'entendement humain aussy quant on ne lexcite sourcroit ignorance, mere de follie, & quant on lexcite come s'appartient il engendre ce que Latins appellent Peritiam : nous le pouuons exposer, expertise; queſt en l'home vne pure lumiere quant on lexerce en bien, quant en mal il en prouient vne peruerſite & corruption, telle queſt vne forte dhuyle tellement mixtionne par les enchanteurz quil engendre de ſa lumiere diuerſes fauſes images que font reſſembler ce que neſt, come de ſerpentz, tygres, lions, rayſins, riuieres & ſemblables qui ſe monſtrent en la paroy, combien quelles ne ſoient en leſperit que nous hauons commun aux beſtes. Les ſentz interieurz des beſtes ſont imagination, phantaſie, extimation & memoire. En nous viennent de ce diuerſes affectionz de l'opinion du bien & du mal preſent & aduenir, ioye, regret, conuoitiſe, peur, & dautres quil neſt beſoin traicter pour maintenant. Apres au corps ſont aussy des ſentementz interieurz que ſont, entierete, purite, vigueur, puissance, ſante, fermete de corps, & le playſir eſpanche par tout le dict corps. Cela nous vient de dehors pour la conſeruacion de noz dictz corpz, veu quilz en ſont compoſez & augmentez, a cauſe que nous tenons des iiij elementz, queſt neceſſaire pour preſeruer & entretenir la dicte compoſition en partie, en partie pour la rabiller quant elle commence a ſe deſioindre par maladie. Par leſquelles choſes vn chaſcun des ſentz eſt particulierement chaſtouiſſe des voluptez a luy conuenables par mouuement a luy ſouef &

amiable. Cecy dict Viues. Aristote dict quil y ha ij sortes d'occupations en lentendement humain, ascauoir a se mesler des choses naturelles, quil appelle *Φυσικῆς*, & aux choses par les homes y adioutees, quil appelle *θεσικῆς*, cest a dire posees. De quoy Viues nha faict mention, mais ce non-obstant il declare sus ce Aristote sans le nomer, disant que nous ne nous sommes contentez des biens de nature, mais y hauons adiouxte du nostre beaucoup. Et premierement par la tendresse & imbecilite de noz corpz nous hauons este necessitez de faire habillementz, bastir maysonz & villes, fourger hostilz & instrument pour labeurer la terre & presques la contraindre a nous rendre fructz avec vsure, come le creancier vsurier faict a son debiteur. Et nha pas este asses : pource que chascun dentre nous nhauoit pas force asses de soy-mesme pour executer cela, nous y hauons pris des coadiuteurz, daucuns que hauons tenuz pour compagnons, des autres pour seruiteurz & quelque-foys esclaves; iusques que hauons extorque par force de guerres seruitus contrainctz daucuns personages priz a la guerre que nous appellons esclaves, desquelz nous vsons & abusons come de bestes par nous achattees, ce quest contre linstitution de nature, que nous ha produitz animaux de compagnie en esgallite sans que eussions a fouller les vns les autres, & nous ha donne la parole, ce quelle nha faict a aucun autre animal, messagere de la pensee dun chascun animal raysonnable lun a lautre pour par ce moien nous en-



tretenir en compagnie par bienueillance de lun a lautre. Apres cela nature nous ha incitez a hauoir generation pour conseruer noltre espece come les autres animaux. Et pource hauons volu hauoir des femmes que nous procreent des enfantz, & acquerons par noz dictes femmes dès affinitez, par les enfantz consanguinitez & prochainetez, & sommes alliez par mutuelle charite & en compaignie. La consanguinite ha cause congregations & assemblees dhomes, que fut cause dediffier villages tout en premier, & apres des villes, & finalement des citez, & ce nonseulement pour conioindre les homes, mais encor affin quil se fouruinsent & aidissent les vns es autres pour les maux & necessitez que pourroient entre eux aduenir. Despuis croissant le monde, la malice ne descroissoit pas, mais augmentoit quant & le temps, pour a quoy obuier faillut faire des loix, & pour la conseruation dicelles & de equite ordonner des magistrantz, avec puissance pour refraindre a force les meschantz, afin de les garder de fouller les gentz de bien, & ne souffisoit pas de garder & preseruer les gentz de bien dedans vne ville, car il y hauoit dautres villes que sacheminoient a les dommager, & nonseulement les particulierz dune ville, mais le general. Pour de quoy se garder les armes hont este treuuees, & ha faict guerre la multitude armee. Et estoit celluy qui hauoit aide a la multitude par sa vaillance prise & honore, tant pour le mercier que pour donner aus autres exemple dainsi faire. Or les homes pour comuniquer ensemble se

semble se aidoyent du commencement de commutation, troquantz les marchandises les vnes contre les autres come se faiēt encor aux temps present aux terres neufues, mais pource que ce estoit trop malayse & difficile de apparier lune chose a l'autre en telle esgallite que rien ne se manquaſt, fut treuve l'usage de la monnoie appreciante toute marchandise, que pource se nome en latin nummus, de νόμος en grec que signifie loy, pource que la monnoie est proueneue de loy humaine, non de nature. Or ne fut pas asses, pource que l'home conuersant avec les autres homes par certaine naturelle semblance quil ha a Dieu qui est excellent (combien que luy haie corrompue ladicte excellence) ha encores retenue certaine estincelle dicelle, quest conuoitise d'exceller, plusieurs se sont acheminez a ce faire; mais quottidienne experience nous monstre au doy come nous hauons telle semblance corrompue en vsantz en partie follement, en partie meschamment, & le premier exemple nous hauons du premier home nostre auant pere, qui par appetit d'excellence se vollut esgaller a Dieu, mais come il luy en print & a touz nous pour amour de luy nous hauons asses declaire, mais despuis encor nha pas cessée ceste conuoitise, car despuis alors iusques a present chascun en ha este attainct, mais non pas come s'appartient a s'approucher par excellence du bien souuerain, mais peu ou presque nulz nhont entendu nonseulement quel estoit le souuerain bien, mais le plus bas, a cause que colloquons le bien

*Iustice commutative.*



en choses vaines & friuoles; car les vns mettent l'excellence du bien en beaute corporelle, les autres en force, les autres en hardiesse & buttins, pillages, rapines dicelle prouenantz, & pour a ce paruenir ne demande que guerres homicides, meurdres, brusleures & espendement de sang, & toutes autres cruelles meschansfettes. Les autres le mettent en ieux, les autres en noblesse de sang, aucuns en non rien scauoir, mais viure come bestes du iour a lendemain. Autres aussy sont en queste d'honneur, & nonseulement veulent estre honorez en leur citez & payz, mais es estranges fort lointains de eux, voire apres leur mort perpetuellement, ce que s'appelle gloire. Et hont treuue plusieurs marques & signes des dictz honneurz & excellences tant muetz que parlantz. Des muetz: descouuerture de teste, agenouillementz deuant les petitz a vn genouil, deuant les grandtz a deux; baisementz de mains & de piedz. Des marques parlantes, si cest a ecclesiastiques, au pape le souverain Sanctissime, aux cardinaux Reuerendissimes, aux euesques Reuerendtz, &c.; si cest aux seculierz, Serenissime, Inuictissime, Illustrissime, &c., que sont tiltres a Dieu seul appartenantz; douz sont prouenuz maux infiniz, premierement guerres & touz maux que lon voit de guerre proceder, & idolatrie quest encores pires, que ha iadis tempeste par tout le monde excepte en la nation hebraique, & ce despuis le deluge iusques longtemps apres la passion de Iesus Christ, desquelles idoles Belus fut le premier adore, come nous hauons

desia dict cy deuant, auquel se sont priz plusieurs royz & empercurz, qui se sont voulu faire adorer, come Alexandre le grandt, qui ayma mieux ressembler sans lestre, bastard dun dieu, que fils legitime dun roy, & acquerir blasme a sa mere pour vne sienne vaine gloire, se disant bastard, de quoy il ne mentoit pas, car il lestoit, mais non pas dun roy ni dun dieu, ains dun paillard de prebstre appelle Neptanabus, & ce nonobstant se portoit pour fils du dieu Hammon, & volut encor en son viuant estre deiffie. Herode aussy se voulant faire adorer come Dieu immortel ne seiourna gueres apres a se desmentir, monstrant sa mortalite par mort plus cruelle & villaine que la commune, come vous treuuez en Iosephe. Ce firent dautres royz beaucoup, mais singulierement les empereurz, come vn Caius Caligula qui hauoit delibere exterminer la nation iudaïque, pource que a lexemple des autres obeissantes a lempire Romain, ilz ne luy vouloient attribuer honeurz diuins. Domitien aussy fut si impudemment glorieux quil faisoit escrire a la queue de ses lettres patentes : *Dominus & deus noster sic fieri voluit.*

Alexandre le  
grandt, & son  
outrecuidance.

Herodienne  
outrecuidance.

Caius Caligula  
& sa folle  
outrecuidance.

Domitien & son  
outrecuidance.

Maintenant cela nha pas lieu entre les Chrestiens, sinon au siege papal, duquel le possesseur se porte pour Dieu en terre, se faisant bayser les piedz, ce de quoy lon ne pourroit plus faire a Iesus Christ fil estoit sus terre, de quoy nous parlerons plus auant en vn autre passage; mais aduifons maintenant quelle est la fin & le but de toutes choses ! Si sappelle fin & but ce a quoy tout



*Erreur des  
actifz.*

besoignant pretendt, car ce seroit besoigner contre nature, besoigner sans pretendre a quelque fin, & doit estre la fin premiere en intention & derriere en execution, mais les operations humaines ne sont faictes pour vne fin si simple, ains pour plusieurs se rapportantes lune a lautre. Mais il en y ha vne souueraine a laquelle toutes choses se doiuent rapporter & la sarrester, quest Dieu, le commencement & la fin de toutes choses, qui sappelle le souuerain bien, pource que toutes choses desirent le bien, come dict Aristote au commencement de ses Ethiques. Mais peu de gentz se treuent qui tendent a ce but, en partie par affection, en partie par ignorance; les actifz par affection, les contemplatifz par ignorance. le metz lexemple des actifz. Voyez vn marchand qui bastit vne nauire, mais pourquoy? Pour nauiguer. Ce nest encores la fin. Pourquoi veut il nauiguer? Pour apporter de marchandise dautre pays au sien. Pourquoi la veut il porter? Pour se faire riche. Pourquoi se veut il faire riche?... La git la fin, non pas telle quelle deuroit estre, quest pour paruenir au souuerain bien quest Dieu, mais a dautres diuerses, selon lopinion ou affection dun chascun. Les vns le veulent estre pour acheter bonz & friantz morceaux, bonz vins delicatz affin den remplir leurz bedaines; les autres pour sacoustrer brasuement; les autres pour sacquerir damiz beaucoup; les autres pour se venger de leurz ennemis; les autres pour acquerir grande domination, come nous hauons dict cy dessus;

les autres (qui sont les pires) ne hont viser a autre fin ains au commencement mesme quest richesse, quest contre lordre de nature, come nous hauons cy deuant dict, car ilz nen vsent point ni pour eux ni pour leurz prochains, ains hont condemnee leur richesse a pryson perpetuelle, quest autant profitable come si elle estoit au plus profondt de la mer, & (bref) touz ceux cy viuent & meurent sarrestantz au bien le moindre de touz, sans vouloir tirer plus outre au souuerain.

Touchant aux contemplattifz, qui estoient les philosophes desquelz la plus part mesprisoit toutes richesses & honeurz pour senquerir de verite deuant la venue de Iesus Christ, ilz hont cerchee la fin de toutes choses quilz appelloient le bien souuerain, mais pource quilz ignoroient les principes ou commencementz, ilz le faisoient aussy des finz, & de ce ha este cause leur orgueil & superbie, pource quilz nextimoient quil y eust chose quilz ne pussent comprendre en leur entendement. Pourquoi (come dict lapostre) ilz extrauaguerent en leurz pensees, & se sont contredict les vns es autres. Aucuns hont mise la fin a laquelle lhome doit tendre, en playsir & volupte, pource quilz voioient nonseulement les bestes, mais les esperitz sensuelz des homes naturellement enclins a cela, & se appelloient Epicuriens, de Epicurus, philosophe qui colloquoit le souuerain bien en volupte. Mais il est aduenue a Epicurus come a Luther, qui contre la tyrannie papale de la liberte euangelique, que nestoit pas telle que

*Erreur des  
contemplattifz.*

*Epicure &  
Luther.*



beaucoup de desbordez qui se sont nomez ses disciples hont interprete que cestoit vne liberte charnelle mais spirituelle. Auffy par telle facon plusieurs hont interprete Epicure autrement quil nentendit oncques, car il ne colloquoit pas volupte en boire & manger de viandes friandes, boire bon vin, iouer, dancier, chanter, yurøigner, paillarder & faire telz excez, come hont dict plusieurs voulantz persuader au peuple que ce leur estoit licite pource quilz estoient disciples de Epicure & suyuoient ces enseignements. Mais Ciceron, De  
*Cicero De finibus bonorum & malorum pour Epicure.* finibus bonorum & malorum, reprent cela, disant que Epicurus estoit vn sobre home, qui nextimoit pas volupte viure friandement, mais sans soucy; car il disoit que manger friandtz morceaux, boire vins de mesme ne se pouuoit faire sans soucy, pour apprestier lesdictes viandes, faire fausses a force, vendenger pour boire des vins delicatz, paillarder, &c., ne se pouuoit faire sans soucy, & y hauoit plus de desplayisir que de playisir. Et pourtant ne mangeoit que des herbes que croissoient en son iardin; pourquoy le prouerbe couroit parttout que quant lon vouloit parler dun brasue iardin lon disoit vn iardin epicurien; & sans faute iextime cestuy cy plus sapprocher de la relligion chrestienne & hauoir eu plus de sapience, & par sapience de felicitè, que touz les autres, ni encores que beaucoup de chrestiens, car il ensuyuoit le commandement que Dieu hauoit faict a Adam. Des Cyniques  
*Cyniques.* nous hauons parle cy deuant. Les autres le consti-

tuoiert en indolence quilz nommoient apathie, qui disoient aussy que lon pouuoit disputer de toutes choses, mais non affermer chose quelconques vraye ou fausse, & sappelloient sceptiques. Les autres qui estoient les stoiques, disoient vertu estre le souverain bien, & se reflexchissoit en soy-mesme, car elle estoit sa fin & son loier, extrimantz que possible nestoit que la fin & nature de lhome ne fust dedans son esperit mesme, que nestoit que vertu, par laquelle icelluy esperit est compose, forme & adrece, afin quil ne se gecte pas de haut en bas au gouffre des mouuementz troublez & desordonnez; ceste ha este lopinion des stoyques. Aucuns le colloquoient en honneurz & richesses. Aristote, prince des peripathetiques, ha monte plus haut, ascauoir iusques au siege de la pensee, & en ce quil ha extrime en elle meilleur, ascauoir en la contemplation des tresgrandes choses, qui extrime estre la fin & but des biens, combien quil adiouxte pour vn dependant & accessoire les biens du corps, & les forains que lon appelle les biens de fortune, pource quilz ne nous prouiennent pas de nature, mais par fortune ou industrie humaine, come or, argent, possessions & semblables, car il met ij sortes de choses au monde; les vnes il nomme *Φυσιαι*, cest a dire naturelles, que prouiennent de nature par le naturel discours du ciel; les autres sont positiues, desquelles nous hauons par cy deuant parle, pource que les homes les hont inuentees & posees apres les hauoir esleues & choisies comunables,

*Stoiques.**Aristote.*



*μικροκοσμος*  
petit monde,  
l'home.

*L'home finge  
de nature*

come font or, argent & toutes choses civiles ou citoiennes, pource que Dieu ha donne a l'home puissance de vser & disposer des choses terriennes a sa volente, & pourquoy les Grecz lhont nomme *μικροκοσμος*, cest a dire petit monde, quant & ce petite nature pource quil est le finge de nature, fessaiant a imiter tout ce quil luy voit faire, combien quil ne la puisse en tout atteindre, mais il la suit au moins vne partie. Le dict Aristote en son premier liure des Ethiques a Nicomachus en parle a mon aduis chrestienement, car il dict la que le souverain bien est tel quil est indicible. Ces ij bendes des peripathetiques & stoiques sont venues des disputes de Socrates en escrit reduites par Platon son disciple. Et ne scait encor Platon que se dire pour constituer l'humaine felicity, car en daucuns lieux il tient vertus & doctrine pour le souverain bien, en lautre que cest la contemplation du souverain bien quest Dieu. En lautre voulant voler plus haut, il dict que cest lamour de Dieu & limitation dicelluy, laquelle opinion approuche mieux de la verite. En son Philebus il dict le souverain bien consister en la meslange de sapience & de volupte & plaisir, mais il ne veut pas admettre que ce soit en la seule sapience, ni en la seule volupte, pource que les iij conditions du souverain bien ne sont en lune ni en lautre. Que sont: la premiere quil est parfait entierement, la seconde quil est pour ce parfait que rien ne luy manque; la iij<sup>me</sup> quil est souffisant, pource que plus rien ne faut a qui le peut com-  
prendre

prendre; <sup>iiij</sup><sup>ment</sup> il est desirable pource que en luy & de luy est tout ce que se peut desirer, dou vient quil est souffisant pource quil est parfait, & est desirable pource quil est souffisant. Donc pource quil souffit a soy mesme il souffit a autrui. Et pourtant le souuerain bien de lame est lentièrre acquisition de lumiere diuine, laquelle descendt premierement en la pensee, & apres en la voulente. En la pensee est verite, en la voulente ioye & lieffe. Si me semble Platon hauoir mieus attainct le blanc que tous les autres philosophes, pourquoy non sans cause S. Augustin la appelle Platon le diuin. Toutes les autres opinions des sectes philosophiques se sont dissipees & aneanties lune lautre par dissention ciuile ou citoienne, par leurz propres armes sans que persone autre que eux mesmes sen soit meslee, & en est le proces tousiours encor pendu au croc sans arrest, a cause que cest plus ayse de beaucoup confuter le faux que auancer le vray. Mais cest vn grandt cas quil semble que tous constituent le souuerain bien nous estantz encor en ce monde, & que lhome soit a soy mesme souffisant. Mais ie leur vays drecer vn argument au contraire par vne maxime que de touz est receue & aduouee, quest: Propter quod quid tale est maius est quam illud tale, cest a dire, Ce pourquoy vne chose est telle est plus grandt & vaut mieus que celle chose telle, sus cecy ie dis or, argent, terres, possessions, seigneuries, rentes, bestes, &c., & sont este de Dieu creees pour lhome, ce que ie croy quilz ne  
L.



me nieront pas, si elles sont donc faictes pour lhome, sensuit que lhome vaut mieux quelles, & est par dessus elles, non elles sus lhome, mais outre ce yl faut aussy confesser que Dieu ha faict lhome, mais pour qui ? Pour soy mesme. Et pourtant est Dieu plus grandt que lhome, ce que ie ne scai persone que nie. Pourquoi lhome qui est cree animal raysonnable doit bien par sa rayson comprendre que puis quil est par sus creatures, & que ainsy quil est sus elles Dieu est sus luy, & est sa fin & son but pour quoy est en luy le comble & perfection de sa felicite, dont sensuit quil ne doit estre assouui daucune creature a cause que elle est soutz luy, & moins que luy parfaicte ; pourquoy sil veut perfection y faut quil cherche vers Dieu & non autre qui est le souuerain bien, ce quil pourra bien chercher en terre, mais treuuer il ne le pourra illec, mais au ciel tant seulement, ou il ne peut entrer vestu & enueloppe de ce corps terrestre, ains ni peut on entrer si non nud. Car il est notoire que sus terre ne se peuuent treuuer bien qui haie en soy les conditions telles que hauons dictes estre vn souuerain bien, mais a ce chercher nous destourne la conuoytise charnelle que hauons de Adam, laquelle nous ne pouuons de nous destourner par noz forces, ains nous faut pour ce demander Dieu en aide come nostre pere luy criant : Abba pater, haies pitie de nous, car nous ne sommes seulement pecheurz, mais le peche mesme, & nhauons autre iustice fors la misericorde de Dieu. Car aduisons si le plus iuste du

monde ha iamays chemine en la simplicité de Adam, de non se foucier, de manger & boire de ce que la terre produit sans labeur ni foucy de l'home? Sil mesprise tout vestement? Lon pourroit alleguer Diogenes, mais il ne faisoit pas cela en simplicité, mais pour vaine gloire, come bien Platon luy reproucha en vn banquet auquel le dict Platon lhauoit conuoie avec des autres philosophes, & selon sa coustume quil estoit ciuile & gentil hauoit colloque au siege dun chascun de eux vn couffin pour assiette plus aysee, mais Diogenes mesprieant & se mocquant de cela mit son couffin sours ses piedz, & le fouloit disant: le foulle la bombance de Platon. Et Platon luy respondit: Cest mon, mais tu foulles ma bobance avec autre bobance. Et fut encor meschant en sa ieunesse, car il fourgea fausse monnoie; regardez que en dict Laertius. Car si voulons vser de la simplicité par Dieu a Adam commandee, ni nature, ni coustume ne le nous endureront pas; nous corps sont deuenus si faibles & debiles que ne pourrions endurer le froit yuernal sans mourir, ce que commenca desia en Adam & Eue, car vous voiez que le Genese dict que Dieu leur fit des pellissons. Et quant bien nature le nous permettroit, coustume sil opposera, come nous hauons cy deuant dict, parlantz des philosophes cyniques. Si nous ne voulons manger ni boire si non de ce que nature nous produira sans nostre labeur, nature nen produit

*Contention  
entre Platon &  
Diogenes.*

*Coustume autre  
nature.*



plus souffisamment pour les homes & les bestes, & quant bien elle le permettroit, coustume ne se y soutezscriroit pas, que selon les philosophes, est vne autre nature, car nos predecesseurz, de la semence desquelz nous sommes produitz des le commencement hont mignardement vescu, & pour ce nhont pas eue semence generatiue si forte & robuste, que delle soient peu prouenir corpz asses puissantz de viure sans delices. Regardons les bestes & prenons sus elles exemple; prenons en vne forest vn escuyreul, vn lieure, vn connil & dautres bestes que nous appriuoisons les nourrissantz de viande humaine, & retournons apres a les nourrir de la leur primeraine, luy couppantz la nostre, ilz ne y scauront viure.

Si voulons viure come Adam, il ne nous faudra rien hauoir de propre, mais viure sus le commun. Mais en quelle partie du monde iras tu ou les choses soient tellement communes quil soit permis en prendre sans les demander? Voire que lon donne a tout demandant, si non que ce soit en Vtopie. Si tu vais aux terres neufues ou lon dict que tout est commun, ilz nadmettent point de strangerz quilz ne mangent si les autres ne sont les plus fortz; voire, de tant sen faut quilz viuent en commun, que non contentz des viures de leurz voyfins, ilz mangent les corpz les vns des autres; sil se treuve vn home qui veuille accommuner tout son bien, lon en treuuera mille qui seront dopinion a luy contraire & prendront asses du sien, mais il nen y haura pas vn qui donne a luy

ni a autre le sien. Il nest plus question de parler du droict de nature, car celluy des gentz & des citez luy hont oste son credict & quant bien ainſy feroit que tu ne vesquiſſes que de laer, marchiffes tout nud, &c., tu ne le ſcauroies faire ſimplement & impuneement. Premièrement tu ſeras tenu pour vn fol, ce que tu ſeras auſſy & te courront apres les petitz enfantz, te picquantz les feſſes; les grandtz prendront leur paſſetemps a te donner du fouet; tu ſeras picque des mouches & autres menues beſtes, deuore des groſſes, ſi elles te rencontrent, car la puiffance que Dieu hauoit donnee a lhome ſus les beſtes eſt faillie; finalement les autres homes te feront come ilz font a ceux des terres neufues, car ilz te reduiront en ſeruitude & par auenture dune galee, diſantz, De quoy ſert ce maraut qui veut viure ſans trauailler? Et a bon droict car Dieu ha commande a touz enfantz de Adam de trauailler, ſus paine de mourir de faim. Il en y ha bien encores aucune maniere de gentz qui font profeſſion de non vouloir rien ha- uoir du propre, mais que tout ſoit en comun, come en la relligion papale les piedz deſchaux & aucuns dentre nous, qui hauons faiet la figue au pape (a cauſe de quoy Rabelays nous ha donne le nom de papefigues) que ſont les anabaptiſtes, que touz deux nhont point de pournom poſſeſſif en ſingulier, diſantz le mien, le tien, &c., mais le noſtre, le voſtre. Ilz ne diront pas mon mantel, mon biſſac, &c., mais noſtre mantel, noſtre biſſac, & ſemblable & descendront bien iuſques a

*Droict de nature affoybli par celluy des gentz & des citez.*

*Piedz deſchaux & anabaptiſtes tout vn.*



cela quilz diront nostre bourse en nombre plu-  
 rier; mais quant viendra a parler de ce quest de-  
 dans, ilz retourneront au singulier & ne diront pas  
 nostre argent, mais mon argent. Nouz compape-  
 figures que nous appellons anabaptistes faignent  
 bien aussy vouloir que tout soit en commun, mais  
 filz se treuvent les plus fortz, ilz exercent bien  
 ceste charite actiuellement, mais non pas passiue-  
 ment. Aussy bien font ce, les paouures mendiantz  
 de la relligion de Mahomet, qui font profession  
 de paouurette, telle que le seigneur de Monego  
 qui dict: Yo son el segnor de Monego, chi non ha  
 roba se non la roba. Aussy ceux cy ne veulent  
 rien hauoir de propre, car ilz se contentent de  
 lautruy, prenans lausmone plus tost que la de-  
 mandantz. Ainsy font bien nouz anabaptistes, car  
 ilz veulent que lhauoir dautruy leur soit com-  
 mun, mais non pas pour la pareille. De quoy  
 lexemple nous monstra bien le roy de Munster en  
 Westphale come treuueriez en Sledan. Aussy en  
 son lieu nous monstrerons la bone charite de telles  
 gentz par lexemple de ij freres de S. Gal, appel-  
 les les Schuckers desquelz lun couppa la teste a  
 lautre. Mais dou prouient cela finon de ce quilz  
 ne se veulent pas appeller enfantz de Adam le  
 pecheur, mais de Adam le iuste, ni heritierz de  
 son peche & consequemment de sa paine, mais  
 de sa iustice & consequemment du loyer que  
 par sa iustice il hauoit merite. Et errent grande-  
 ment ces paouures folz, car pensantz tirer lun  
 des piedz hors du borbier, ilz les y plongent

*Nostre bourse  
& mon argent.*

*Mendiantz telz  
que le seigneur  
de Monego &  
les paouures de  
Arabie.*

*Exemples de la  
charite ana-  
baptistique, par  
l'histoire de  
Munster & de  
S. Gal.*

touz deux, voire tout le corps iusques au mention. Car il ne faut pas que nous abusions a penser pouuoir viure sans peche, & quant nous voulons afranchir des pechez venielz nous tumberons aux mortelz, voire aux crimes dignes de mort & spirituelle & temporelle. Car les loix & statutz faictz pour refraindre peche sont peche elles mesmes. Ce que Platon ha dict en son liure des loix ainfy: Nul ha introduistes les loix, mais beaucoup de diuerz caz & euenementz les hont fourgees, & le commun prouerbe entre les Latins est: Quia omnes bonæ leges a malis moribus ortæ sunt. Toutes bonnes loix sont prouenes de mauuayses meurz. Et pourtant sont faictes en duplicite rompantes la simplicité commandee a Adam, laquelle fil eust gardee ni luy ni nous sa posterite neussions eu besoin dautres loix, veu que nous fussions este loy a nous mesmes, mais ceste duplicite est le peche de la science de bien & de mal, pourquoy faut dire que Dieu nous ha faict comme vn bon medecin, *Comparayson.* qui haient a gouverner quelcun sien ami bien sain auquel pour en ce lentretenir le medecin luy defendt telles & telles viandes, luy annoncant que fil en vse il tumbera en maladie de laquelle il mourra ou languira longuement pour le moins. Car ce sera de celles que lon appelle chroniques, que sont gouttes, epilepsie ou haut mal & ladrerie. Le medecin luy dira: Si tu ne gardes diette tu tumberas en ladrerie, lautre ne luy voudra pas croire, mais perseuerera en ses excez qui tesmoigneront pour le medecin, car ilz luy engendreront



la maladie auant noncée que fera forte & aspre, pourquoy criera alarme & au medecin : Ayde, ayde ! luy demandant pardon & le priant quil regarde plus tost a lancienne amitie que a sa faute. Le medecin luy respondra : Par tes excez tu es tumbe en vne maladie non seulement aspre, mais incurable, de laquelle ie ne prometz pas te guerir, mais de tallegier la douleur & garder quelle ne tauancera pas tes iourz ; mais ie ne pourray cela faire sinon avec remedes qui ne te seront pas si playfantz come estoient les excez qui thont causee la maladie, car il faudra que ie te donne medecines que ne seront seulement fascheuses, mais dangereuses, car elles tueroient vn sain, ou pour le moins le rendroient malade, mais elles sont profitables a ta maladie, car la règle de medecine est que a extreme maladie faut extreme medecine. Cecy luy dira le medecin, & dira vray ; car, par la confession de touz medecins, il ni ha medecine que ne soit venimeuse, ou plus ou moins, si en medecine & poyson sont appellees en grec dun

*Φαρμακον,*  
poyson & me-  
decine.

mesme vocable *Φαρμακον*, & nen y ha point de si benedicte (come ilz appellent) que ne porte dommage au corps, mais mieux vaut encores oster du corps quelque peu des bonnes humeurz quant & les mauuayfes, que pour icelles espar-gner laisser perir tout le corps, chassant poyson par poyson, car a vn qui est empoysonne lon donne theriaque pour medecine, quest vne composition ou entre de la chair de la plus venimeuse beste du monde, que Latins appellent vipere.

Au temps

Au temps present au pays ou plus en y ha, quest la Pouille, elle est appellee tharantola. A vn ladre qui est entache de maladie incurable, lon donnera, non pas pour le guerir, mais pour le garder dempirer, que medecins appellent pallier, a manger des serpentz, & pour sa boysson du vin ou vn serpent sera mort, ce que seroit poyson a vn sain. Aussi si nostre premier pere eust garde la diette que Dieu luy hauoit ordonnee il ne fust pas tumble en la ladrerie de peche ni nous y assubiecti nous ses enfantz, nous layssant ce bel ioyeau pour heritage. Et pourtant nhaurions besoin de medecine, que nest pas encor pour nous guerir, mais pour nous garder que nostre maladie nempire. Que sont les artz & sciences humaines, les doctrines de philosophie, toutes loix & statutz appartenantz tant aux homes en general, come a vne chascune cite & pais, que lon appelle le droict des gentz & le droict ciuil ou citoien, car obseruantz la loy diuine chascun fust este loy a soy mesme, mais (puisquainsy est que en pouons retourner en fante) y nous faut par medecines garder que la maladie nempire, iacoit ce quelles soient venimeuses, que sont loix sus loix que nespuysons pas de sapience, car sapience ne traicte fors des choses que ne peuuent autrement estre; mais d opinion & prudence que recoiuent touz contingentz ou euenementz, car ainsy que les opinions des homes changent de iour en iour, aussi sont les loix delles engendrees & rayson. Il faut quelles soient menees ou trainees de la volente dune mul-

*Vipere soit  
Tarantula.*



titude ou de luniuers, ou dune partie dicelluy, & ne se faict iamay loy de laquelle chascun se contente; & par succession de temps, de multitude de loix, fouruient multitude daffaires, pourquoy faut de rechef multiplier en sorte que la multiplication engendre confusion, telle que les facteurz & gouuerneurz mesmes dicelles ne sceuuent ou ilz en sont; & ce nonobstant sans les loix les homes ne scauroient viure en humaine compaignie, car encores ne le peuuent ilz pas avec elles, que ha este cause que beaucoup de paiz ne se sont voulu regler par loix escrites en papier, mais grauees es cueurz des homes que le peuple tenoit pour gentz de bien, come iadis faisoient les Lacedemonoiz, lesquelz nous ensuyuons en nostre pays des Liges, ce que tout prouient de peche que hauons par heritage.

Mais nous hauons asses deuise de peche & nhauons encores diffini que cestoit que de peche, ce que ha este faict par methode ou dreciere nommee analytique cest a dire resolutiue, que se faict en demonstrent plus tost le tout par ses parties que les parties par le tout. Declairons donc le tout par diffinition ou limitation.

*Diffinition de  
peche selon  
S. Augustin.*

S. Augustin au liure de la doctrine chrestienne diffinit ainsy peche: *Peccatum est frui vtendis & vti fruendis.* Peche est iouir de lusable & vser du iouyffable, laquelle sentence nous hauons inserree en noz menues pensees, mais nous y hauons adiouxtee le exposition par sourcroie come verrez.

Augustin :

*Qu'est ce peche? de chose vsable  
Iouir, vser de iouyffable.*

L'exposition par fourcroie :

*Plus que la cause aymer l'effaict  
Qui pour elle donne nous est.*

Car Dieu hauoit cree lhome (come nous ha-  
uons souuent dict) maistre de toutes les creatures  
terrestres, mais non pas afin quil sarrestast en  
icelles pour en iouir, & s'esjouir en icelles ou-  
blier le createur, ains en vñant pour la neces-  
site, mais a la reste neust autre esjouissance que  
en luy. Et pource quil luy assubiectionnoit toutes  
autres creatures, vouloit que luy fust aussi a luy  
subiect,questoit quil deuoit recognoistre & aymer  
celluy qui estoit cause de tel effaict plus que le-  
ffaict mesme, par la regle dialecticale par nous cy  
deuant alleguee. Ce pourquoy la chose est telle,  
&c. Faire doncques cela est preferer leffaict a la  
cause; ce que mha faict dire : Plus que la cause  
aymer leffaict, &c. Il y ha plusieurs autres diffini-  
tions, car ceste icy est plus tost description que  
diffinition, combien quelle demonstre aussi bien  
l'affaire que diffinition, quil ha faicte luy mesme  
au liure de franc arbitre disant : Peche est vn de-  
stournement du bien incommutable en vne con-  
uersion indeue au bien commutable, ce que se  
rapporte a la description, car il ni ha bien incommutable que Dieu. Et se destourner de luy pour  
se tourner aux creatures est se destourner du bien  
incommutable au commutable,quest preferer le-



faict a la cause. Plusieurs autres hont diffini peche, mais il me semble quil souffise de laugustinienne, car ie nen treuve point de plus naifue.

Sus ce poinct de peche faut respondre a la question que plusieurs par trop curieux & audacieux murmure drecent contre Dieu disantz : Pourquoi est ce que Dieu ne garda lhomme de pecher, veu quil leust bien faict sil eust voulu? & dient argumentantz ainsy : Dieu nest seulement tout puissant, mais tout scauant. Si ainsy est, deuant que creer lhome il scauoit bien quil pecherait. Or est sa science infallible. Il nestoit doncques possible a lhome se garder de pecher car ce fust este tromper Dieu. Item, nul est oblige a limpossible. Celluy donc nemerite punition qui ne faict ce que ne luy est possible de faire, ni se garder de ce que ne luy est possible se garder; pourquoi deura donc estre puni celluy qui ha faict ce de quoy il ne se pouuoit garder, veu que la science de Dieu infallible lhauoit auant veu? Si ne se contenteront pas encor telles gentz, si on leur respondt que Dieu hauoit donne a lhome franc arbitre pour ce faire ou sen desporter, car leur replique sera quilz nieront quil ne le luy hauoit pas donne, car si ainsy fust este, il cust peu tromper Dieu, se gardant de peche. Hauront encor vn autre argument disantz : Pourquoi le luy hauoit il donne sil scauoit quil luy fust dommageable? A cecy respondre est fort difficile & sen est treuve mout estonne S. Augustin mesme, qui en ha de-

uise en son traicte dialogual de franc arbitre & en d'autres lieux, mais la principalement, car il y introduit vn Enodius disputant avec luy, & luy demandant au ij<sup>e</sup> chapitre de son premier liure solution sus ce argument: Si ainsy est que Dieu qui nous ha creez & nous guide est souueraine bonte, dou vient que nous faisons mal? Augustin se treuua mout estonne de ceste question, & dict que ce le fit en sa ieunesse tumber en l'erreur des Manichiens, questoit que pource quilz voioient iournellement habiter bien & mal ensemble pesse messe, & ce nonobstant non voulantz admettre que Dieu fust autheur de mal, come aussy il nest, ne pouuoient entendre quil ni eust ij principes ou commencementz, lun de bien & lautre de mal. Le commencement du bien ilz attribuoient a Dieu, celluy du mal au dyable. Et pourtant (selon eux) Dieu & le dyable estoient coeternelz. Pourquoi deuant que respondre a ceste question par Enodius a luy esmeue, il faict priere a Dieu quil luy donne esperit de ce faire. Apres quoy il dict a Enodius, que sil veut paruenir a lintelligence de cela, il luy faudra croire au conseil de Esaie, qui dict en son vij<sup>me</sup> chapitre: Si vous ne croiez vous nentendrez pas. Mais deuant que poucer plus auant la sentence de Esaie & de Augustin, ie dirai aussy la mienne, quest que foy doit proceder rayson en toute sorte de demonstrations, & non seulement par autorite mais par rayson, & non seulement en theologie mais en toutes artz & sciences, desquelles si voulez disputer, y vous faudra fonder vostre argument

*Aug. : De libero arbitrio.*

*Esaie vij<sup>me</sup>.*



sus vn faict si euident quil est impossible le nier, pource que par euidence il est cogneu, aduoue & receu que dialecticiens appellent maximes ou lieux communs, come a qui ne voudra croire que le feu ne soit chaut, lon ne le luy scauroit mieux prouuer que le fourrant dedans. Celluy qui voudra faire a croire a celluy qui recoit du fouer quil ne sent point de douleur ne faudra fors luy en donner autant pour le confuter. Si donc toutes artz hont ainsy leurz maximes ou lieux communs, il est bien raysonnable que la maistresse dicelles, quest theologie, les haie aussy, de laquelle la maxime est que Dieu est tout puissant, tout scauant, & tout bon; laquelle est non seulement grauee aux cueurz des chrestiens, mais de touz humains de quelle religion quilz soient. Sil est donc tout bon il est impossible quil haie faict chose que soit de soy mauuayse & principalement en la persone de lhome quil ha faict a son image. Si dict Augustin a Enodius que sil croit cela il le menera au chemin par lequel il sestoit eschappe des Manichiens, & que pour a ce paruenir luy faudra croire tout ce quest dessus dict, quant bien il ne pourroit comprendre la cause. Pourquoi sans impiete ne se peut nier que Dieu ne soit tout puissant & entierement immuable, aussy quil ne soit le createur de toutes choses & de tout bien, duquel il est aussy le souuerain gouverneur & tres iuste, & ha tout cree sans matiere ni aide aucune, veu que luymesme est a ce souffisant, dou vient quil ha tout cree de rien, & com-

bien quil nhaie rien cree de foy, si ha il de foy engendre son fils a luy esgal, sa vertu, sa sapience, si nous voulons parler de luy plainement, par lequel il ha faict toute son œuvre de rien. Ce que cognoissant Enodius il comprendra clerement & aysement la reste.

Cecy raconte S. Augustin a Enodius au passage dessus dict; & apres quil ha eu raconte aux autres chapitres du dict premier liure que cest que de mal faire, que seroit trop prolix a raconter & non seruant a nostre propos, si ne donne la resolution de cela iusques au premier chapitre du second liure, disant que Dieu ne donna pas au premier home ni donne encor a nous sa posterite le franc arbitre pour en mal vser en pechant, ce que se preue par lexperience que en voions iournellement quil ha faicte, & faict de ceux qui en vsent en mal, & la remuneration quil faict a ceux qui en vsent en bien, en quoy il nous monstre que sommes siens; car il ne feroit pas iustement sil nous donnoit franchise de volente pour mal viure, mais il ne la nous donne sinon pour en bien vser. Si nous en abusons ce nest pas sa coulpe mais la nostre, car si ne lhauions nous naurions pas plus de liberte que les bestes, mais lon dira encor: Sil scauoit que nous pecherions & serions pour ce condemnez a mort eternelle, pourquoi ne nous gardat il. Responce: Il ne ha compose les homes ni autre creature soutz celeste afin quilz fussent a luy esgaux, cest ascauoir immuables & eternelz, mais subiectz a mutation, ni aptes a lendurer, car



ce fut este contre lordre pose par sa sapience que ha establie toute chose terrienne subiecte a mutation. Quant il crea lhome il luy donna bien le pouuoir de se garder de corruption, mais non de mutation, & est de cela come du franc arbitre par lequel il hauoit puissance de pecher & de non pecher, mais (come dict S. Bernard) lhome hauoit le franc arbitre par lequel il pouuoit pecher & pouuoit non pecher, mais pource quil esleut plus tost pecher que non pecher, il est tumble de pouuoir pecher & pouuoir non pecher en non pouuoir non pecher. Ainsy est de mutation, & de cecy la demonstration se peut faire, non seulement par lautorite de la S. Escriture, mais par raysons encor amenees par les philosophes gentilz, car le prince diceux, Aristote, au ij<sup>e</sup> liure de ses Ethiques, dict que vertu est vn moien entre ij vices, lun prouenant dexces lautre de deffaut, come (par exemple) liberallite est vne vertu prouenante entre prodigallite & auarice. Lun est dexces consistant eslargir le bien la ou nest besoin, lautre de le serrer & espargner ou besoin est de le distribuer. Liberallite est au mylieu que distribue & serre selon le besoin quelle voit, & ha lhome le franc arbitre pour choisir lequel quil veut. Tout cecy ne prouient pas de Dieu, mais par certaines consequences produittes par nature, come nous dirons que ne peut produire bien sans mal. En lhome est lelection ou de lun ou de lautre; de quoy plusieurs hont deuise, & deuant touz le philosophe subtil Chry-

til Chrysippus allegue par Aule Gellius en son *Aule Gellius.*  
vj<sup>me</sup> liure, chap. ij, des Nuictz Athenoises, & en  
faict ij chapitres apres le dict Chrysippus escri-  
uant de Prouidence, quil appelle *περι προνοιας*, *Chrysipus de*  
disant ainſy : *providentia.*

Il nest rien plus sot que ceux qui cudent  
que les biens eussent peu estre, si les maux ne  
fussent, car a cause que les maux sont aux biens  
contraires il est necessaire que tous deux soient  
opposites lun a lautre, & consistent presque par  
appuy lun a lautre, mais toutesſois contraire, en  
forte que nul contraire peut estre sans son autre  
contraire, car come cognoistroit on iustice si tort  
nestoit? ou quelle autre chose est iniustice que pri-  
uation de iustice? Come entendra on force sans  
entendre timidite, continence sans incontinence,  
verite sans menconge, bien sans mal, & sembla-  
bles? Car Platon dict que volupte & douleur de-  
coulent lun de lautre teste contre teste, si que si  
tu ostes lun, tu osteras touz deux.

Ce mesme Chrysippus en ce mesme liure drece  
vne telle question quest: Si la nature mesme des  
choses ou la Prouidence que ha faict l'assemble-  
ment de ce monde & l'humain lignage, ha aussy  
bien faict les maladies & debilitiez des corpz, des-  
quelles les homes sont persecutez? Si dict que ce  
ne fut pas lintention principale de nature de faire  
les homes subiectz a maladie; car ce ne fust pas  
este honorable a lautheur dicelle & pere de tout-  
tes bonnes choses, mais engendrant des choses  
beaucoup & fort grandes & les constituant viles

M.



& profitables, plusieurs choses mauuayfes & pernicieufes prouindrent quant & elles, & les fuiurent & se ioignirent a elles, ce que nha pas este faict par nature, mais par certaines consequences naturelles quil appelle en son language grec *κατα παρακολουθησιν*, lequel vocable Gellius nha sceu le interpreter en latin, donc de tant plus malayseement ce se pourroit faire en gauloys, sinon que a mon aduis y se pourroit nomer plus briefuement fourcroie, come vne chose fourcroiante a lautre non pas avec la production de nature, mais apres; si dict Chrysipus pour exemplifier cela: Quant nature forma le corps humain, la rayson plus subtile & lutilite de louurage requeroit que la teste fust composee & garnie de petitz menuz oz subtilz & deliez, mais de ceste grande vtilite fouruint exterieurement vne certaine incommodite, que fut que la teste demeura mal forte pour resister aux coupz, tant petitz soient ilz. Et pourtant faut conclurre que les maladies sacquierent quant & la salut. Dou aduient que cependant que vertu sengendre aux homes par le conseil de nature, les vices quant & cela fourcroient par affinite contraire. Cecy dict Chrysipus des consequences du mal au bien.

Apres il parle de ce que les Grecz appellent *πεπρωμενην* ou *είμαρμενην*, Latins *fatum*. Nous le pouuons nommer en commun language destinee, theologallement pouruoiance de Dieu, quil diffinit ainſy: Destinee est vne certaine & ineuitable ordonnance, suite & conliayſon des choses se

*Diffinition de  
destinee.*

roullante & tournante de soymefme & fenuelop-  
pante par ordres eternalz, de consequence desquelz  
elle est adiancee & a eux ioincte, mais que pource  
ne faut excuser le meschant pour lexempter de  
punition pour les meffaietz par la vigueur de ceste  
diffinition disant: Si toutes choses en tout & par  
tout se meuuent de destinee ou de prouidence di-  
uine, & que les reuolutions dicelles ne se puissent  
eüter ni outrepasser, les pechez par les homes  
commiz ne doiuent point estre attribuez ni impu-  
tez a leurz voulentez mais a la necessite de desti-  
nee prouenante quest dame & maistresse de toutes  
choses. Et pourtant hont malfaiet les faiseurz des  
loix dordonner que les malfaieteurz fussent puniz,  
veu quilz hont este contrainctz a ce faire.

Sus cecy Chrysipus respondt par beaucoup de  
parolles subtillement & aguement; mays voycy en  
bref la sentence.

Combien que ainſy soit (dict il) que par cer-  
taine rayſon principale & necessaire toutes cho-  
ses soient annexees & aſtrainctes tellement a la  
destinee, ce nonobſtant nouz eſperitz & penſees ne  
ſont aſtrainctz a la destinee plus auant que leur  
proprieté & qualite napporte. Car filz ſont des leur  
commencement par nature bien formez & compo-  
ſez ils trespasſeront & ſourmonteront celle impe-  
tuofite de destinee que prouient exterieurement  
ayſement, mais ſi noz dictz eſperitz ſont lourdtz,  
rudes & malbaſtiz, & ſans aide de bones artz &  
ſciences, certes en tel euenement, quant ilz ne ſe-  
roient par destinee contrainctz, ains tant ſeulle-



ment vn peu pressez, voire quant la destinee ne sen mesleroit par leur mesme & propre legerte de volente, ilz courroient & se rueroient en la fosse de continuelz vices & erreurz, ce que ne se faict pas sans rayson de telle naturelle & necessaire consequence des choses, que sappelle destinee, car la regle generale de la dicte consequence & destinee est que les gentz de malin esperit ne soient sans erreurz & pechez, come vne boule, dict il. Si tu treuues vne boule qui ne se meue & tu luy donnes le moindre coup de pied du monde, incontinent elle se roullera non pas tant pour le coup que tu luy hauras donne, que pource que de sa nature elle est subiecte a mouuement. Ainsy aduient de lordre, rayson & necessite de la destinee, car elle esmeut generalmente nonseulement les commencementz des causes, mais la volente propre & complexion dun chascun indiuis, gouuerne & modere ses actions; concludant par cecy que les mal-faictEURz ne doiuent estre admiz en leur excuse sus la destinee tellement quilz demeurent pour ce impuniz.

*Gaspar Contarenus.*

*Vertu debile  
deuiant vice.*

Gaspar Contarenus aussy en sa premiere philosophie dict que vice nest que diminution de vertu; car quant la vertu peu a peu se diminue en forte quelle vient en extreme foyblesse, cela se conuertit en vne contrariete, come (par exemple) quant le liberal peu a peu cesse de vsr de liberalite, en forte quil ne donne plus rien: telle retraincte se peut nomer auarice; & ainsy des semblables.

Mais entre touz les autheurz que ihay leuz par-

lantz de ceste matiere nen ha point apres S. Augustin qui en parle mieux a mon iugement que maistre Alain Charrettier en son exil, ou il faict vn *Alain Charrettier.* dialogue entre son entendement & son esperance, quil introduit disputantz de plusieurs choses, & entre les autres, Entendement dict a Esperance: Si la volente de Dieu est invariable & que eternellement il haie voulu & sceu toutes choses, pour neant sont oraysonz & prieres. Lors Esperance luy respondt: Tu quiers chose que nul ne peut treuver, & veux estre accertené de ce que Dieu ha laissé douteux. Plusieurs docteurz hont aguisez leurz entendementz pour accorder la predestination de Dieu avec le franc arbitre de lhome, mais ilz hont nage par dessus sans treuver le fondtz, & vole a lentour tant quilz nhont veu ou reposer leurz engins entrelassez. Les responces en ceste matiere arguent contre le respondant, & les arguments retournent contre celluy qui argue. Tu veux dire en arguant que Dieu scait toutes choses deuant quelles aduennent, & puis que sa science est certaine & invariable, ce quil scait de necessite sera. Sensuit donc que par noz prieres & oraysonz il ne se peut muer ni changer. Or retournons largument contre soymesme, & disons ainsy: Si Dieu ne peut changer lestât des choses aduenir il est quant & ce non puissant, & sil nha pouuoir es choses quil scait estre futures il faut dire quil scait plus quil ne doit, ce quest vn erreur manifeste, si tu ne confesses quil ne scait rien de ce quest aduenir. Mais que vaut multiplier argumentz en ceste matiere arre-



stee? Certes quelques argumentz que facent les homes a la verite il ha puissance infinie sus toutes choses & sus toute invariable science. Et neantmoins lestat aduenir est de foy muable. Et la voulente est franche a eslire le bien & le mal, & la puissance de Dieu inclinable a nouz oraysons exhaucer. Souffise roy si nous te relatons ce que les sainctz docteurz en hont escrit, & demeure sus le poinct ou ilz se sont arrestez; car combien que leur determination ne puisse vider douttes, certainement elle est vuide de tout erreur. Nous croions fermement que Dieu est vne simple & souueraine essence, qui par soy mesme, come tout parfaict, cognoit toutes choses; & voions clerement que lhome est vne substance composee & imparfaicte, haiant de dehors la cognoissance des choses par leurz especes, & Dieu cognoit toutes creatures deuant quelles soient faictes, & lhome ne cognoit rien sinon ce que luy est presente par les senz de dehorz. Ainsy la science diuine nha aucune proportion a la scauance des homes, dou ne doitz iuger de son scauoir par le tien, car ta science dependt des choses que tu scais de luy, & les choses quil scait dependent de sa science absolue ou parfaicte. Elles sont de luy par eternelle cognoissance & sapience sceues clerement. Et pource quil les scait de luy & de sa grace tu les scais pourtant quelles font leur mutation; dou pource quelles font leur mutation ne se peut muer sa science, veu que sa science precede leur estre, car sil cognoissoit les choses par elles mesmes, sa cognoissance suy-

uroit lestre des choses, non les precederoit. Ainsy il cognoistroit les choses passibles douteusement, & les choses necessaires par vne certainete realle come tu entendement scais, mais puis quil cognoit tout par luy mesme & quil demeure tousiours estable & pardurable, sa science est necessaire, eternelle & infallible. Croy & ne douttes point quil cognoit les choses principalement, les choses temporelles intemporallement, les choses muables inuariablement, & que les choses contingentes ni la variabilité dicelles ne varient sa science ni efforce leur contingence ou euenement, car lestre dicelles est de soy chose muable en elles & par elles, & la science quil ha delles est en luy & par luy establement necessaire. Il scait necessairement par soy-mesme quil est necessaire les choses telles quelles seront aduiendront contingement par leur nature qui de soy est variable, telles quelles sont. Soies certain que toutes choses luy sont presentes en son eternite, car il ha tout ensemble des tousiours, & ha tousiours son scauoir & son estre parfait & accompli. Les choses corporelles subiectes a mouuementz & mutations sountz le temps nhont iamais leur estre ensemble & leur estat aduenir, car le passe leur est desia tollu & le futur leur est en attente, mais a Dieu tout le temps ensemble est present, plus que nest a toy lheure de maintenant. le ten baille materiel exemple : a lessseul dune roue mouuante ensemble mouuant a lentour variablement ; il est quant & soy en vne mesme habitude vers toutes les parties de la roue que de



son coste luy sont presentees, mais elles changent tant que en elles sont leurz habitudes des vers luy en tant quelles se meuuent haut & bas. Ainsy par la mutation des choses que Dieu ha creees & soustient ne se change son essence, ni sa science ne varie. Quiers la variation du monde es choses que de foy sont muables, & laisse a Dieu son establie permanence sans scrupule & sans doutte; ne mes-croy point l'autorite de sa puissance pour la necessite de sa science. Car combien quil scache les choses aduenir necessaires en foy come elles seront, si les peut il seigneurieusement muer en elles come il luy plait par sa misericorde. Et certainement sa necessaire science, son infinie puissance & sa voulente inexpugnable sont si d'accordt quil scait tout ce quil peut & peut tout ce quil veut. Soies content donc de ceste deduction, car ca bas tu nen peux plus hauoir. Et a moy mesme que suis sa fille il nen ha plus permis, car tu peux ce scauoir que si oraysonz ne profitoient & Dieu eust tellement destinees les choses en sorte que le franc arbitre de l'home fust contrainct par necessite, ie fusse pour neant este cree.

Cecy ha dict Charrettier & autres scauantz alleguez des causes par lesquelles les pechez commiz par les homes ne doiuent pas estre imputez a Dieu mais a eux mesmes, combien que ne pouuons estre sans peche a cause de la coulpe de nostre premier pere, pource que (selon S. Bernard cy deuant par nous allegue) nous sommes de pouuoir pecher & non pecher en non pouuoir, mais sans que Dieu  
sen mesle,

sen melle; mais il y ha difference de pechez non pas par degrez, veu que Ciceron dict en ses paradoxes que les pechez sont esgaux, mais les coulpes lune plus grande, lautre moindre, & aussy les theologiens scholastiques tiennent quil y ha des pechez de iij sortes de degrez, les vnz sont meschansfettez ou crimes, les autres pechez mortelz, les iij<sup>mes</sup> ilz appellent venielz, cest a dire de iugement & de misericorde, ce quilz nhont pas encore faict sans lauthorite de la S. Escriture, car vous treuuez au vij<sup>me</sup> & viij<sup>me</sup> du Genese & aussy en Iosephe en ses Antiquitez come Dieu apres le deluge, pource quil voioit que lhumain lignage ne se chastoit pas par lhorrible punition quil hauoit faict sus les autres homes de pecher come parauant, & que sil les vouloit tousiourz punir quant ilz pecheroient il luy faudroit touz les iourz enuoier vn deluge, dict quil ne vouloit plus estre le Dieu de iustice mais de misericorde, & le promit a Noe luy disant quil ne feroit iamais plus perir luniuers par eauue, en signe de quoy il crea larc celeste appelle par les Grecz *ipis*, que signiffie paix, come vn signe de paix. Permit aussy aux homes plus grande liberte que parauant, ce que nestoit pas deuant le deluge; toutesfoys il ne voulut pas que touz pechez demeuraissent impuniz, mais constitua des magistrautz qui fussent pour deffendre les enormes pechez que lon nome meschansfettez & crimes, & les moienz qui sappellent mortelz, mais en telle difference que les premierz seroient puniz par mort temporelle & eternelle, les autres par



la feuille eternelle. Des venielz, qui sappellent venielz come pardonnables & de misericorde il voulut quilz fussent tolerez par les homes come luy les toleroit. Les pechez dignes de mort il hauoit deuant le temps de Moyse graue es cueurz de touz humains, & apres la naissance de Moyse les escriuit en ij tables quil fit presenter a son peuple par ledict Moyse come est escrit en Exode; mais il y ha des autres pechez sans lesquelz lon ne scauroit viure en humaine compaignie, come sont planter vignes, semer ble, se vestir & toutes autres choses prouenant de la science de bien & de mal deffendue a Adam, & bref delaisant vser de la puissance contemplative par Dieu a lame donnee du commencement affin de luy en seruir pour vacquer a lactiue souts excuse que nous le faisons par necessite, quest bien vray, mais non par necessite nous prouene de nature, mais que nous mesmes nous sommes imposee par coustume, singulièrement de mentir, car cest contre la loy de nature de dire lun & penser lautre, ce que S. Augustin extime vn des plus griez pechez, ce quil puni en vn traicte singulier quil ha faict tout espreux pour cela & lintitule, De mendacio ad Consentium, par lequel il ne veut permettre que lon mente pour chose quelconques, voire pour sauuer soy ni autrui de mort, mais Dieu lha permis nonseulement pour sauuer la vie de soy & de son prochain, mais pour beaucoup de moindres causes, come se treuve a touz propoz en la sainte Escriture par exemples de plusieurs saintz personages qui pour mentir

ne sont pas este repreuuez de Dieu mais appreuuez, come nous hauons deduit ailleurs plus a plain. Touttesfois combien que ce & les autres semblables soient pechez, Dieu les tolere plus tost quil ne les loue ni appreuue pour nous entretenir en humaine compaignie par telles ciuilitiez, pource que ce ne sont que petites vanitez & follies que ne nuisent au prochain, come le pere faict a ses enfantz estantz encores en aage tendre & fresse, de se delecter a hauoir des cheuaux de boys, filles de plastre, iouer aux noyfilles & faire semblables actes dinfantile simplesse, & nonseulement le leur permettent les peres mais leur fournissent eux mesmes de telles bagattelles, pource que eux mesmes se delectent en leur erreur de bone grace, mais pource que cela ne tumbe en excès, coment si par telz ieux ilz sentrebattent lun lautre ou font quelque autre mal, lors le pere prent vne bone verge & les fesse tres bien. Ainsy nous faict Dieu, non nous comportant seulement telles vanitez, mais nous y aidant, pour nous hauoir laissee prudence par la quelle nous pouruions a cela; mais si nous en abusons il ha la verge pour nous chastoier ou par les mains de fortune ou des homes les vns par les autres. Aduisez vn exemple seulement du train de marchandise. Lon dict quelle se peut exercer sans peche, a scauoir si lon le faict sans tromperie, quest touttesfois chose malaysee, mais encor quant lon ni tromperoit point, si nest ce que vne vanite, pource quelle sexerce par volupte seule sans necessite, car il ny ha region ni pays qui ne



*Symphorien  
Champier.*

produise a ses paysantz ou habitantz tout ce que leur est necessaire pour lentretenement de leur estre; ie ne parle pas de la necessite de nature mais de limposee par coustume. De quoy ha bien faicte la remonstrance M. Symphorien Champier, medecin a Lion, iadis en son liure du Iardin de Gaule, disant que nature nha encombre aucune region de maladie quelconque que elle nhaie aussy de remede pour la guerir, le semblable est de la nourriture & vestement. Car pourquoy ne pourra aussy bien garde de froit son suppost vne robe de la laine de ses brebiz payfannes que celle que sera faicte des brebiz estranges, voire de fiente de verz a soye, que lon vait querre en pays si estranges & loingtains, non seulement a grande paine mais danger? Si vin ne croit en ton pays, boy de la ceruoyse, ouy de leauue si nhas de lun ni de lautre. Les Indiens & autres Leuantins vers lesquelz nous nauignons en si gros danger pour amener de deuers eux des espices haient vne fois agousté de nos aux se mocquent de nous de ce que nous prenons tant de paine pour aller querre vers eux viande picquante, veu que en hauons de meilleures en noz payz, que sont les aux. Et le cheuallier Hutten dict que son pere ne voulut oncques souffrir que lon vst en sa mayson dautres espices que des creues en son iardin, questoient les aux. Mais de quoy nous sert nauiguer si loin, pour apporter perles & pierres precieuses doutre mer aux vendeurz avec grosse paine & danger, aux achatteurz a si groz frayz, quel bien luy en aduiendra pour sentre-

tenir en estre, voire en bien estre. Le garderont telles fanfares en fante, ou luy alongeront sa vie? Pourquoy bon droict raconte M. Tomas More, en la descrittion de sa ville de Vtopie, que les enfantz dillec fuioient de deuant ceux qui portoient des chaines dor, extimantz que ce fussent de larronz, brigantz ou autres malfaicteurz, ainsy enchainez come lon enchainé par deca telle maniere de gentz, quilz craignoient que les mengeussent. Couroient apres les autres qui portoient perles, dya-mantz, rubiz sus leurz bonetz, come lon faict par deca apres les folz qui portent petites plumes, aureilles & sonnettes en leurs chapperonz. Ainsy sont toutes ces inuentions humaines peche deuant la iustice de Dieu, mais mocquerie deuant sa misericorde; car Esaïe dict, chapitre 30, vers. 22, Que toutes noz œuures sont semblables au drapeau dune femme menstrueuse, ce que seroit pour nous fourrer en desespoir sans les consolations & esperances que nous donnent les autres lieux de la S. Escriture. Premièrement la promesse quil fit a Noe, come nous hauons dict cy deuant, quil ha acomplie par lexhibition que Dieu ha faicte de son fils, qui ha este innocent mis a mort afin de satisfaire pour nous de noz dictz pechez, car il ha conuerse parmi nous vsant de ce que nous vsons pour nouz necessitez non naturelles mais coustumières, come nous hauons deuant dict pour monstrier quil ne les nous imputoit pas a peche, combien quelles le fussent, & ne nous ha guerrie entierement la playe dicelluy, mais lauee tant seul-



lement & garder quelle nempire, & faire que le peche ne nous soit impute enuers son pere, ce quil ha faict a sa premiere venue, reseuruant de la guerir a la segonde, que sera alors quil descendra, non pas en humilite come il hauoit faict a la premiere, mais en sa maieste. Car (come dict lapostre) Dieu nous ha touz enclauéz en peche afin quil eust de touz misericorde, non pas que soions iustifiez par noz œuures, car ce seroit contre ce quil dict par Esaie. Mais Iesus Christ, qui est nostre aduocat & intercesseur, faict enuers son pere quil les nous aconté pour bones, iustifiant nous & nouz œuures sil voit que haions foy en luy, come monsturons par ce

*Exemple.* Voyez vn pere haiant vn enfant de iij ou iiij ans, quil ayme come naturellement le pere faict son enfant; il ha aussy vn seruiteur auquel il commande quelque chose, come paraenture de luy tirer ses bottes. Le seruiteur se met en besoigne, mais lenfant, iacoit quil nhaie le pouuoir de ce faire, ce nonobstant pour laffection quil porte a son pere, lequel il voit hauoir ce agreable sefforce de aussy y besoigner come le seruiteur. Or ie demande du quel seruice le pere se contentera mieux, ou du seruice que son vallet luy aura faict ou de celluy que son enfant aura voulu & non peu? Certes lon ne me scauroit raysonnablement respondre fors que le vouloir du fils sans pouuoir sera prefere au faict du seruiteur, pource que le seruiteur lhaura faict par deuoir seruile, le fils pour amour filialle.

Et pourtant voiantz toutes ces choses, viuons

selon les ordonnances de Dieu tant que nous sera possible, le honorantz & adorantz; & en ce de quoy ne pourrons satisfaire, prions son fils quil nous face tenir quittes dun tel oblige. Et apres vivons ensemble touz humains fraternellement & avec Dieu nostre commun pere en obeissance filiale de tout nostre pouvoir. Et pour viure ensemble en charite regardons de rendre a Dieu ce quest a Dieu & a Cæsar ce quest a Cæsar, a scaudir a Dieu la charite affectuelle, aux homes la ctuelle come hauons souuent dict. Et ne nous excusons point de trauailler pour souruenir a nostre prochain sus contemplation, disantz que ne voulons vacquer fors a seruir a Dieu pour cuider paruenir en linnocence & simplicité par Dieu a nostre premier pere commandée, nous trauaillerions pour neant a ce nous acheminantz. Car Dieu ha depute le Cherubin au glaïue voltigeant pour nous en garder. Il veut que mettions la main a la paste si voulons viure trestouz tant a chascun pour soy que pour son prouchain. Et pource faire il nous ha enuoïee prudence au lieu de la sapience quil nous hauoit donnée & que par nostre folle outrecuidance hauons laissée perdre, quest le Mercure duquel cy deuant hauons parle apres Platon, qui ordonna les choses publiques en diuerſes sortes, & faict entre les homes telle distinction quil faut que les vns commandent, les autres obeissent, & que les commandantz & les obeissantz saccordent a faire des loix, pour en vser en vnion & icelle par ce moien entretenir pour les sentrecommuniquer a garder ce quilz ayment,



*Diffinition du  
peuple, selon  
S. Augustin.*

veu que S. Augustin en son xxj<sup>me</sup> liure, chap. xxiiij<sup>me</sup> diffinit le peuple ainſy : Cest vne assemblee de multitude rayſonnable, ſaccompaignante dun accordt en la communication des choses quelle ayme. Obeifſons donc toutes les ij parties aux loix, ſcachantz chaſcune que luy appartient, & non marchantz ſus lappartenance lun de lautre, non pas nous mer-  
tantz en teſte que toutes choses doiuent eſtre communes, ce queſt bien vray, mais non pas en ſorte que dient ces achariatres de Anabaptiſtes, que chaſcun peut prendre ſus ſon prochain ce que luy ſera beſoin ſans le luy demander, car non ſeulement le droict des gentz ni ciuil ne dient pas ainſy, mais celluy de nature nous en faiet demonſtration par experience ſus les beſtes & oyſeaux meſmes, car ou verrez vous que ceux dune eſpece enuahiffent le domicile lun de lautre, quilz chaſſent lun lautre de leur paſturage; car queſt ce que vniuerſite, ſi non amas de pluſieurz particulierz? Et ſil eſtoit permis que chaſcun priſt des biens du monde a ſon appetit, la conuoytiſe humaine eſt ſi grande que vn chaſcun particulier ne ſe contenteroit pas de la partie, mais voudroit hauoir le tout, come nous hauons declare en nous carmes & latins & gauloys : Tous autres animaux, &c., &c., & ſentretue-  
roit on les vns les autres, ce de quoy encor lon ne ſe deſporte pas par reuerence des loix, car les hommes nhont pas ſi gros ventre que pluſieurz beſtes, mais ilz hont loeil plus grandt que le ventre, come dict le commun prouerbe. Car le ventre eſt tantost ſaoul, loeil iamays, ou ce que loeil rapporte a  
limagina-

limagination & limagination a la voulente. Pourquoy prudence ha come Mercure, duquel nous hauons parle, amena au monde par le commandement de Iuppiter, iustice & honte, qui y hont establies & establistent encor de present des loix decernantz come le mien & le tien ne doiuent mettre en desbat toy & moy, distribuanes a chascun le sien, combien que cela ne serue encores de gueres, car les loix ne sont fors come toylles & filz dyraignes, ausquelles sont prises les petites mouches; les groz tauans les percent & passent outre, come dict Anacharsis. Mais il ne faut pas que la loy de Dieu ne soit aux dictes loix preferee, cest que en cas de necessite ou publique ou particuliere les biens dun chascun particulier soient communiquez, en sorte que le possedant vn bien plus auant quil nha faute pour son corps & son mesnage le doit comuniquer a son voysein qui en haura faute, mais pourueu que la faute ne prouienne de sa coulpe, quest que quant vn home qui sera este riche, par gourmandise, paillardise ou autre excès haura despendu tout son bien puis voudra que le bon mesnager le nourrisse; ou vrayement sera vn fort & robuste paillardt ou de corps ou desperit souffisant a guaigner la vie de soy & de son mesnage, combien quil sera paouure avec sa labeur & ne voudra rien faire, ains aymera plus cher mendier, suyuant le gros bourdon qui mange le miel cuilluz par les mouches sans aller avec elles succer les fleurz, car il faut faire telles gentz greffierz escriuantz avec vne plume de xviii piedz. Mais aux autres paouures di-

N.



setteux, qui estantz riches, par quelque defastre rumbent en paouurete ou vrayement sont meshaignez de leur persone, ou encor quant ilz seroient fortz & robustes sont si chargez de famille que par leur trauail ilz ne leur peuuent pas fouruenir; veritablement a telz ne faut pas que soions contrainctz aider par la loy citoienne par crainte de paine, mais que la diuine nous y incite par amour & charite & faut que veillons en public & particulier, que les paouures membres de Iesus Christ & son image come nous soient substentez. De quoy nous hauons donnee la regle par vn quattrein en noz menues pensees ainly :

*Impotent bourgeois souffrir faim  
Ne doit en cite de police,  
Ni celluy mendier son pain  
Quest fort & a labeur propice.*

Faut dauantage que entre les commandantz & obeissantz telle regle soit obseruee, que les commandantz soient vn ou plusieurs. Premièrement, quilz obseruent ce a quoy viser Platon leur ha commande, establistantz des loix, que a Dieu, a fortune & a art, de quoy nous ne ferons pour maintenant plus ample mention, car nous en drecherons vn traicte a part. Item plus que les commandantz aduisent quilz sont faictz pour le peuple, plus tost que le peuple pour eux, & quilz hont a commander non pas aux bestes, mais aux homes, pour quoy que leurz loix soient faictes pour le profit public non pour le leur particulier, & encor ne les passent sans laduis de tout le commun. Dautre

coſte, que les obeiffantz obeiffent & ne ſi ſe rebel-  
lent pas ni en general ni en particulier, puis-  
leurz ſuperieurz leur feront quelque oppreſſion,  
pourueu quelle ne ſoit trop grande ou trop conti-  
nuelle, car lapoſtre le nous comande diſant : Obeyſ- *Romains xiiij*  
ſez a voz magiſtrautz, ſoient bonz ou desbordez,  
car Dieu les nous ha enuoiez touſiours come pere  
a ſes enfantz; filz ſont bonz, come vne benignite  
de laquelle il vſe enuers nous; filz ſont mauuayz,  
come vne verge par laquelle il nous chaſtoie de  
noz vices come le pere ſes enfantz. Et puis que ni  
commandantz ni obeiffantz nobeiſſons pas a ſa iu-  
ſtice, recourons nous a ſa miſericorde luy criantz :  
Abba pater miſerere!










TABLE DES MATIERES  
contenues dans ce  
volume.

AVX MEMBRES DE LA SOCIETE  
*d'histoire & d'archéologie de Genève, & au Lecteur*  
*fidèle,* p. iij.

ADVIS ET DEVIS DES LENGVES, p. i.

AMARTIGENEE, CEST A DIRE DE LA  
*source de peche,* p. 75.

F I N













Rockley Spad









1833351



